

Tawureta Munsa

Isirayila xa yete sotoe

Masenyi nde yi kitaabui xa fe ra

Isirayila xa taruxui foloxi Tawureta Munsa xa kitaabui singe nan kui, e naxan ma «Fe Folɔ Fole.» Na sora donxoe a masenma Isirayila sabatixi Misira boxi ma ki naxe Annabi Yusufu xa waxati.

Yusufu nun a taarae to faxes, Isirayila nun Misira xa defanyi naxa xurun folo. A rapɔnyi Isirayila naxa findi Misira xa konyie ra. Misira mange naxa e rawali a jaaxi ra, e xa taae ti a be.

Kono Alatala naxan mu neemuma a xa jama ma, a naxa Annabi Munsa xee Misira boxi ma alako Isirayila xa xoreya soto. Ala naxa kaabanako magaaxuxi fu raba Munsa saabui ra, han Firawuna naxa Isirayila bonsoe kerɩ. Isirayila to jere folo, e naxa Xulunyumi baa li Misira boxi naaninyi ra. Firawuna nun a xa soorie naxa kata e sontode menni, kono Ala man naxa kaabanakoe raba, a kira rabi baa tagi Isirayilakae girima dennaxe. Firawuna xa soorie to bira e foxo ra, Ala naxa baa ragali e xun ma.

Naakiri ma Isirayila naxa jere folo gbengberenyi ma sigafe ra Kanaan boxi ma, Ala dennaxe laayidixi e be. Kira xon ma a naxa a xa seriye fi Annabi Munsa ma Turusinina geya fari jama ya xori. Kono a mu bu, jama naxa Ala xa seriye matandi, e kuye batu. Na nan a niya Ala naxa nate tongo e xa e jere gbengberenyi ma je tongo naani bun ma, alako Ala matandi birin xa faxes kira xon beenu e xa die xa so Kanaan boxi ma.

Na jere kui Ala naxa lu e ya ma a xa horomolingira saabui ra. A xa nore nu na na xun ma koe nun yanyi. E biyaasi temui, e horomolingira ragoro, Ala xa nore nu siga yare han a yire li e yonkinma dennaxe. Na mooli raba ne na je tongo naani birin bun ma.

Yi kitaabui rapɔnma Annabi Munsa xa faxes nan ma. Beenun a xa laaxira, a naxa Isirayila jama taxu Yosuwe ra naxan fama e rasode Kanaan boxi ma.

Ala lufe a xa jama ya ma, a e xaran tinxinyi ra, a e makanta senbe ra, na birin findixi misaali nan na Ala xa jama be won ma waxati. Ala wama won xun tife kira fanyi ma sigafe ra ariyanna a won nasoma dennaxe. Ala xa won mali na biyaasi kui. Amina.

Tawureta Munsa

Isirayila xa yete sotoe

1

Isirayilakae xa konyiya Misira boxi ma

¹ Isirayila xa die xilie nan ya, naxee e baba Yaxuba mati Misira boxi ma, a nun e xa denbayae: ² Ruben, Simeyon, Lewi, Yuda, ³ Isakari, Sabulon, Bunyamin, ⁴ Dana, Nafatali, Gadi, nun Aseri. ⁵ Yaxuba xa die nun a xa mamadie nu lanxi mixi tongo soloferen nan ma. A xa di Yusufu jan nu bara siga Misira. ⁶ Yusufu nun a ngaxakerenyie dangi xanbi, ⁷ Isirayilakae naxa yiriwa Misira boxi ma, e senbe nu luma a xun masa ra.

⁸ Na waxati mange gbete nan nu na Misira xun ma, naxan mu Yusufu kolon. ⁹ A naxa a fala a xa pama be, «Wo a to, Isirayilakae yiriwaxi ki naxe, a bara findi kontofili ra won be. E bara dangi won na. ¹⁰ Won xa koota nde raba alako e naxa wuya sonon. Xa na mu, gere temui, e fama ne kafude won yaxuie ma, e keli won xun ma.»

¹¹ Na kui, mange naxa e findi konyie ra, a wali xoroxoe dexo e ma Pitomi nun Ramesesi taae tife ra. Misira mange Firawuna nu donse malanma na taae nan kui. ¹² Konon wali xoroxoe nu dextoma e ma ki naxe, e man nu sigama gbo ra na ki ne, han Misirakae bone naxa rapaaxu e ma Isirayilakae xa fe ra. ¹³ Misirakae naxa e rawali a paaxi ra. ¹⁴ E naxa e toro wali xoroxoe ra alo biriki bonbofe nun xee rawalife. E naxa konyiya paaxi dexo e ma.

¹⁵ Misira mange naxa Isirayilakae xa dirasuxuie Sifira nun Puwa yamari, ¹⁶ «Wo na Isirayila gine xa di rasuxu, xa xeme nan a ra, wo a faxe keren na. Xa gine nan a ra, wo xa a lu a xa balo.» ¹⁷ Konon dirasuxuie to nu gaaxuma Ala ya ra, e mu nu Misira mange xa yaamari rabatuma. E naxa di xememae lu e xa balo. ¹⁸ Mange naxa dirasuxuie xili, a naxa e maxarin, «Munfe ra wo di xemee luma, e xa balo?» ¹⁹ Dirasuxuie naxa Firawuna yaabi, «Isirayila ginee senbe gbo Misira ginee be. Beenu dirasuxui xa e yire li, e jan bara di bari.» ²⁰ Ala naxa hinne na dirasuxuie ra. Isirayila pama naxa wuya dangife a singe ra. ²¹ Dirasuxuie to gaaxu Ala ya ra, Ala naxa die fi e fan ma.

²² Na temui, Firawuna naxa a xa pama birin yamari, «Wo Isirayilakae xa diyore xemee woli Nili xure ma, konon wo e xa di ginee tan lu, e xa balo.»

Munsa mofe Misira

¹ Xeme nun gine nde naxa e boore futi, e birin fatan Lewi bonsœ nan ma Isirayilakae ya ma. ² Na gine naxa teegε, a di xeme bari. A to a to di fanyi nan nu a ra, a naxa a nœxun kike saxan. ³ A to mu nu nœma a nœxunde sœnœn, a naxa kolime debe maso dole ra, a diyœre sa a kui, a fa debe dœxœ Nili xure ma yoforoe tagi. ⁴ Na diyœre taara ginema nu tixi yire nde, a ya tixi a xunya ra, alako a xa a kolon fe naxan fama na lide. ⁵ Firawuna xa di gine naxa goro Nili xure ma a maxade. A to debe to yoforoe tagi, a naxa a xa konyi gine nde xœe a tongode. ⁶ A to a rabi, a naxa di xeme to a kui, a wafe. A naxa kinikini a ma, a fa a fala, «Isirayilaka nde xa di na a ra!»

⁷ Na temui, diyœre taara naxa Firawuna xa di gine maxœrin, «N xa siga Isirayila dingε nde xili i bε, a xa fa xipe fi a ma?» ⁸ Firawuna xa di gine naxa a yaabi, «Iyo». Diyœre taara naxa siga, a sa diyœre nga xili. ⁹ Firawuna xa di gine naxa a fala diyœre nga bε, «Yi diyœre xanin, i xa xipe fi a ma n bε. N i sare fima nε.» Diyœre nga naxa diyœre tongo, a xipe fi a ma. ¹⁰ Diyœre to mœ, a nga naxa a xanin Firawuna xa di gine xœn ma, a findi na xa di ra. A to a ramixi ye nan xœœra, a naxa a xili sa Munsa, naxan falaxi «minife» Eburu xui ra.

Munsa sigafe Madiyan

¹¹ Munsa to fonikaya rakamali, a naxa siga a ngaxakerenyie yire, a xa e xun mato a ra e xa wali xœœxœe kui. A to a ngaxakerenyie yire li, a naxa Misiraka nde to Isirayilaka nde bœnbœ ra. ¹² A to mu mixi yo to na longori, a naxa na Misiraka faxa, a fa a fure nœxun meyenyi kui. ¹³ Na kuye iba, Munsa man naxa mini, a Isirayilaka firin to sœnxœ ra. A naxa mixi maxœrin nœndi mu na naxan bε, «I bariboore bœnbœfe munfe ra?» ¹⁴ A naxa a yaabi, «Nde i findixi mange nun kiitisa ra muxu xun ma? I wama n fan faxafe nε, alœ i na Misiraka faxa ki naxε?» Munsa naxa gaaxu. A naxa a fala a bœpe ma, «N naxan nabaxi a bara kolon.»

¹⁵ Firawuna to a kolon Munsa naxan nabaxi, a naxa kata Munsa faxade. Kœnœ Munsa naxa a gi Firawuna ma, a sa sabati Madiyan bœxi ma. Munsa to siga naa, a naxa kolœnyi nde li, a fa dœxœ a xa a malabu. ¹⁶ Madiyan serexedube xa di gine solofere naxa fa ye bade na kolœnyi yire e baba xa xurusee bε. ¹⁷ Kœnœ xuruse dε madœnyi ndee fan naxa fa, e naxa wa na ginœe kerife. Munsa to na to, a naxa keli, a na ginœe xun magere

so, a fa ye fi e xa xurusee ma.

¹⁸ Na ginɛe to gbilen e baba Reyuweli yire, a naxa e maxɔrin, «Munse a niyama wo gbilenxi sinnanyi ma to?» ¹⁹ E naxa a yaabi, «Misiraka nde bara muxu ratanga xuruse de madonyi kobie ma, a man fa ye ba won ma xurusee be.» ²⁰ Reyuweli naxa a xa di ginɛe maxɔrin, «A na minden? Wo a luxi naa munfe ra? Wo sa a xili, wo donse so a yi ra.»

²¹ Munsa naxa tin a sabatide Reyuweli xɔnyi. Reyuweli naxa a xa di gine Sipora fi Munsa ma, a xa a dɔxɔ. ²² Sipora naxa di xeme bari a be. Xɔɲe nan to lanxi Munsa ma na bɔxi ma, a naxa a xa di xili sa Gerisomi, naxan wama a falafe, «Xɔɲe nan n na yi bɔxi ma.»

²³ Ƴe wuyaxi dangi xanbi, Misira mange naxa faxa. Isirayilakae nu e mawafe Ala be e xa konyiya xɔrɔxɔe xa fe ra. Na maxandi naxa Ala li. ²⁴ Ala naxa e wa xui me. A naxa ratu a xa saate ma naxan xirixi a tan nun Iburahima, Isiyaga, nun Yaxuba tagi. ²⁵ Na kui Ala naxa a ya rafindi Isirayilakae ma, a xa a ɲengi sa e xɔn ma.

3

Munsa xa xɛɛraya

¹ Munsa bitanyi Yetiro nan nu na Madiyan sɛrɛxɛdube ra. Munsa naxa Yetiro xa xurusee xanin wula i yire makuye, han a sa Ala xa geya Xorebe li. ² Menni Alatala xa maleke naxa mini a ma wuri bili lanmadi ma, naxan radɛxɛxi. Munsa naxa a mato, te nu na na wuri bili ma, kɔnɔ wuri bili mu ganxi. ³ Munsa naxa a fala a yete ma, «N xa n makɔre yi kaabanako ra, n xa a kolon munfe ra wuri bili lanma mu ganxi.»

⁴ Alatala to Munsa to a makɔrɔxi wuri bili ra alako a xa a igbe, a naxa a xili kelifɛ na wuri bili ma, «Munsa, Munsa!» Munsa naxa a ratin, «N tan nan ya.» ⁵ Ala naxa a masen a be, «I naxa i makɔre be ra. Sankirie ba, barima i tixi yire seniyenxi nan ma.» ⁶ A man naxa a masen, «I baba Marigi Ala na n tan na, Iburahima, Isiyaga, nun Yaxuba Marigi Ala.» Munsa to na me, a naxa a yatagi makoto, barima a nu gaaxuxi Ala matofɛ ra.

⁷ Alatala man naxa yi masenyi ti Munsa be, «N bara n ma ɲama xa tɔɔre to Misira bɔxi ma. N bara e wa xui me e xa konyiya kui. N ɲengi saxi e xa tɔɔre xɔn ma. ⁸ N goroxi na nan ma, n xa fa e bade Misirakae yi ra, n xa e raso bɔxi fanyi ma, lude gbegbe na dennaxe. Xipe nun kumi gbo naa, Kanaankae, Xitikae, Amorikae, Perisikae, Hiwikae

nun Yebusukae xonyi. ⁹ Yakosi Isirayilakae wa xui bara n li. N man bara paxankate to Misirakae naxan dɔxɔfe e ma. ¹⁰ Siga, n bara i xɛɛ Firawuna xɔn, i xa n ma pama Isirayila ramini Misira.»

¹¹ Munsa naxa a fala Ala be, «Mixi mooli mundun na n tan na, n xa siga Firawuna ma Isirayilakae ramini ra Misira?» ¹² Ala naxa a yaabi, «Won birin na a ra. I na ge pama ramini Misira boxi ma, wo fama n batude yi geya nan fari. Na findima tɔnxuma ra, fa a fala, n tan yati nan i xɛɛxi.»

¹³ Munsa naxa a fala Ala be, «N na sa a fala Isirayilakae be, «Wo benbae Marigi Ala nan n xɛɛxi wo ma,» e fa sa n maxɔrin i xili ma, n yaabi mundun fima e ma?» ¹⁴ Ala naxa a masen Munsa be, «N na «naxan na» na. I xa Isirayilakae yaabi, «Ala naxan na, a bara n xɛɛ wo ma.» » ¹⁵ Ala man naxa a masen Munsa be, «I fama woyende yi ki ne Isirayilakae be, «Wo benba Iburahima, Isiyaga, nun Yaxuba Marigi Alatala, Ala naxan na, na nan n xɛɛxi wo ma.» N xili nan na ki abadan, n wama mixi birin xa n xili na ki ne temui birin. ¹⁶ Sa Isirayila kuntigie malan, i a fala e be, «Wo benba Iburahima, Isiyaga, nun Yaxuba Marigi Alatala bara mini n ma. A bara a masen n be, “N bara fe to e naxan dɔxɔfe wo ma Misira. ¹⁷ N bara nate tongo wo ramini ra Misira wo xa tɔɔre kui. N xa wo xanin Kanaankae, Xitikae, Amorikae, Perisikae, Hiwikae, nun Yebusukae xonyi, xipe nun kumi xelema dennaxe.”»»

¹⁸ «Isirayila kuntigie na ge i xui ramede, wo sigama ne Misira mange yire a falafe ra, «Isirayilakae Marigi Alatala bara fa muxu fɔxɔ ra. I xa muxu sago sa muxu xa feɛɛn saxan jere raba gbengberenyi ma, alako muxu xa serɛxɛɛ ba muxu Marigi Alatala be.» ¹⁹ N a kolon Misira mange mu tinma wo lude wo xa siga, xa n mu n senbe masen a be. ²⁰ Na kui n fe magaaxuxie rabama ne Misirakae ra, n e tɔɔɔ kaabanakoe ra. Na dangi xanbi, e xa mange tinma ne wo xa siga. ²¹ N man a ragirima ne Misirakae xa wo ki, alako wo naxa siga wo belexe igeli ra. ²² Isirayila gine birin xa e dɔxɔboore Misirakae makula yirabase gbeti nun xɛema daaxie ra, a nun sosee, wo naxee soma wo xa die ma. Na kui wo harige bama ne Misirakae yi ra.»

4

Alatala a senbe masenfe Munsa be

¹ Munsa naxa Alatala maxɔrin, «Xa Isirayilakae mu sa la n ma masenyi ra, e fa a fala, «Alatala mu minixi i ma feo,» n munse rabama fa?» ² Alatala naxa a maxɔrin,

«Munse na i belexe na ki?» A naxa a yaabi, «N ma yisuxuwuri.» ³ Alatala naxa a yamari, «A woli boxi.» A to a woli boxi, na naxa mafindi boximase ra, Munsa fa a gi a ya ra. ⁴ Alatala naxa a masen a be, «I belexe itala i xa a suxu a xuli ma.» Munsa naxa a belexe itala. A to a suxu a belexe ra, na naxa findi yisuxuwuri ra.

⁵ Alatala naxa a masen a be, «Na findima tonxuma ra e be, fa a fala, e benba Iburahima, Isiyaga, nun Yaxuba Marigi Alatala bara mini i ma.» ⁶ Na dangi xanbi, Alatala man naxa a masen a be, «I belexe sa i kanke i xa donma bun ma.» A to na raba, a fa a ramini, kune a belexe rafiixexi. ⁷ A man naxa a yamari, «I man xa i belexe sa i kanke i xa donma bun ma.» A to na raba, a belexe naxa yalan keren na. ⁸ Alatala naxa a masen a be, «Xa Isirayilakae mu la i xui ra, xa na mu a ra na tonxuma singe ra, temunde e fama ne lade i ra na tonxuma firin nde xa fe ra. ⁹ Xa e mu la i xui ra na tonxuma firinyie xa fe ra, i xa ye tongo Nili xure, i a rafili boxi ma. A findima ne wuli ra keren na.»

¹⁰ Munsa naxa Alatala yaabi, «N Marigi, i a kolon i xa konyi mu fata woyende. N nenyi binya n de i kabi n dimedi temui. To masenyi mu na fe masaraxi.» ¹¹ Alatala naxa a masen a be, «Nde mixi nenyi rakelima? Nde mixi findima boboe ra, xa na mu tulixori? Nde mixi findima ya kanyi ra, xa na mu donxui? N tan Alatala xa mu a ra? ¹² Siga. N i malima masenyi tide. N masenyi yati rasoma ne i de i, i naxan tima.» ¹³ Munsa naxa a yaabi, «N Marigi, yandi, mixi gbete xee.»

¹⁴ Na kui Alatala naxa xono Munsa ma. A naxa a masen a be, «I taara Haruna go? Lewi bonsoe mu a ra? N a kolon, na tan fata woyende. A jan na fafe i ralande. A seewama ne i tofe ra. ¹⁵ I masenyie tima ne a be, a naxan falama jama be. N wo firin malima na kui. N a masenma wo be wo lan wo xa naxan fala. ¹⁶ Haruna i xui madangima jama be, alo namijonme Ala xui madangima ki naxe. ¹⁷ I xa i xa yisuxuwuri tongo. I kaabanako birin nabama a tan na.»

Munsa gbilenfe Misira

¹⁸ Na temui Munsa naxa gbilen a bitanyi xonyi, a a fala a be, «N wama sigafe ngaxakerenyie yire Misira boxi ma, n xa a kolon e xa fe na ki naxe.» Yetiro naxa a yaabi, «Siga bonesa kui.»

¹⁹ Alatala nu bara a masen Munsa be Madiyan boxi ma, «I xa gbilen Misira. Naxee nu wama i faxafe, nee birin bara faxa.» ²⁰ Na kui Munsa naxa a xa gine nun a xa die baki

sofalee fari, e gbilen Misira. Munsa naxa a xa yisuxuwuri fan xanin, Ala naxan ma fe fala a be.

²¹ Alatala naxa yi masenyi ti Munsa be, «I na gbilen Misira, i xa kaabanako birin naba Firawuna ya i, n naxee saxi i sagoe. Na temui n tan nan a xaxili raxoroxoma ne, alako a naxa tin n ma jama bepinde. ²² I xa a fala Firawuna be, «Alatala xui nan ya, Isirayila, n ma di singe nan a ra. ²³ N bara i yamari i xa a bepin alako a xa siga n batude. I to bara tondi na ra, n i xa di singe faxama ne.» »

²⁴ Munsa to nu na biyaasi kui sigafe ra Misira, Alatala naxa mini a ma koe ra, a xa a faxa, ²⁵ kono Munsa xa gine Sipora naxa a xa di xeme sunna geme xepexi ra, a na soli sa a sanyi ma. A naxa a fala, «N ma mori na i ra, muxu nun naxan wuli keren.» ²⁶ Na kui Alatala naxa Munsa lu na. Sipora xa masenyi, «N ma mori na i ra, muxu nun naxan wuli keren,» a nu wama sunne wuli nan xa fe falafe.

²⁷ Alatala naxa a masen Haruna be, «I xa siga Munsa ralande gbengberenyi ma.» A to naralan Munsa ra Ala xa geya ma, a naxa a sunbu. ²⁸ Munsa naxa Alatala xa xeraya birin ya ba a be. A naxa na kaabanako fee fan fala a be, Ala naxan fixi a ma a rabafe ra.

²⁹ Munsa nun Haruna to Isirayilakae li, e naxa Isirayila fori birin malan. ³⁰ Haruna naxa dentege sa e be Alatala naxan masenxi Munsa be. A naxa kaabanakoe fan naba jama ya xori. ³¹ Nama naxa la na birin na. E to a kolon a Alatala pengi saxi Isirayilakae xon ma e xa toore kui, e naxa e igoro boxi, e suyidi Ala be.

5

Munsa nun Haruna sigafe Firawuna yire

¹ Na dangi xanbi, Munsa nun Haruna naxa siga Firawuna yire. E naxa a fala a be, «Isirayila Marigi Alatala xa masenyi nan ya, «N ma jama bepin, alako e xa siga n ma sali rabade gbengberenyi ma.» » ² Firawuna naxa yi maxorinyi ti, «Nde tan na na Alatala ra, n lan n xa naxan xa yaamari rabatu Isirayila bepinfe ra? N mu Alatala kolon! Na kui, n mu noma a lude Isirayila xa siga fefe ma!»

³ E naxa a fala a be, «Isirayila Marigi Ala bara fa muxu foxo ra. A lu muxu xa biyaasi xi saxan gbengberenyi yire, alako muxu xa serexee ba muxu Marigi Alatala be, xa muxu mu na raba muxu sontoma ne wuganyi ra, xa na mu santidegema ra.» ⁴ Misira mange naxa e yaabi, «Munsa nun Haruna, munfe ra wo wama jama bafe wali de i? Wo

sigar wo xa wali ra. ⁵ Yi jama to bara gbo ye yi boxi ma, wo wama e xa wali nan xun nakanafe fa.»

⁶ Na loxo Firawuna naxa konyie xa mangee nun wali xunye yamari, ⁷ «Wo naxa sexe so Isirayila jama yi ra sonon, e naxan malanma boora ra e biriki bonboma temui naxe. Yakosi e xa na sexe fen e yete ra. ⁸ E dari biriki xasabi naxan bonbo ra, wo naxa sese ba na ra. Fuyante nan e ra. Na nan a ra, e a falama, «Muxu xa siga serexe bade muxu Marigi Ala be.» ⁹ Wo xa nde sa e xa wali xun ma, alako e naxa yanfa wali ma madaxui woyenyi xa fe ra.» ¹⁰ Konyi xa mangee nun wali xunye naxa a fala Isirayila jama be, «Firawuna naxe a a mu sexe soma wo yi ra sonon. ¹¹ Wo xa siga na fende wo yete ra. Wo xa a kolon sese mu bama wo xa wali kote ra.»

¹² Na kui jama naxa yensen Misira boxi sexe xabade. ¹³ Mangee nu e ragbatama ne, e nu fa a fala, «Wo xa wo xa wali rapon loxo yo loxo alo a singe, sexe nu soma wo yi ra temui naxe.» ¹⁴ Firawuna xa mixie nu fa Isirayilakae bonbo naxee nu tixi wali xunye ra. E nu fa e maxarin, «Munfe ra xoro nun to, wo mu biriki xasabi bonboxi alo wo darixi a ra ki naxe?»

¹⁵ Isirayila wali xunye naxa siga e mawade Firawuna xon a falafe ra, «I na yi mooli rabafe muxu tan i xa konyie ra munfe ra? ¹⁶ E mu sexe yo soma muxu yi ra, konso e a falama a muxu xa biriki bonbo! I xa mixie na muxu tan i xa konyi bonbofe, konso e tan nan wali kana.» ¹⁷ Firawuna naxa e yaabi, «Fuyantee nan wo ra. Na nan a toxi wo a falama, a wo xa siga serexe bade Alatala be. ¹⁸ Wo siga walide! Sexe yo mu soma wo yi ra, sese man mu bama wo xa biriki konti ra.»

¹⁹ Isirayila wali xunye naxa kontofili na woyenyi ra, a falafe ra, «Sese mu bama birikie konti ra wo naxan bonboma loxo yo loxo.» ²⁰ E to mini Firawuna xonyi, e naxa Munsa nun Haruna li naa. E nu na e memefe. ²¹ Na wali xunye naxa a fala e be, «Alatala xa wo jaxankata, barima wo bara muxu mapaaxu Firawuna nun a xa mixie ma. Wo bara santidegema sa e belexe, e xa muxu faxa.»

²² Munsa naxa gbilen Alatala ma a falafe ra, «Marigi, i bara yi toore doko yi jama ma munfe ra? I n xexi be munfe ma? ²³ Kabi n naxa siga Firawuna yire woyenfe ra i xili ra, a fa fe jaaxi nan tun nabafe yi jama ra. I mu i xa jama xoreyaxi feo.»

¹ Alatala naxa a masen Munsa be, «I fama a tode yakosi, n naxan nabama Firawuna ra. N senbe nan fama a niyade a xa Isirayila jama bepin, a yete xa e keru a xa boxi ma.»

² Ala man naxa a masen Munsa be, «N tan nan Alatala ra. ³ N naxa n yete masen Iburahima, Isiyaga, nun Yaxuba be. Konɔ e mu n n xili kolonxi Alatala ra. E n kolonxi Ala Senbema xili nan na. ⁴ Muxu man naxa saata, n xa Kanaan boxi fi e ma, e xoreya rabaxi dennaxe. ⁵ N bara Isirayilakae wa xui me e xa konyiya kui Misirakae yi ra. N man bara ratu n ma saate ma. ⁶ Na kui, a fala Isirayilakae be, «N tan nan Alatala ra. N fama ne wo raminide Misirakae xa ne bun ma. N xoreya fima ne wo ma. N fama ne wo xun sarade n senbe ra. N jaxankate ragoroma ne Misirakae ma e xa wali kobie xa fe ra. ⁷ N wo findima ne n ma jama ra. N fan findima ne wo Marigi ra. Na temui wo a kolonma ne, n tan nan na wo Marigi Alatala ra, naxan wo baxi konyiya kui Misirakae yi ra. ⁸ N fama ne wo rasode boxi ma, n nakalixi naxan ma fe ra, n xa a fi Iburahima, Isiyaga, nun Yaxuba ma. N fama ne a fide wo ma, a lu wo sagoe.» »

⁹ Munsa naxa na dentege Isirayilakae be, konɔ e mu la a xui ra e xa konyiya xoxoxe xa fe ra. Limaniya birin nu bara ba e yi. ¹⁰ Alatala naxa a masen Munsa be, ¹¹ «Siga Misira mange yire. A fala Firawuna be a xa Isirayila jama bepin, e xa mini a xa boxi ra.» ¹² Konɔ Munsa naxa Alatala yaabi, «Xa Isirayilakae yati mu laxi n xui ra, Firawuna fan mu n xui suxuma feo, n tan naxan jan mu fata woyende.» ¹³ Alatala masenyi ti Munsa nun Haruna be na ki ne, Isirayilakae nun Misira mange Firawuna xa fe ra. A e yamari ne e xa Isirayilakae ramini Misira boxi ra.

¹⁴ Isirayila bonsɔe yareratie nan yi ki:

Ruben naxan singe bari Isirayila, a xa die nan ya: Xanoki, Palu, Xesiron, nun Karimi. Ruben bonsɔe nan na ki.

¹⁵ Simeyon xa die nan ya: Yemuweli, Yamin, Ohadi, Yakin, Soxara, nun gine Kanaanka xa di Sawulu. Simeyon bonsɔe nan na ki.

¹⁶ Lewi xa die xilie nan yi ki e xa taruxui ki ma: Gerison, Kehati, nun Merari. Lewi xa simaya naxa je keme je tongo saxan a nun solofere li. ¹⁷ Gerison xa die findixi Libini nun Simeyi ra e xabile ki ma. ¹⁸ Kehati xa die findixi Amarama, Yisehari, Xebiron, nun Yusiyeli ra e xabile ki ma. Kehati xa simaya naxa je keme je tongo saxan a nun saxan li. ¹⁹ Merari xa die findixi Maxali nun Musi ra. Lewi xa die nan na ki e taruxui ki ma.

²⁰ Amarama naxa a baba baren yi Yebedi dɔxɔ, naxan Haruna nun Munsa bari a be. Amarama xa simaya naxa je keme je tongo saxan a nun solofere li.

²¹ Yisehari xa die nan ya: Kora, Nefegi, nun Sikiri.

²² Yusiye li xa die nan ya: Misayeli, Elesafana, nun Sitiri.

²³ Haruna naxa Aminadabo xa di Eliseeba dɔxɔ, naxan findixi Naxason maagine ra. A naxa Nadabo, Abihu, Eleyasari, nun Itamari bari Haruna be.

²⁴ Kora xa die nan ya: Asiri, Elekana, nun Abiyasafi a xabile ki ma.

²⁵ Haruna xa di Eleyasari naxa Putiyeli xa di gine dɔxɔ. A naxa Finexasi bari a be. Lewi bɔnsɔe yareratɛ nan na ki e xabile ki ma. ²⁶ Alatala Haruna nun Munsa yamari ne, «Wo Isirayilakae ramini Misira bɔxi ra e lanxunde ki ma.» ²⁷ Munsa nun Haruna nan woyen Misira mange Firawuna be Isirayilakae ramɛnife ra Misira kui.

²⁸ Alatala naxa yi masenyi ti Munsa be Misira bɔxi ma, ²⁹ «N tan nan na Alatala ra. Siga, n xui birin nadangi Misira mange Firawuna ma.» ³⁰ Munsa naxa Alatala yaabi, «N tan nan yi ki, n mu fata woyende a fanyi ra. Firawuna noma tɛnde n ma masenyi ra di?»

7

Ala xa xeeraya Munsa be

¹ Alatala naxa a masen Munsa be, «Haruna xa i xui madangi Firawuna be alo namipɔnmɛ Ala xui madangima mixie be ki naxe. ² N i yamarima naxan birin na, i xa na fala i taara Haruna be naxan na madangima Firawuna be, alako a xa a lu Isirayilakae xa mini Misira bɔxi ra. ³ N Firawuna xaxili raxɔrɔxɔma ne. N tɔnxuma nun kaabanako gbegbe rabama ne Misira bɔxi kui, ⁴ kɔnɔ Firawuna mu fama a tuli matide wo ra. N fama ne paxankate xɔrɔxɔe dɔxɔde Misira ma, n fa n ma jama Isirayila ramini a lanxunde ki ma. ⁵ N na Misira halaki Isirayila ramɛnife ra e tagi, e n kolonma ne Alatala ra.» ⁶ Munsa nun Haruna naxa Alatala xa yaamari suxu alo a masenxi e be ki naxe. ⁷ E nu masenyi tima Firawuna be temui naxe, Munsa xa simaya nu bara je tongo solomasaxan li. Haruna xa simaya nu bara je tongo solomasaxan a nun saxan li.

⁸ Alatala naxa a masen Munsa nun Haruna be, ⁹ «Firawuna na a fala wo be, «Wo xa kaabanako nde raba,» i tan Munsa, i xa a fala Haruna be, a xa i xa yisuxuwuri tongo, a a woli Firawuna seeti ma. Na mafindima ne bɔximase ra.»

¹⁰ Na kui Munsa nun Haruna naxa siga Firawuna yire, e fa a raba, alo Alatala e

yamarixi ki naxe. Haruna naxa Munsa xa yisuxuwuri woli boxi ma Firawuna nun a xa kuntigie ya i, na naxa findi boximase ra. ¹¹ Na temui Firawuna naxa a xa karamoxoe nun a xa mandurulae xili, e xa na kaabanako mooli raba e xa duureya ra. ¹² E nun Haruna birin naxa e xa yisuxuwurie woli boxi ma. Nee birin naxa mafindi boximasee ra, konon Haruna gbe naxa boore gbe gerun. ¹³ Na kui Firawuna xaxili naxa xoxoxo, a mu a tuli mati Munsa nun Haruna ra, alo Alatala nu bara a masen ki naxe.

Mankane singe: ye findife wuli ra

¹⁴ Alatala naxa a masen Munsa be, «Firawuna xaxili bara xoxoxo. A bara tondi n ma pama bepinde. ¹⁵ Tina geesege i xa naralan Firawuna ra Nili xure de. I xa i xa yisuxuwuri xanin, naxan nu bara mafindi boximase ra. ¹⁶ Menni i xa a fala Firawuna be, «Isirayilakae Marigi Alatala bara n xee i yire, n xa a fala i be, “N ma pama bepin, alako e xa siga n batude gbengberenyi ma.” Han yakosi i tan mu tinxi na xui suxude. ¹⁷ Na kui Alatala xa masenyi nan ya, “Na nan a ra, i fama a kolonde, n tan nan Alatala ra. N ma yisuxuwuri na din Nili xure ra, ye nan mafindima wuli ra. ¹⁸ Yexe naxee na Nili xure ma, e fama sontode, e xiri jaaxi fa mini, Misirakae mu noma na ye minde.”» ¹⁹ Alatala naxa a masen Munsa be, «Haruna yamari, «I xa i xa yisuxuwuri itala Misira baae, xuree, nun dabonyi birin ma.» Na a niyama ne ye birin xa mafindi wuli ra Misira boxi ma, hali naxee na fepsee kui, wuri nun geme daaxi.»

²⁰ Munsa nun Haruna naxa a raba alo Alatala e yamarixi ki naxe. Haruna naxa a xa yisuxuwuri itala, a a din Nili xure ra. Xure naxa findi wuli ra Firawuna nun a xa kuntigie ya xori. ²¹ Yexe birin naxa faxes, e xiri jaaxi naxa mini Nili xure ma. Misirakae mu nu noma na ye minde, barima Misira ye birin findixi wuli nan na.

²² Mandurulae fan naxa na kaabanako mooli raba. Firawuna xaxili naxa xoxoxo, a mu tin Munsa nun Haruna xui ra, alo Alatala nu bara a masen ki naxe. ²³ Firawuna naxa gbilen a xonyi, a naxa na fe bote ba. ²⁴ Misiraka birin naxa tigie ge Nili xure seetie ma, alako e xa ye min daaxi soto, barima e mu nu noma Nili xure ye minde.

Mankane firin nde: lanxansarimae

²⁵ Alatala to ge Nili xure garinde, xi solofere dangi xanbi, ²⁶ a naxa a masen Munsa be, «I xa siga Firawuna yire, a fala a be, «Alatala naxa a yamari, i xa a xa pama bepin, e xa siga a batude. ²⁷ Xa i mu tin na ra, Alatala fama i xa boxi birin xun nakanade lanxansarimae ra. ²⁸ E fama yiriwade Nili xure ma, e fa te, e so i xa banxi kui han e i xa

sade li. E soma i xa kuntigie nun Misira jama xa banxie kui, e man soma taami rafalama dennaxe. ²⁹ Lanxansarimae fama ne tede i tan, i xa jama, nun i xa kuntigie birin ma.» »

8

¹ Na temui Alatala naxa a masen Munsa be, «A fala Haruna be, a xa a xa yisuxuwuri itala baae, xuree, nun dabonyi birin xun ma alako lanxansarimae xa te Nili xure ma, e so Misira boxi ma.» ² Haruna to a xa yisuxuwuri itala Misira yee xun ma, lanxansarimae naxa te Misira boxi birin ma. ³ Mandurulae fan naxa na kaabanako mooli raba, e fan naxa lanxansarimae raso Misira boxi ma.

⁴ Na dangi xanbi Firawuna naxa Munsa nun Haruna xili, a a fala e be, «Wo sa Alatala maxandi, alako lanxansarimae xa keli n tan nun n ma jama xun ma. N fama i xa jama rabepinde, e xa siga serexee bade Alatala be.» ⁵ Munsa naxa a fala Firawuna be, «Mange, i gbe binye. I xa nate tongo loxo safe ra lanxansarimae xa keli i tan, i xa kuntigie, nun i xa jama xun ma, e xa lu Nili xure gbansan ma.» ⁶ A naxa a yaabi, «Tina.» Munsa naxa a fala, «A fama rabade na ki ne, alako i xa a kolon, muxu Marigi Alatala maniye mu na. ⁷ Lanxansarimae fama kelide i tan, i xa kuntigie, nun i xa jama xun ma, e fa lu Nili xure ma.»

⁸ Munsa nun Haruna to mini Firawuna xonyi, Munsa naxa Alatala maxandi lanxansarimae xa fe ra naxee nu Firawuna tooma. ⁹ Alatala naxa Munsa xa maxandi suxu. Lanxansarimae naxa faxa banxie, xandee, nun daaxae kui. ¹⁰ Mixie naxa e koto, e xiri jaaxi fa din boxi birin na. ¹¹ Kono Firawuna to a to na fe nu bara dangi, a man naxa a xaxili raxoxo, a mu tin Munsa nun Haruna xui ra, alo Alatala a masen ki naxe.

Mankane saxan nde: saasie

¹² Na temui Alatala naxa a masen Munsa be, «A fala Haruna be a xa a xa yisuxuwuri itala, a din boxi xube ra alako a xa mafindi saasie ra Misira boxi birin kui.» ¹³ E naxa a raba na ki. Haruna to a xa yisuxuwuri itala, a fa boxi xube garin, na birin naxa findi saasie ra, mixie nun xurusee foxo ra. Xube birin naxa findi saasie ra Misira boxi birin kui. ¹⁴ Mandurulae to kata na kaabanako mooli rabade, e mu no. Saasie nu dinxi mixi nun xuruse birin na. ¹⁵ Mandurulae naxa a fala Firawuna be, «Ala foxi yati nan na ki,» kono Firawuna xaxili man naxa xoxo, a mu tin Munsa nun Haruna xui ra, alo Alatala a masenxi ki naxe.

Mankane naani nde: xeerie

¹⁶ Na temui Alatala naxa a masen Munsa be, «Tina geesege i xa kurun, i xa naralan Firawuna ra ye yire. I xa a fala a be Alatala xa masenyi nan ya, «N ma pama bepin, alako e xa siga n batude. ¹⁷ Xa i mu sa tin n ma pama bepinde, n fama xeerie nan nadinde i tan, i xa kuntigie, nun i xa pama ma wo xonyi. Xeerie fama lude Misirakae xa banxie nun e xa boxie birin ma. ¹⁸ Kono na loxo, Gosen boxi ratangama ne, n ma pama na dennaxe. Xeerie mu luma naa, alako i xa a kolon a n tan Alatala na yi boxi yire birin ma. ¹⁹ N tagi rasa luma ne n ma pama nun i gbe ma. Wo na kaabanako toma ne tina.» »

²⁰ Alatala a raba na ki ne. Xeerie naxa din Firawuna, nun a xa kuntigie ra. Misira boxi birin xun naxa rakana xeerie ra. ²¹ Firawuna naxa Munsa nun Haruna xili, a a fala e be, «Wo xa siga serexe bade wo Marigi Ala be Misira.» ²² Munsa naxa a yaabi, «Na mu lanma, barima muxu xa serexee mu rafan Misirakae ma. Xa muxu na serexe mooli ba Misirakae ya xori e naxee xonxi, e mu muxu magonoma xe? ²³ A lanma muxu xa xi saxan biyaasi raba gbengberenyi ma, muxu fa serexee ba muxu Marigi Alatala be, alo a muxu yamarixi ki naxe.»

²⁴ Firawuna naxa a fala Munsa be, «N fama wo bepinde, alako wo xa siga gbengberenyi ma serexee bade wo Marigi Alatala be. Kono wo naxa wo makuya a gbe ra. Yakosi, wo Ala maxandi n be.» ²⁵ Munsa naxa a yaabi, «N bara tin. N na mini i xonyi, n Alatala maxandima ne. Tina, xeerie makuyama ne Firawuna, a xa kuntigie, nun a xa pama ra. Kono i tan Firawuna, i naxa muxu madaxu. I naxa tondi Isirayila pama bepinde alako e xa serexee ba Alatala be.»

²⁶ Munsa to mini Firawuna xonyi, a naxa Alatala maxandi. ²⁷ Alatala naxa Munsa xa duba suxu. Xeerie naxa makuya Firawuna, a xa kuntigie, nun a xa pama ra. Hali keren mu lu naa. ²⁸ Kono Firawuna man naxa a xaxili xoxoxo, a mu tin Isirayila pama bepinde.

9

Mankane suuli nde: xurusee xa wuganyi

¹ Na temui Alatala naxa a masen Munsa be, «I xa siga Firawuna yire, i xa a fala a be, «Isirayilaka Marigi Alatala xa masenyi nan ya, “I xa n ma pama bepin, alako e xa siga n batude.” ² Xa i tondi e bepinde, i kankan e ma, ³ Alatala fama wuganyi jaaxi radinde i xa xurusee ma, alo soe, sofalee, joxomee, ningee, yexeee, nun si. ⁴ Alatala fama Isirayilakae xa goore nun Misirakae xa goore tagi rasade. Isirayilakae xa xurusee mu

wuganyi sɔtɔma. ⁵ Alatala bara nate tongo na rabama temui naxe, a falafe ra, “Tina, n fama na nan nabade.”»

⁶ Na kuye iba, Alatala a raba na ki ne. Misira goore birin naxa faxes, kono hali xuruse keren mu faxes Isirayilakae xa goore ya ma. ⁷ Firawuna naxa mixie xee na fe kolonde. E naxa a fala Firawuna be xuruse keren mu faxaxi Isirayilakae xa goore kui, kono a xaxili naxa xoxoxo, a man mu tin Isirayila jama bepinde.

Mankane senni nde: suurie

⁸ Na temui Alatala naxa a masen Munsa nun Haruna be, «Wo xa te xube rate Firawuna ya xori. ⁹ A findima xube ra naxan dinma Misira boxi birin na, a suuri ramini Misirakae nun e xa xurusee birin ma.»

¹⁰ E naxa te xube xanin Firawuna yire. Munsa naxa a woli koore ma, a fa suuri paaxie ramini mixie nun xurusee ma. ¹¹ Mandurulae yati mu no tide Munsa ya i suurie xa fe ra, naxee nu na Misirakae birin ma. ¹² Kono Alatala naxa Firawuna xaxili raxoxoxo, alako a naxa tin Munsa nun Haruna xui suxude, alo Alatala nu bara a masen Munsa be ki naxe.

Mankane solofere nde: balabalanyi

¹³ Na temui Alatala naxa a masen Munsa be, «Tina i xa kurun sigafe ra Firawuna yire, a fala a be, «Isirayila Marigi Alatala xa masenyi nan ya, “N ma jama bepin, e xa siga n batude, ¹⁴ xa na mu a ra n gbaloe mooli birin naminima i tan, i xa kuntigie, nun i xa jama ma n senbe ra. Na kui i fama a kolonde n maniye mu na dunipa bende fupi fari. ¹⁵ N nu noma gbaloe jaaxi raminide wo ma n senbe ra, naxan nu noma wo sontode, wo loe dunipa ma, ¹⁶ kono n bara wo lu dunipa alako n xa n senbe masen wo be, dunipa xa n xili kolon. ¹⁷ Han ya i kira bolonma n ma jama ya ra, i tondi e xa siga. ¹⁸ Na nan a ra, tina n fama ne balabalanyi magaaxuxi ragorode Misira ma, wo mu naxan mooli to kabi dunipa fole. ¹⁹ I xa i xa goore nun i xa se birin naso yire makantaxi kui, barima yi balabalanyi na bira, a mixi nun xuruse birin sontoma ne.”»

²⁰ Firawuna xa kuntigi ndee naxa gaaxu Alatala xa masenyi ya ra, e xulun e xa konyie nun e xa xurusee rasode yire makantaxi kui. ²¹ Kono naxee mu nu e joxoxo saxi Alatala xa masenyi xun ma, e naxa e xa konyie nun e xa xurusee lu tande.

²² Alatala naxa a masen Munsa be, «I belexe itala koore mabiri, balabalanyi xa bira mixi, xurusee, nun xee fari Misira boxi birin ma.» ²³ Munsa to a xa yisuxuwuri itala

koore ma, Alatala naxa seyamakɔnyi, galanyi, nun balabalanyi ragoro Misira boxi ma.²⁴ Balabalanyi masunbuxi te ra naxa goro e ma. Misira boxi mu nu na gbaloe mooli to kabi a fɔle.²⁵ Na balabalanyi naxa mixie nun xurusee magɔnɔ Misira boxi birin ma. A naxa xee nun wuri bilie fan kana.²⁶ Gosen boxi gbansan naxa ratanga na gbaloe ma, Isirayilakae nu na dennaxe.

²⁷ Firawuna naxa Munsa nun Haruna xili, a a fala e be, «Yi biyaasi, n bara yunubi raba. Nɔndi na Alatala nan be. N tan nun n ma pama bara tantan.²⁸ Wo xa Alatala madije, alako seyamakɔnyi nun balabalanyi xa pɔn. N bara tin wo bepinde, n mu kankanma wo ma sɔnɔn.»²⁹ Munsa naxa a fala a be, «N na mini taa kui, n Alatala maxandima wo be. Galanyi nun balabalanyi danma ne, alako i xa a kolon a Alatala nan gbe dunja ra.³⁰ Kɔnɔ n bara a kolon, i tan nun i xa kuntigie, wo mu gaaxuma Marigi Alatala ya ra sinden.»

³¹ Na balabalanyi nu bara sansi funden maniye nun gese futi kana, naxee mu nu mo sinden.³² Mengi nun a maniye tan mu kana, barima e tan temui mu nu a lixi.

³³ Munsa naxa mini Firawuna xɔnyi, a siga taa fari ma. A to a belexe itala Alatala maxandide, galanyi, balabalanyi, nun tune naxa dan.³⁴ Firawuna to na to, a man naxa yunubi sɔto, barima a tan nun a xa kuntigie naxa e xaxili raxɔrɔxɔ.³⁵ Na kui Firawuna mu tin Isirayilakae bepinde, alɔ Alatala a masenxi ki naxe Munsa saabui ra.

10

Mankanɛ solomasaxan nde: katoe

¹ Alatala naxa a masen Munsa be, «Siga Firawuna yire, barima n tan nan a xaxili nun a xa kuntigie xaxili raxɔrɔxɔ, alako n xa n ma tɔnxuma makaabaxie masen e be.² N gbaloe naxan dɔxɔma Misirakae ma, wo xa na fala wo xa die nun wo xa mamadie be, alako wo xa a kolon, n tan nan Alatala ra.»

³ Munsa nun Haruna naxa siga Firawuna xɔnyi, e a fala a be, «Isirayila Marigi Alatala xa masenxi nan ya, «I tondima i yete magorode n be han mun temui? I xa n ma pama bepin, e xa siga n batude.⁴ Xa i mu e bepin, tina n katoe radinma ne i xa boxi birin ma.⁵ E boxi gbaata makotoma ne, e sansi nun wuri bili birin donma ne balabalanyi mu naxee lixi.⁶ E fama sode i tan, i xa kuntigie, nun Misirakae birin xa banxie kui, alɔ wo benbae mu nu a toxi ki naxe kabi Misira fɔle.» » Munsa to ge na falade, a naxa a kobe so, a mini Firawuna xɔnyi.

⁷ Firawuna xa kuntigie naxa a fala a be, «Yi xeme won tɔɔroma han mun temui? I xa a xa pama bepin alako e xa siga e Marigi Alatala batude. Han ya i mu a kolon Misira na sɔntɔfe ne?»

⁸ Firawuna naxa Munsa nun Haruna xili, a a fala e be, «Wo siga, wo sa wo Marigi Alatala batu.» A man naxa e maxɔrin, «Ndee na sigafe wo ya ma?» ⁹ Munsa naxa a yaabi, «Muxu birin sigama ne: fonikee, forie, xeme, gin, muxu xa xurusee. Alatala xa sali xungbe na a ra.» ¹⁰ Firawuna naxa e yaabi, «Wo wama ne n xa a fala wo be, «Alatala xa wo kanta.» Xa n sa a lu wo xa siga, wo nun wo xa die, n a kolon wo fe kobi rabama ne. ¹¹ N mu tinma na ra. Xeme gbansan noma sigade Alatala batude, barima wo na nan maxɔrinxi.» A to ge na falade, Firawuna naxa e ker.

¹² Alatala naxa a masen Munsa be, «I belexe itala Misira boxi xun ma, katooe xa fa. E xa burexe xinde birin don balabalanyi mu naxee lixi.» ¹³ Munsa naxa a xa yisuxuwuri itala Misira boxi xun ma, Alatala fa foye ramini yanyi nun ke keren kui kelif sogetede. Na kuye iba, na foye nu bara fa katooe ra, ¹⁴ naxee din Misira boxi birin na. Katooe gbegbe naxa lu Misira yire birin. Han ya na fe maniy mu toxi, a man mu toma sɔnɔn. ¹⁵ E naxa boxi birin makoto han a ifɔɔɔ. E naxa burexe xinde nun wuri bogi birin don balabalanyi mu naxan lixi. Burexe xinde yo mu lu wurie nun sansie kɔn na Misira boxi ma.

¹⁶ Firawuna naxa Munsa nun Haruna xili mafuren. A naxa a fala e be, «N bara yunubi sɔto wo Marigi Alatala ra, n bara haake sɔto wo fan na. ¹⁷ Wo xa dije n ma, wo xa wo Marigi Alatala maxandi alako a xa yi tɔɔre ba n ma.» ¹⁸ Munsa naxa keli Firawuna yire, a naxa Alatala maxandi. ¹⁹ Alatala naxa turunnaade foye ramini, a katooe birin tutun sogegorode, a sa e rasin Xulunyumi Baa ma. Hali katooe keren mu lu Misira. ²⁰ Na dangi xanbi Alatala naxa Firawuna xaxili raxɔɔɔ, alako a naxa Isirayilakae bepin.

Mankane solomanaani nde: dimi

²¹ Na temui Alatala naxa a fala Munsa be, «I belexe itala koore ma, dimi binye xa sin Misira boxi ma.» ²² Munsa to na raba, dimi binye naxa sin Misira boxi birin ma. Xi saxan bun ma ²³ mixi mu no a boore tode, mixi mu no kelide a xɔnyi. Kɔno Isirayilakae nu sabatixi dennaxe, menni tan iyalanxi. ²⁴ Firawuna naxa Munsa xili, a a fala a be, «Wo xa siga Alatala batude. Wo noma wo xa die nun wo xa gin xaninde, kɔno wo xa wo xa xurusee tan lu be.» ²⁵ Munsa naxa a yaabi, «I xa tin muxu xa xurusee xanin muxu naxee

bama serexe ra muxu Marigi Alatala be. ²⁶ Muxu xa goore birin xa siga. Hali keren mu luma be. Ndee bama serexe nan na muxu Marigi Alatala be, kono muxu mu a kolon sinden xurusee mundun rawalima na kui, fo muxu xa so naa.»

²⁷ Na dangi xanbi Alatala naxa Firawuna xaxili raxoroxo, a mu tin e bepinde. ²⁸ Firawuna naxa a fala Munsa be, «Keli n xun ma! I yete ratanga tife ra n ya i sonon. Xa n i to be, n i faxama ne.» ²⁹ Munsa naxa a yaabi, «A xa raba alo i a fala ki naxe. I mu n toma sonon.»

11

Marakolonyi mankane fu nde ra: di singe faxe

¹ Alatala naxa a masen Munsa be, «N fama kaabanako donxoe ragorode Firawuna nun Misirakae ma. Na dangi xanbi, Firawuna wo bepinma ne, wo siga kerenyi ra. ² A fala pama be e xa e doxoore makula gbeti nun xeema ra.» ³ Alatala naxa a ragiri Misirakae xa tin Isirayilakae kide. Misira pama nun Firawuna xa kuntigie naxa gaaxu Munsa ya ra.

⁴ Munsa naxa a fala, «Alatala xa masenyi nan ya, «Koe tagi n Misira boxi igirima ne, ⁵ di singe birin fa faxe kelife Firawuna xa di singe ma, a sa doxo konyi ginee xa di singe ma. Firawuna tan mangeya fima a xa di ma, konyi gine tan taami rafalama, kono e xa di singe birin fama ne faxade. Hali Misirakae xa xurusee xa di singee faxama ne. ⁶ Na temui Misira wa xui nde mema ne, e mu naxan mooli mexi temui dangixie, e mu naxan mooli mema temui naxee sa fama. ⁷ Kono Isirayilakae xonyi, hali bare keren mu wonwonma. Na kui wo xa a kolon n tagi rasa luxi Misirakae nun Isirayilakae tagi. ⁸ Na temui i xa kuntigie birin fama ne e xinbi sinde n bun ma, e a fala n be, a n tan nun n ma pama birin xa mini e xa boxi kui. N na ge na rabade, n sigama ne.» » Munsa to ge na falade, a naxa keli Firawuna xun ma, a xonoxi ki fanyi ra.

⁹ Alatala nu bara a masen Munsa be, «Firawuna mu a tuli matima wo ra. Na kui n nan n ma kaabanakoe xun masama ne Misira boxi kui.» ¹⁰ Munsa nun Haruna nu bara na kaabanakoe birin naba Firawuna ya xori, kono Alatala bara Firawuna xaxili raxoroxo, a mu tin Isirayilakae xa mini a xa boxi kui.

12

Sayamaleke Dangi Sali

¹ Alatala naxa a masen Munsa nun Haruna be Misira boxi ma, ² «Yi kike naxan ya, yi nan findima wo be je kike singe ra. ³ Wo xa a fala Isirayila jama birin be, yi kike xi fu, denbaya yo denbaya xa yexee keren soto. ⁴ Xa denbaya nde xurun, e mu noma na ra, e xa kafu e doxo boore ndee ma alako yexee keren xa e birin nali. ⁵ Na yexee xa findi xeme ra, naxan bara je keren soto, lanyuru yo mu naxan ma. Xa na mu a ra, wo noma si fan nawalide. ⁶ Wo xa a ragata han na kike xi fu nun naani. Na loxe Isirayila denbaya birin xa e gbe kon naxaba soge dula temui. ⁷ Wo xa a wuli maso naade gbanyi nun a seetie ma, a donma banxi naxan kui. ⁸ Na sube xa gan te ra, wo xa a don na ke ra taami lebinitare nun burexe xone ra. ⁹ Wo naxa a don a gantare ra, wo naxa a jin ye ra. Wo xa a birin gan a fanyi ra beenu wo xa a xaba. A xunyi, a sanyie, nun a furingee xa gan temui keren. ¹⁰ Na sese naxa xi han geesege. Xa nde luxi, wo xa na woli te xora. ¹¹ Wo xa a don wo tagi ixirixi, wo xa sankirie soxi wo sanyie, a nun wo xa yisuxuwuri suxuxi wo belexe ra. Wo xa a don mafuren mafuren. Alatala xa Sayamaleke Dangi Sali serexe na a ra.»

¹² «Na ke ra, n Misira boxi isama ne, n di singe birin faxe mixie nun xurusee ya ma. N Misira xa alae paxankatama ne. N tan nan Alatala ra. ¹³ N na na wuli tonxuma to wo xa naade ma, n dangima ne menni xun ma. Kasare yo mu wo lima, n Misira boxi ratonma temui naxe.»

¹⁴ «Na loxe xa findi sali xungbe nan na wo be Alatala xa binye bun ma. Wo xa na sali raba je yo je Alatala xa yaamari ki ma. ¹⁵ Na sali waxati wo xa taami lebinitare don xi solofere bun ma. Sali folo loxe, wo xa lebini birin namini wo xa banxie kui. Mixi yo naxan taami lebini daaxi donma na xi solofere bun ma, na kanyi xa ramini Isirayila jama ya ma. ¹⁶ Na sali loxe singe nun na sali loxe solofere nde, wo xa wo malan Alatala xa binye bun ma. Na loxe firinyie, wo naxa wali yo raba bafe donse rafalafe ra.»

¹⁷ «Wo xa yi Taami Lebinitare Sali raba, barima n wo xa jama ramini Misira boxi ra na loxe ne. N bara wo yamari wo xa yi sali raba je yo je abadan. ¹⁸ Kike singe, xi fu nun naani, nunmare folo temui, wo naxa taami yo don bafe taami lebinitare ra han a xi moxopen nun keren, a nunmare temui. ¹⁹ Na xi solofere bun ma, lebini yo naxa to wo xonyi, barima xone nun Isirayilaka birin naxan lebini donma na waxati bun ma, a raminima ne Isirayila jama ya ma. ²⁰ Wo naxa taami lebini daaxi don dede.»

²¹ Munsa naxa Isirayila fori birin xili, a a fala e be, «Wo xa siga xuruse nde sode wo xa denbayae be. Wo xa e kon naxaba Sayamaleke Dangi Sali serexe ra. ²² Wo na ge

xuruse kɔn naxabade, wo xa a wuli maso naade gbanyi nun naade seetie ma hisopi burexe ra. Mixi yo naxa mini a xa banxi kui han geesege.²³ Alatala na Misira boxi isa di singe faxafe ra, a dangima ne banxie xun ma, wuli na naxee naade gbanyi nun a seetie ma. A mu tinma kanari yo xa so wo xɔnyi.²⁴ Wo nun wo xa die xa yi yaamari ratinme je yo je abadan.²⁵ Wo na so boxi kui Alatala naxan laayidixi wo be, wo xa yi sali raba a ki ma.²⁶ Wo xa die na wo maxɔrin, ‹Yi sali munse masenma won be,›²⁷ wo xa e yaabi, ‹Sayamaleke Dangi Sali serexe nan a ra. Won na rabama Alatala be naxan dangi Isirayilakae xa banxie xun ma Misira, alako e xa ratanga, Misirakae tan xa faxa.› »

Isirayila pama naxa a suyidi Alatala be.²⁸ Isirayilakae naxa na yaamari ratinme alo Alatala a masenxi Munsa nun Haruna be ki naxe.

Mankanɛ fu nde: di singe faxe

²⁹ Kɔe tagi Alatala naxa di singe birin faxa Misira boxi kui, kelifɛ Firawuna kibanyi kanyi xa di singe ma, a sa dɔxɔ geelimani xa di singe ma. A naxa xuruse xa di singe fan birin faxa.³⁰ Na kui Firawuna naxa keli kɔe ra, a tan, a xa kuntigie, nun Misirakae birin, e fa e wa xui rate, barima banxi keren mu lu faxe mu ti dennaxe.

³¹ Na kɔe ra Firawuna naxa Munsa nun Haruna xili, a a fala e be, ‹Wo nun Isirayilakae, wo mini n ma pama ya ma. Wo siga, wo sa Alatala batu, alo wo nu wama a xɔn ma ki naxe.›³² Wo xa wo xa xurusee xanin, alo wo a falaxi ki naxe. Wo siga! Wo xa duba n fan be.›³³ Misirakae nu gbataxi Isirayilakae xa siga. E nu a fala, ‹Xa e mu sigama, won birin fama ne sɔntode!›³⁴ Na nan a ra Isirayilakae naxa taami ramulanxi mafilin e xa dugie kui, beenu taami xa te. E naxa taami nun taami ramulanse dɔxɔ e xun ma, e fa siga.

³⁵ Isirayilakae naxa gbeti, xeema, nun dugie makula Misirakae ma alo Munsa a fala e be ki naxe.³⁶ Alatala naxa a ragiri Misirakae xa tin Isirayilakae waxɔnfe ra. Na kui Isirayilakae naxa se gbegbe sɔto Misirakae yi ra.

Isirayilakae minife Misira

³⁷ Isirayilakae naxa keli Ramesesi, sigafe Sukɔti. Xeme wulu keme senni nu na, bafe ginɛe nun dimɛdie ra.³⁸ Mixi gbetɛe fan naxa bira e fɔxɔ ra, a nun gɔɔre gbegbe mooli birin.³⁹ E naxa taami gan, na taami lebinitare ramulanxi ra, e faxi naxan na e xun ma kelifɛ Misira. Na taami mu nu texi, barima Misirakae to e keri, e mu no fande rafalade.

⁴⁰ Isirayilakae nu bara je keme naani je tongo saxan naba Misira. ⁴¹ Na je keme naani je tongo saxan jon loxoce yati, Alatala xa jama birin mini Misira boxi ra na ne.

⁴² Alatala to na koe radangi Isirayila jama raminife ra Misira, a lanma Isirayilakae birin xa na koe xungbilenyi radangi Alatala matoxofe ra je yo je. ⁴³ Alatala naxa yi seriye so Munsa nun Haruna yi ra Sayamaleke Dangi Sali xa fe ra, «Mixi yo naxa na serexe don naxan mu findixi Isirayilaka ra. ⁴⁴ Wo xa konyi sunnaxie noma a donde, ⁴⁵ konon wo xa walike naxee kelixi yire gbete, e naxa a don. ⁴⁶ Na serexe xa don banxi nan kui, wo naxa a sube xanin tande, wo naxa a xori yo gira. ⁴⁷ Isirayila jama birin xa Sayamaleke Dangi Sali raba. ⁴⁸ Xa wo xa xope nde wama Sayamaleke Dangi Sali rabafe Alatala xa binye bun ma, fo a xa xeme birin sunna a xa denbaya kui. Xa a bara na raba, a noma na sali rabade alo Isirayilakae. Konon sunnatatee mu noma a donde. ⁴⁹ Lasiri nun xope birin na na seriye bun ma.»

⁵⁰ Isirayilaka birin naxa a raba, alo Alatala Munsa nun Haruna yamarixi ki naxe. ⁵¹ Na loxoce yati, Alatala naxa Isirayilakae ramini Misira boxi ra, e lanxunde ki ma.

13

Di singe seriye

¹ Alatala naxa a masen Munsa be, ² «Wo xa di singe birin fi n ma, a findi mixi ra, a findi xuruse ra. N tan nan gbe na Isirayilakae birin xa di singee ra.»

³ Munsa naxa a fala jama be, «Wo xa ratu to loxoce ma sali ra, barima Alatala senbe nan wo raminixi Misira boxi ma konyiya kui. Wo naxa lebini yo don na loxoce. ⁴ Wo minixi to Abibi kike nan na. ⁵ Alatala na wo raso boxi kui, a naxan laayidixi wo benbae be, Kanaankae, Xitikae, Amorikae, Hiwikae nun Yebusukae sabatixi dennaxe, xipe nun kumi xeleva boxi naxan ma, wo xa Taami Lebinitare Sali raba na kike ra. ⁶ Na sali waxati wo xa taami lebinitare gbansan don xi solofere bun ma. Na xi solofere nde, wo xa sali raba Alatala xa binye bun ma. ⁷ Na xi solofere bun ma taami lebinitare nan donma. Lebini yo naxa lu Isirayilaka nde xonyi. ⁸ Na loxoce wo xa yi sali xa fe fatanfasi wo xa die be, wo fa a fala, «N yi sali rabama, barima Alatala n raminixi Misira boxi ra.» ⁹ Yi sali luma ne wo be alo tonxuma naxan saxi wo belexe ma, xa na mu tonxuma naxan saxi wo tigi ma, alako wo naxa neemu Alatala xa seriye ma. ¹⁰ Wo xa yi sali raba a waxati je birin na.»

¹¹ «Alatala na wo raso Kanaankae xa boxi ma, a a fi wo ma alo a laayidixi wo tan

nun wo benbae be ki naxe, ¹² wo xa wo xa di xeme singe birin fi Alatala ma, a nun wo xa xurusee xa di xeme singe. Wo xa di xemema singe birin findixi Alatala nan gbe ra. ¹³ Wo noma yexee xa na mu a ra si fide wo xa sofale xa di singe joxoe ra, xa na mu a ra wo xa a kobe gira, a xa faxe. Wo xa wo xa di singe fan xun sara yexee ra. ¹⁴ Xa a sa li wo xa di nde wo maxorinma a wo yi fe rabama fe naxan ma, wo xa a yaabi, «Alatala senbe nan won naminixi konyiya kui Misirakae yi ra. ¹⁵ Firawuna to tondi muxu bepinde muxu xa siga, Alatala naxa Misira di singe birin faxe mixie nun xurusee ya ma. Na nan a ra won xurusee xa di singe birin fima Alatala ma serexe ra, a nun won ma di xeme singe birin xun sarama ne yexee ra.» ¹⁶ Na luma ne wo be alo tonxuma naxan saxi wo belexe ma, xa na mu tonxuma naxan saxi wo tigi ma, barima Alatala senbe nan wo raminixi Misira boxi ma konyiya kui.»

Kelifa Misira

¹⁷ Firawuna to Isirayila jama bepin, Alatala mu e xun ti Filisita boxi kira ra, hali na kira nan to sooneya, barima a a fala ne, «Xa jama gere lima kira xon ma, e nate masarama ne, e fa gbilen Misira.» ¹⁸ Na kui Alatala naxa jama ya rafindi gbengberenyi kira ma Xulunyumi Baa mabiri. Isirayilakae naxa mini Misira e xa geresosee ra e yi ra. ¹⁹ Munsa naxa Yusufu xorie fan xanin, barima Yusufu nu bara Isirayila xa die rakali na fe ma, a falafe ra, «N a kolon, Alatala fama ne wo malide. Na temui wo xa n xorie xanin wo xun ma yire gbete.»

²⁰ Isirayilakae naxa keli Sukoti, e sa yonkin Etama gbengberenyi foloxi dennaxe. ²¹ Alatala nan nu tixi e ya ra. Yanyi ra a naxa e rapere nuxui ra, koe ra a naxa e rapere te dexe ra koore ma, naxan nu kuye iyalanma e be. Na ki e nu noma jerede koe nun yanyi ra. ²² Loxo yo loxo na nuxui nu tixi e ya ra yanyi ra, na te fan nu tixi e ya ra koe ra.

14

Misirakae Isirayilakae sagatafe

¹ Alatala naxa a masen Munsa be, ² «A fala Isirayilakae be e xa gbilen, e xa fa yonkin Pi Haxiroti mabiri ra, Migidoli nun baa tagi. E xa lu baa de ra Baali Sefon ya ra. ³ Firawuna a mapoxunma ne, a Isirayilakae bara loe gbengberenyi mabiri. ⁴ N Firawuna xaxili raxoroxoma ne, alako a xa bira wo foxo ra. Na kui n fama matoxoe sotode Firawuna nun a xa soorie saabui ra. Misirakae fama ne a kolonde a n tan nan na Alatala ra.» Isirayilakae a raba na ki ne.

⁵ Misira mange nun a xa kuntigie to a kolon, a Isirayilakae bara siga, e naxa nate masara, a falafe ra, «Won munse rabaxi yi ki? Won to Isirayilakae bepinx, e mu walima won be sɔnɔn!» ⁶ Firawuna naxa yaamari fi soe xa xiri a xa ragise ra, sɔɔrie xa malan yire keren. ⁷ A naxa sɔɔri ragise fanyi keme senni sugandi, sɔɔri ragise naxan birin na Misira fa bira e fɔxɔ ra. Sɔɔri kuntigi nu bakixi e birin kui. ⁸ Alatala naxa Misira mange Firawuna xaxili raxɔɔxɔ, a fa bira Isirayilakae fɔxɔ ra, naxee nu sigafe xun nakeli kui. ⁹ Firawuna nun a xa sɔɔri birin naxa bira Isirayilakae fɔxɔ ra e xa soe nun e xa sɔɔri ragisee ra. Misirakae naxa e li baa de ra, e nu yonkinxi dennaxe, Pi Haxirɔti mabiri ra, Baali Sefon ya ra.

¹⁰ Firawuna to makɔɔe e ra, Isirayilakae naxa e ya rakeli, e naxa Misirakae to fa ra. E naxa gaaxu ki fanyi ra, e fa e mawa Alatala be. ¹¹ E naxa a fala Munsa be, «I won naminixi Misira bɔxi ra munfe ra? Yakɔsi won faxama ne gbengberen yire. A mu nu fisa won xa faxa Misira? ¹² Won nu na Misira bɔxi ma temui naxe, muxu a fala i be, «Muxu walife Misirakae be, na fisa muxu be dine faxafe ra gbengberenyi ma.» » ¹³ Munsa naxa pama yaabi, «Wo naxa gaaxu, wo xa limaniya. To wo fama Alatala xa kisi tode. Misirakae naxee yi ki, wo mu e toma sɔnɔn. ¹⁴ Alatala nan gere soma wo be. Wo sabari.»

¹⁵ Alatala naxa a masen Munsa be, «I mawafe n be munfe ra? A fala Isirayilakae be, e xa ti kira xɔn ma. ¹⁶ I xa yisuxuwuri rate, a itala baa xun ma, alako baa xa rabi, Isirayilakae xa igiri bɔxi xaraxi ra. ¹⁷ N Misirakae xaxili raxɔɔxɔma ne, alako e xa bira wo fɔxɔ ra. Na kui n matɔxɔe sɔtɔma Firawuna, a xa sɔɔrie, a xa sɔɔri ragisee, nun a xa soe ragimae saabui ra. ¹⁸ N na ge matɔxɔe sɔtɔde Firawuna, a xa sɔɔri ragisee, nun a xa soe ragimae saabui ra, Misirakae a kolonma ne a n tan nan na Alatala ra.»

¹⁹ Ala xa maleke naxan nu na sigafe Isirayila pama ya ra, a naxa gbilen e xanbi ra. Nuxui fan naxa keli e ya ra, a fa ti e xanbi ra ²⁰ Misirakae nun Isirayilakae tagi. Na nuxui naxa a niya Misirakae xa lu dimi kui, Isirayilakae tan xa lu naiyalanyi kui. E mu no e makɔɔede e boore ra na kɔe ra.

²¹ Munsa to a belexe itala baa xun ma, Alatala naxa baa tutun kɔe birin na foye xungbe ra kelifɛ sogetede. A naxa kira xaraxi ramini baa tagi. ²² Isirayilakae dangima dennaxe, baa yee naxa malan e yire fanyi ma nun e kɔɔla ma. ²³ Misirakae naxa e sagata. Firawuna xa soe, a xa sɔɔri ragisee, nun a xa soe ragimae birin naxa bira e fɔxɔ ra baa tagi. ²⁴ Subaxe ma, Alatala naxa a ya rasiga Misira xa sɔɔrie ma kelifɛ koore ma, te nun nuxui na dennaxe, a fa e ifu. ²⁵ A naxa a ragiri sɔɔrie xa ragisee sanyie xa ba na, e xa

ɲɛɛ xa xɔɔxɔ. Na kui, Misirakae naxa a fala, «Won xa won gi Isirayilakae ma, barima Alatala nan na e xa gere sofe.»

²⁶ Alatala naxa a masen Munsa be, «I belexe itala baa xun ma, ye xa radin Misirakae, e xa soori ragisee, nun e xa soe ragimae xun na.» ²⁷ Munsa to na raba subaxe ma, baa naxa gbilen a yire. Misirakae nu na e gife temui naxe, Alatala naxa ye dusu e birin xun na. ²⁸ Ye naxa Firawuna xa soorie, a xa ragisee, soe ragimae, nun a xa soori birin makoto. Naxee nu biraxi Isirayilakae foxo ra baa kui, nee birin naxa loe.

²⁹ Kono Isirayilakae naxa baa igiri kira xaraxi xon ma. Ye nu malanxi e yirefanyi ma nun e koola ma. ³⁰ Na loxo Alatala naxa Isirayilakae ratanga Misirakae ma. Isirayilakae naxa Misirakae furee to baa de ra. ³¹ Isirayilakae to Alatala senbe to a naxan nawalixi Misirakae xili ma, e naxa gaaxu Alatala ya ra, e fa e taxu Alatala nun a xa xera Munsa ra.

15

Isirayilakae xa beeti

¹ Na dangi xanbi Munsa nun Isirayilakae naxa yi beeti ba Alatala be.
«N xa yi beeti ba Alatala be,
naxan xili gbo.

A bara soe nun a ragima madula baa ma.

² N senbe na Alatala nan na.

N a matoxoma beeti ra.

A bara findi n Nakisima nun n Marigi ra.

N tantui rasigama n benbae Marigi ma.

³ Senbema nan Ala ra.

A xili ne Alatala.

⁴ A naxa Firawuna xa soorie nun e xa ragisee rasin baa ma.

Firawuna xa kuntigie naxa madula Xulunyumi Baa ma.

⁵ Moronyie naxa e makoto,
e naxa goro a botini ma alo geme.

⁶ Alatala, i senbe magaaxu.

I bara no i yaxuie ra,

i bara no i matandimae ra.

⁷ I xa mangeya senbe magaaxu.

I boje na te, e ganma ne
alo sexe te soxi naxan na.

⁸ I xa foye naxa Xulunyumi baa rabi,
kira xaraxi naxa lu a tagi.

Moronyie naxa te alo banxi xale.
Ye tilinxi naxa xoroxo.

⁹ Isirayila yaxui a fala ne,
«N birama ne e foxo ra, han n e li,
n e harige tongoma ne, han n wasa.
N e sontoma ne n ma santidegema ra.»

¹⁰ Kono i tan naxa foye ramini,
baa naxa e radula.

E naxa goro ye xora alo yoxui.

¹¹ Alatala, i maniyε mu na adama xa alae ya ma.

I xa seniyenyi fiixe,
i xa nore gbo,
i xa kaabanakoe wuya.

I maniyε na minden?

¹² I to i senbe ramini,
boxi naxa e gerun.

¹³ I xa jama naxan xun saraxi,
i fama e xun tide i xa xanunteya ra,
naxan mu jonma abadan.

I fama e xun tide i xa lingira seniyenxi yire i senbe ra.

¹⁴ Namane gbetee na na me,
e gaaxuma ne.

Filisitakae boje minima ne.

¹⁵ Edon yareratie ifuma ne,
Mowaba mangee serenma ne.

Limaniya birin bama ne Kanaan jamanε yi ra.

¹⁶ Alatala, gaaxui nun kontofili e suxuma ne,

e de balanma ne i senbe ra,
han i xa pama dangi,
i naxan xun saraxi.

¹⁷ I fama ne i xa pama rasabatide i xa geya fari,
i dennaxe sugandixi i xa lingira seniye nxi ra.

¹⁸ Alatala xa mangeya buma abadan.»

¹⁹ Firawuna xa soe, a xa soori ragisee, nun a xa soe ragimae to goro baa ma,
Alatala naxa baa radin e xun ma, kono Isirayilakae naxa dangi kira xaraxi ra baa tagi.

²⁰ Haruna maagine Mariyama, naxan findixi namijonme gine ra, a naxa boote
maxa. Gine gbetee naxa fare boron. ²¹ Mariyama naxa yi beeti ba,

«Wo beeti ba Alatala be,
barima a xili gbo.

A bara soe nun e ragimae radula baa ma.»

²² Munsa naxa Isirayilakae xun ti Suru gbengberenyi rakelife Xulunyumi Baa de
ra. E naxa e jere xi saxan gbengberenyi ma, e mu ye soto. ²³ E naxa Mara li, kono e mu
no Mara ye minde barima na ye nu xono. «Mara» wama «xone» nan falafe. ²⁴ Nama naxa
sonxo Munsa ma, «Won ye soto ma minden?» ²⁵ Munsa naxa a de rawa Alatala xon ma.
Alatala naxa wuri mooli nde masen Munsa be, a fa na woli ye xora, ye xone naxa ba.
Alatala to ge e xaxili matode menni, a naxa yi saate tongo e be, ²⁶ «Xa wo wo tuli mati n
xui ra a fanyi ra, xa wo bira n ma tinxinyi foxo ra, xa wo n ma yaamari birin suxu, wo n
ma seriye birin binya, n tan, wo Marigi Alatala, n mu fure jaaxi yo ragoroma wo ma, alo
n naxan nagoro Misirakae ma. N tan nan Alatala ra, naxan wo rayalanma.»

²⁷ E to dulonyi fu nun firin nun tugi bili tongo solofere li Elimi, e naxa yonkin
menni.

16

Isirayilakae xa sonxo

¹ Isirayila pama birin naxa keli Elimi, sigafe ra Turusinina gbengberenyi ma,
naxan na Elimi nun Sinayi tagi. E biyaasi naxan naba keli Misira han Sini gbengberenyi
ma, na naxa bu kike firin a nun xi fu nun firin. ² Menni Isirayila pama naxa sonxo Munsa
nun Haruna ma, ³ a falafe ra, «Munfe ra Alatala mu a ragirixi won xa faxa Misira boxi
ma? Menni sube nun taami nu na won yi ra naxan won lugama, kono be yi gbengberen

yire, won fama faxade kaame nan na.»

⁴ Alatala naxa a masen Munsa be, «N fama taami ragorode wo be kelifa koore ma. Nama xa mini, e xa a matongo geesege e naxan donma loxoere keren kui. N fama e xaxili matode, xa e jere ma n ma yaamari nan ma. ⁵ A xi senni nde, e xa xi firin daaxi matongo.»

⁶ Munsa nun Haruna naxa a fala Isirayila jama be, «To nunmare wo a kolonma ne, a Alatala nan wo ramini Misira boxi ra. ⁷ Tina geesege, wo fama Alatala xa kaabanako tode. A bara wo xa sonxoere me. Munfe ra wo wama sonxoere muxu tan ma? ⁸ To nunmare Alatala wo kima sube ra, geesege a wo kima taami ra, han wo luga. Wo mu sonxoxi muxu tan xa ma de. Wo sonxoxi Alatala nan ma, naxan bara wo xui birin me.»

⁹ Munsa naxa a fala Haruna be, «A fala Isirayila jama be, e xa e yete masen Alatala be, barima a bara e xa sonxoere me.» ¹⁰ Haruna nu woyenfe Isirayila jama be temui naxe, e naxa e ya rafindi gbengberenyi ma, e fa Ala xa nore to mini ra nuxui kui. ¹¹ Alatala naxa a masen Munsa be, ¹² «N bara Isirayilakae xa sonxoere me. A fala e be, «Nunmare wo sube donma, geesege wo lugama taami ra. Na kui wo a kolonma ne, a n tan nan na wo Marigi Alatala ra.» »

¹³ Nunmare yati xonie naxee xili konkolae naxa radin e yonkinde birin ma. Na kuye iba xini naxa lu e yonkinde rabilinyi ma. ¹⁴ Na xini to ba na, se nde naxa lu boxi fari alo balabalanyi. ¹⁵ Isirayilakae to na to, e naxa e boore maxarin, «Munse ya?». E mu a kolon se yo na ki. Munsa naxa a fala e be, «Taami nan a ra, Alatala naxan fixi wo ma baloe ra.» ¹⁶ Alatala xa yaamari nan ya, «Wo xa sigaati ya solofere tongo mixi birin be naxan na wo xonyi.» ¹⁷ Isirayilakae a raba na ki ne. ¹⁸ E to a maniya, naxee gbe nu gboxi, a mu dangi ye, naxee fan gbe nu xurunxi, a e ralixi ne. Kankan naxa baloe xasabi soto naxan a ralima.

¹⁹ Munsa naxa a fala e be, «Yi baloe naxa raxi han geesege.» ²⁰ Konondee mu Munsa xui suxu, e naxa a ragata han geesege. Kulie naxa bira a i, a xiri paaxi naxa mini. Munsa naxa xono na kanyie ma.

²¹ Geesege yo geesege, kankan nu fa a gbe donse matongo, konon soge na te, a donxoere naxan luxi, na xunu a i. ²² A xi senni nde, e naxa xi firin daaxi matongo, sigaati ya fu nun naani mixi keren be. Yareratie naxa na dentege sa Munsa be. ²³ Munsa naxa a fala e be, «Alatala naxe a tina malabui loxoere nan a ra, loxoere seniyenxi Alatala be. Wo xa nde gan, wo xa nde satun. A donxoere naxan na lu, wo xa na ragata han tina geesege.» ²⁴ E

to nde ragata han gɛɛsɛgɛ, alɔ Munsa a yamari e bɛ ki naxɛ, e naxa a to kuli mu biraxi a i, a man mu bɔrɔ. ²⁵ Munsa naxa a fala e bɛ, «Wo xa a don to, barima to nan malabui lɔxɔɛ ra Alatala xa binyɛ bun ma. Na donse mu goroma bɔxi ma to. ²⁶ Wo xa a matongo xi senni bun ma, kɔnɔ a xi solofere nde, wo mu sese toma, barima malabui lɔxɔɛ na a ra.»

²⁷ A xi solofere nde, mixi ndee mini nɛ na donse matongode, kɔnɔ e mu sese to. ²⁸ Na kui Alatala naxa a masen Munsa bɛ, «Wo n ma yaamari nun n ma seriye matandima han mun tɛmɛi? ²⁹ Wo xa a kolon, n tan Alatala nan malabui lɔxɔɛ seriye masenxi wo bɛ. Na nan a ra, xi senni nde wo donse xi firin daaxi sɔtɔma. A solofere nde wo naxa siga dɛdɛ, wo birin xa lu wo xɔnyie, malabui lɔxɔɛ nan a ra.» ³⁰ Na kui jama naxa e malabu na lɔxɔɛ solofere nde ma.

³¹ Isirayilakae naxa na donse xili fala «maan», naxan nu wama a falafe, «Munse a ra?». A maniya funden xɔri ra, a fiixɛ, a jɔxun alɔ digiyanyi. ³² Munsa naxa a fala, «Alatala xa yaamari nan yi ki, «Wo xa yi maan sigaati ya solofere ragata, alako wo bɔnsɔɛ naxee fama baride e xa donse to n naxan nagoroxi wo ma gbengberenyi ma, n to wo ramini Misira bɔxi ra.» »

³³ Na kui Munsa naxa a fala Haruna bɛ, «I xa maan sigaati ya solofere sa sesase kui, i xa a dɔxɔ hɔrɔmɔlingira yire, alako a xa findi tɔnxuma ra wo bɔnsɔɛ bɛ naxee fama baride.» ³⁴ Haruna naxa na sesase dɔxɔ Alatala xa hɔrɔmɔlingira yire saate kankira ya ra, alako a xa ragata alɔ Alatala a masenxi Munsa bɛ ki naxɛ. ³⁵ Isirayilakae maan don nɛ jɛ tongo naani bun ma, han e sa so Kanaan bɔxi ma, si gbetɛ sabatixi dennaxɛ. ³⁶ Na sigaati ya solofere naxan nu rawalima na maan maniyafe ra, a dɔxɔ fu findixi busali keren nan na.

17

Turusinina fanye

¹ Isirayila jama birin naxa keli Sini gbengberenyi ma, e fa biyaasi raba alɔ Alatala nu luma e yamari ra ki naxɛ. E to Refidimi li, e naxa yonkin naa, kɔnɔ e mu ye min daaxi sɔtɔ. ² Nama naxa ti Munsa kanke, e a fala a bɛ, «Ye so muxu yi ra.» Munsa naxa wɔyen e bɛ, «Wo tima n kanke munfe ra? Wo na Alatala matofe munfe ra?»

³ Ye xɔli nu bara gbo jama ra, e nu fa a fala Munsa bɛ, «Munfe ra i muxu ramini Misira bɔxi ra? I wama nɛ muxu xa denbaya nun muxu xa xurusee xa faxa ye

xoli ra gbengberenyi ma?»

⁴ Munsa naxa a de rawa Alatala xon ma, a falafe ra, «N noma munse rabade yi pama ra? A gbe mu luxi e xa n faxa.» ⁵ Alatala naxa Munsa yaabi, «I xa dangi pama ya ra, a nun Isirayila fori ndee. I xa i xa yisuxuwuri tongo, i Nili xure garin naxan na, i ti e ya ra. ⁶ N tima i ya ra, fanye seeti ma, naxan na Xorebe geya yire. I xa na fanye garin. Na kui ye minima ne pama naxan minma.» Munsa naxa a raba na ki Isirayila forie ya xori. ⁷ A naxa na yire xili sa Masa nun Meriba, na nan na ki «matoe nun sonxo», barima Isirayilakae sonxo ne Munsa ma menni, e man naxa Alatala mato na a falafe ra, «Alatala na won tagi ba, ka a mu won tagi?»

⁸ Amalekikae naxa fa Isirayila gerede Refidimi. ⁹ Munsa naxa a fala Yosuwe be, «Xeme ndee mayegeti, wo fa mini Amalekikae gerede. Tina, n tima ne geya fari Ala xa yisuxuwuri ra n yi.» ¹⁰ Yosuwe naxa Amalekikae gere alo Munsa a yamarixi ki naxe. Munsa, Haruna, nun Xuru naxa te geya fari. ¹¹ Munsa to a belexe itema, Isirayila senbe nu gboma, konko a to a belexe igoroma, Amalekikae senbe tan nu gboma. ¹² Munsa belexe to binya a ra, e naxa geme nde tongo a doxoma naxan fari. Haruna nun Xuru naxa lu Munsa seeti ma, a koola nun a yirefanyi ma, a belexe ratefe ra han soge dula temui. ¹³ Na kui Yosuwe naxa no Amaleki nun a xa soorie ra santidegema xepenxie ra.

¹⁴ Alatala naxa a masen Munsa be, «Yi taruxui sebe alako pama xa ratu a ma. I man xa a fala Yosuwe be, «N fama ne Amalekikae xa fe jonde yi dunipa ma.» » ¹⁵ Munsa naxa yire nde rafala serexebade ra, a naxa na yire xili sa, «Alatala nan xun nakeli fima n ma,» ¹⁶ barima a nu bara a xaxili ti Alatala xa mangeya ra. Munsa naxa a a fala, «Alatala Amalekikae gerema ne abadan.»

18

Yetiro sigafe Munsa yire

¹ Munsa bitanyi Yetiro, naxan findixi Madiyan serexedube ra, a naxa a me Alatala naxan nabaxi Munsa nun a xa pama Isirayila be, e ramnife ra Misira boxi kui. ² Munsa nu bara a xa gine Sipora nun a xa di firinyi xee Yetiro xonyi. ³ Munsa xa di singe nu xili Gerisomi, barima na xili nu wama a falafe e gbe xui, «Xope nan n na yi boxi ma.» ⁴ Boore nu xili Eliyeseri, barima na xili nu wama a falafe e gbe xui, «N baba Marigi bara n mali, a bara n natanga Firawuna xa santidegema ra.»

⁵ Munsa bitanyi Yetiro naxa Munsa xa gine nun na xa die xanin Munsa yire

gbengberenyi ma, a nu yonkinxi dennaxe, Ala xa geya mabiri. ⁶ Yetiro nu bara xεera xεe Munsa xon a falafe ra, «N tan, i bitanyi Yetiro, n na fafe i xa gine nun a xa di firinyie ra.» ⁷ Munsa naxa mini a bitanyi ralande. A naxa a xinbi sin a ya ra, a man fa a sunbu. E to e boore xεebu, e naxa so Munsa xonyi. ⁸ Munsa naxa fee ya ba a bitanyi be, Alatala naxan birin naba Firawuna nun Misirakae ra Isirayila xa fe ra. A naxa Isirayila xa jaxankate birin fala a be, a nun Alatala e rakisixi ki naxe.

⁹ Yetiro naxa seewa Alatala xa hinne ra a naxan masenxi Isirayila be, a e bafe ra Misirakae yi ra. ¹⁰ Yetiro naxa a fala, «Tantui na Alatala be, naxan wo ba Misirakae nun Firawuna yi ra, naxan Isirayila jama raminixi e xa noe bun ma! ¹¹ N bara a kolon Alatala senbe gbo dangi adamadie xa alae mooli birin na, barima a bara jama igoro naxan nu bara a yete rafisa Isirayilakae be.» ¹² Na temui Munsa bitanyi Yetiro naxa serexe gan daaxi nun serexe gbetee ba Alatala be. Haruna nun Isirayila fori birin naxa na serexe don Munsa bitanyi yire Alatala xa horomolingira kui.

¹³ Na kuye iba, Munsa naxa a magoro, a xa kiiti sa Isirayilakae tagi.>Nama naxa lu a yire kelifa geesege han nunmare. ¹⁴ A bitanyi to a to Munsa naxan birin nabama jama be, a naxa a fala a be, «I na munse rabafe yi jama be? Munfe ra kiiti wali birin dɔxɔxi i keren nan xun ma kelifa geesege han nunmare?» ¹⁵ Munsa naxa a bitanyi yaabi, «>Nama faxi n yire Alatala xa kiiti nan fende. ¹⁶ Galanbui na lu mixie tagi e fama n yire n xa kiiti sa Alatala xa yaamarie nun a xa seriye ra.»

¹⁷ Munsa bitanyi naxa a fala a be, «A mu lanma i xa a raba na ki ne» ¹⁸ I nun i xa mixie, wo taganma ne. I keren mu noma yi kote xaninde. ¹⁹ I xa i tuli mati n ma marasi ra. Ala xa i mali. I tan xa findi jama xui madangima ra Alatala be. ²⁰ I lan ne i xa e xaran Alatala xa seriye nun a xa yaamarie ra. I xa Ala xa kira masen e be, e birama naxan fɔxɔ ra. ²¹ Mixi kendee sugandi jama ya ma, nondi fale naxee gaaxuma Alatala ya ra, naxee riba xonxi. I xa nee findi yareratie ra jama xun ma xunlande ki ma. Nde xa lu mixi wulu keren xun ma, boore mixi keme xun ma, boore mixi tongo suuli xun ma, boore mixi fu xun ma. ²² Nee xa kiiti birin sa mixie tagi, fo kiiti nde naxee xɔrɔxɔ. E xa na kiiti xɔrɔxɔe masen i tan be. Na ki, kote mu dɔxɔma i keren xun. ²³ Xa i Ala xui suxuma, na rabafe noma findide sooneya ra wo birin be, bɔnesa fa lu jama be e xonyi. ²⁴ Munsa naxa a bitanyi xui suxu, a birin naba alo a falaxi ki naxe. ²⁵ Munsa naxa mixi kendee sugandi Isirayilakae ya ma, a fa e dɔxɔ jama xun na xunlande ki ma, mixi wulu keren xun ma, mixi keme xun ma, mixi tongo suuli xun ma, nun mixi fu xun ma. ²⁶ E nu

kiitisa wali raba temui birin, fo kiiti xɔrɔxɔe e nee nan masenma Munsa be. ²⁷ Na temui Munsa naxa a bitanyi bepin. Yetiro naxa gbilen a xa bɔxi ma.

19

Isirayila pama sofe Turusinina ma

¹ Kike saxan yati to dangi, kelife e mini Misira bɔxi ra temui naxe, Isirayilakae naxa so Turusinina gbengberenyi ma. ² E to keli Refidimi, e naxa so Turusinina gbengberenyi ma, e yonkin geya ya tagi. ³ Munsa naxa te geya fari sigafe Alatala yire. Alatala naxa a xili geya fari, a a masen a be, «I xa a fala Isirayilakae Yaxuba bɔnsɔe be, ⁴ <Wo bara a to, n fe naxan nabaxi Misirakae ra. Wo bara a kolon n faxi wo ra n yire ki naxe. A luxi alɔ wo bakixi xɔni nan fari. ⁵ Xa wo n xui suxu n ma saate rakamalife ra, wo fama ne findide n ma pama sugandixi ra si birin ya ma. N gbe nan dunja birin na, ⁶ kɔnɔ wo tan findima n ma si seniyeɲi nan na, naxan serexedube wali rabama.> I xa na masenyi ti Isirayilakae be.»

⁷ Munsa naxa goro, a fori birin xili, a fa Alatala xa masenyi birin dentege e be. ⁸ Nama birin naxa a fala, «Muxu Alatala xui birin suxuma ne.»

Munsa naxa pama xa yaabi dentege Alatala be. ⁹ Alatala naxa a masen Munsa be, «N fama woyende i be nuxui kui pama ya xori, alako e xa lanlanteya sa i ma temui birin.»

Munsa naxa pama xa masenyi dentege Alatala be. ¹⁰ Alatala naxa a masen Munsa be, «A fala pama be, e xa e yete raseniyeɲ to nun tina. E xa e xa dugie fan xa. ¹¹ E xa redi tina bora ya ra, barima n fama ne gorode pama birin ya tode ra na lɔxɔe Turusinina geya fari. ¹² I xa naaninyi sa geya rabilinyi birin ma, i fa a fala pama be, <Mixi yo naxa te geya fari, mixi yo naxa a makore a ra, barima naxan yo din a ra, na kanyi faxama ne.> ¹³ Wo naxa wo belexe din na kanyi ra, wo a magɔnɔ geme ra han a faxa. Xa na mu, wo xa a masɔxɔ xalie ra. A findi daalise ra, a findi mixi ra, a lanma a xa faxa. Mixi mu lanma a xa te geya fari, fo sara xui na mini mixi sugandixi ndee fa te.»

¹⁴ Munsa to goro geya ma pama yire, a naxa maraseniyeɲi fe fala e be, e xa e yete nun e xa dugie raseniyeɲ. ¹⁵ A naxa a fala pama be, «Wo xa wo yete yailan tina bora ya ra. Sade fe naxa lu wo tan nun wo xa ginɛ tagi.»

¹⁶ A xi saxan lɔxɔe, galanyi nun seyamakɔnyi naxa bira bɔxi ma geesege, nuxui ifɔɔrɔxi naxa to geya ma. Sara xui naxa mini senbe ra. Nama birin naxa gaaxu. ¹⁷ Munsa

naxa pama mati geya lanbanyi Ala xui ramede. ¹⁸ Tuuri nu na Turusinina geya ma, barima Alatala nu bara goro te tagi. Na tuuri nu tema ne, alo fiili na gan. Geya nu serenma senbe ra. ¹⁹ Sara xui nu sigama gbo ra. Na temui Munsa naxa woyen, Ala naxa a yaabi.

²⁰ Alatala naxa goro Turusinina geya fari, a fa Munsa xili. Munsa to te naa, ²¹ Alatala naxa a masen a be, «I xa goro, i xa a fala pama be, e naxa wuruntun n tofe ra de, xa na mu a ra, a gbegbe faxama ne. ²² Hali serexedube naxee e makorema n na, e xa e yete raseniyen, alako n naxa fa e faxa.» ²³ Munsa naxa a fala Alatala be, «Nama mu noma tide Turusinina geya fari, barima i jan bara muxu yamari naaninyie xa sa geya rabilinyi ma, pama xa lu e xati ma.» ²⁴ Alatala naxa a masen a be, «I xa goro sinden Haruna foxo ra. Na temui wo firin xa te. Serexedubee nun pama naxa te de, xa na mu a ra, e faxama ne.» ²⁵ Munsa naxa goro pama yire, a fa na maseniyi ti e be.

20

Ala xa seriye fu

¹ Na temui Alatala naxa yi maseniyi ti: ² «N tan Alatala nan wo Marigi Ala ra, naxan wo ramini Misira konyiya kui.»

³ «Wo naxa ala gbetee batu bafe n tan na.»

⁴ «Wo naxa kuye yo yailan naxan misaalixi se nde ra, naxan toma koore nun boxi ma, xa na mu naxan luma ye nun boxi bun ma. ⁵ Wo naxa wo mafelen na se moolie be, wo naxa e batu, barima n tan wo Marigi Alatala, n mu wama n firin nde xon. Naxee n xonma, n nee bonsoe ratonma ne han e tolontolonyie, xa na mu a ra e tolobitee xa die. ⁶ Kono mixi naxee n xanuma, e bira n ma seriye foxo ra, n hinnema e ra xanunteya kui abadan.»

⁷ «Wo naxa n xili findi wo dei sigi ra, barima n tan Alatala mu dipema mixie ma, naxee na fe mooli rabama.»

⁸ «Wo xa ratu malabui loxe ma, wo xa a binya. ⁹ Wo noma wali birin nabade xi senni bun ma, ¹⁰ kono na xi solofere nde findima malabui loxe ra wo Marigi Alatala xa binye bun ma. Wo naxa wali yo raba na loxe, wo tan, wo xa die, wo xa konyie, wo xa xurusee, nun wo xa xone. ¹¹ Alatala dunija nun se birin daa xi senni nan bun ma. A to ge na ra a naxa a malabu a xi solofere nde. Na nan a xeexi, Alatala naxa barake sa na malabui loxe ma, a findi loxe seniyenxi ra.»

¹² «Wo xa wo baba nun wo nga binya. Na kui wo xa simaya xon kuyama ne boxi ma, wo Marigi Alatala naxan fima wo ma.»

¹³ «Wo naxa mixi faxesa.»

¹⁴ «Wo naxa yene raba.»

¹⁵ «Wo naxa mupe ti.»

¹⁶ «Wo naxa wo boore topepe.»

¹⁷ «Wo naxa mila wo boore xa harige ma, alo a xa banxi, a xa gine, a xa konyie, a xa ninge, xa na mu a xa sofale.»

¹⁸ Nama to na galanyi, seyamakonyi, nun tuuri to geya fari, e fa sara xui me, e naxa seren gaaxui ra. E naxa makuya menni ra, ¹⁹ e fa a fala Munsa be, «I tan xa woyen muxu ra, Alatala xui won faxama ne.» ²⁰ Munsa naxa a fala pama be, «Hali wo mu gaaxu. Ala na wo matofe, alako wo xa gaaxu a ya ra, wo xa yunubi lu na.» ²¹ Nama naxa lu yire makuye, konso Munsa tan naxa siga na nuxui foroxi yire Alatala nu na dennaxe.

²² Alatala naxa a masen Munsa be, «I xa yi masenyi ti Isirayilakae be, <Wo bara a to, n bara woyen wo ra kelifa koore ma. ²³ Wo naxa kuye yo yailan gbeti nun xema ra naxan luma n seeti ma. ²⁴ Wo xa serexebade yailan n be bende ra. Wo xa xurusee ba serexe gan daaxi nun xanunteya serexe ra. Wo na n xili binya, n barake sama ne wo ma. ²⁵ Xa wo sa serexebade tima n be game ra, wo naxa a ti game masolixie ra, barima na a niyama a xa findi se seniyentare ra. ²⁶ Wo naxa n ma serexebade ite, xa na mu a ra serexedube xa donma kuye bunyi mabama ne.> »

21

Konyiya seriye

a nun faxe nun maxone joxoe

¹ I xa yi yaamarie masen Isirayilakae be. ² Xa wo konyi sara naxan findi Isirayilaka ra, a xa wali wo be je senni, konso a solofere nde wo xa a bepin barima a xunsare bara jon. ³ Xa a sa li wo nu bara na konyi nun a xa gine sara, wo xa e firin birin bepin je solofere nde. ⁴ Xa konyi kanyi nan gine so a xa konyi yi ra, a fa di bari, na gine nun a xa die luma konyi kanyi yi ra. Xeme gbansan nan bepinma. ⁵ Xa na konyi fa a fala, «N marigi, n ma gine, nun n ma die rafan n ma, n mu wama xoreyafe,» ⁶ a marigi xa a dentege Ala be. Na temui a xa a tuli tunba soxome ra naade wuri ma. Na nan a masenma na konyi bara lu a marigi xa yaamari bun ma a xa dunipeigiri birin kui.

⁷ Xeme na a xa di gine mati konyi ra, gine xoreya ki mu luma alo xeme xoreya ki. ⁸ Xa na gine mu rafan a marigi ma, naxan nu wama a findife a xa gine ra, a lanma a xa lu a xun xa sara. A mu daxa a xa a mati mixi gbete ma, barima a bara mee a ra. ⁹ Xa a wama a fife a xa di ma gine ra, a lanma a xa a suxu alo a xa di gine yati. ¹⁰ Xa a sa gine gbete tongo, a naxa sese ba a xa gine singe xa donse, a xa sosee, nun a xa sole ra. ¹¹ Xa a mu na fe saxanyie rakamali a be, gine noma kelide a xon ma, a mu sese fi.

¹² Naxan na mixi bonbo han a naxa faxes, na kanyi lan a fan xa faxes. ¹³ Konso xa a mu a faxafe janigexi, Ala nan tun a ragirixi, a xa a xun taxu yire nde n dennaxe masenma wo be. ¹⁴ Konso xa a nu a faxafe janigexi ne koota nde ra, na kanyi mu noma a xun taxude n ma serexebade ra. Wo xa a faxes.

¹⁵ Naxan na a nga, xa na mu a baba bonbo, na lan ne a xa faxes.

¹⁶ Naxan na adamadi suxu, a xa a mati, na kanyi xa faxes hali a mu gexi na adamadi matide.

¹⁷ Naxan na a nga, xa na mu a baba danku, na kanyi lan ne a xa faxes.

¹⁸ Naxan na mixi maxonso gere kui, na kanyi mu suxuma xa mixi maxonsoxi mu faxaxi, ¹⁹ xa a noma kelide a xa sade ma, a jere a xa yisuxuwuri ra. Konso maxone ti tan lanma a xa kobiri ba na mixi maxonsoxi be han a gema yalande temui naxe.

²⁰ Naxan na a xa konyi faxes bonbo wuri ra, a lanma ne na kanyi xa paxankata. ²¹ Konso xa na konyi sa yalan beenu xi firin, a mu lanma konyi kanyi xa paxankata, barima na konyi findixi a gbe nan na.

²² Mixi naxee bonboma furi gine nde ra, e xa gere kui, na fa a niya gine xa di bari a waxati mu a lixi, konso a mu fe kana a ma, na geresoe xa kobiri nde ba gine be. Gine xa mori nun kiitisa xa nate tongo kobiri xasabi naxan bama. ²³ Konso xa a sa findi gbaloe ra, nii joxoe na nii nan na, ²⁴ ya joxoe na ya nan na, jinyi joxoe na jinyi nan na, belexe joxoe na belexe nan na, sanyi joxoe na sanyi nan na, ²⁵ ganyi joxoe na ganyi nan na, xabe joxoe na xabe nan na, maxone joxoe na maxone nan na.

²⁶ Naxan na a xa konyi bonbo han a ya naxa kana, a lanma a xa a xa konyi xoreya a xa ya kane joxoe ra. ²⁷ Naxan na a xa konyi jinyi gira, na kanyi lanma a xa a xa konyi xoreya a xa jinyi gire joxoe ra.

²⁸ Tuura naxan na mixi faxes, a lanma na tuura xa magonso han a faxes. A sube naxa don. Tuura kanyi mu paxankate yo sotoma na kui. ²⁹ Konso xa na tuura darixi na mooli raba ra, a kanyi a kolon konso a mu a xirima a fanyi ra, na kanyi yo, a xa tuura yo, e birin

xa magɔnɔ han e xa faxa. ³⁰ Kiitisa nɔma nate tongode na tuura kanyi xun sarama naxan na. ³¹ Na seriye keren nan nawalima hali tuura sa dimedi nan faxa. ³² Xa a sa li tuura fa mixi gbete xa konyi nde faxa, gbete kole tongo saxan nan fima na konyi marigi ma. Na tuura xa magɔnɔ han a faxa.

³³ Naxan na yili ge, xa na mu a rabi, a mu a de rakotoma, xa a sa li ninge xa na mu a ra sofale nde sa sin na yili kui, ³⁴ a lanma na kanyi xa na xuruse sare fi, xuruse faxaxi xa lu a be.

³⁵ Naxan ma tuura na sa a boore gbe faxa, na tuura baloxi xa mati, na sare nun na tuura faxaxi xa itaxun e boore tagi. ³⁶ Kɔnɔ xa a sa a li, na tuura darixi na mɔoli raba ra, a kanyi a kolon kɔnɔ a mu a xirima a fanyi ra, a lanma tuura baloxi kanyi xa a gbe fi tuura faxaxi kanyi ma, tuura faxaxi xa lu a tan be.

³⁷ Naxan na tuura xa na mu a ra yexee mupa, a sa a mati, xa na mu a ra, a faxa, a lanma na kanyi xa tuura suuli ragbilen na tuura keren jɔxɔe ra, xa na mu, yexee naani na yexee keren jɔxɔe ra.

22

Mupa se jɔxɔe

nun yaamari gbete

¹ Xa wo mixi suxu a mupe tife kɔe ra, a fa faxa wo yi bonbɔe ra, faxe kote mu dɔxɔma wo xun ma. ² Kɔnɔ xa wo na mɔoli raba yanyi ra, faxe kote dɔxɔma ne wo xun ma. Mupeti lanma a xa se mupaxie sare ragbilen, kɔnɔ xa a mu nɔma na ra, a gundi xa mati konyi ra alako mupe se sare xa fi. ³ Xa a sa li, na se mupaxi na a yi alo ninge, sofale, yexee, xa na mu a ra, a jipe ra, a e jɔndɔn firin nan fima a jɔxɔe ra.

⁴ Naxan na a xa xurusee bepin, a sa a boore xa xe kana, na kanyi lanma a xa a sare fi a xa xe bogi fanyi nan na.

⁵ Naxan na te sa jooge ganfe ra, kɔnɔ te fa mixi nde xa sansi malanxi gan, xa na mu a xa xe, na kanyi lanma a xa na se birin sare fi.

⁶ Xa mixi harige nde taxu a dɔxɔboore ra, kɔnɔ mixi fa na mupa, na mupeti xa na se sare firin nagbilen a jɔxɔe ra. ⁷ Kɔnɔ xa na mupeti mu to, se taxuxi naxan na, na xa a kali Ala xili ra kiitisamae yire, alako e xa a kolon a tan xa mu na harige tongoxi. ⁸ Xa se nde sa lu mixi yi ra alo ninge, sofale, yexee, dugi, xa na mu a ra se gbete, kɔnɔ mixi gbete fa a fala a tan nan gbe na a ra, e lanma e xa siga kiitisae yire. Kiiti kanama naxan

na, a xa na se sare dɔxɔ firin nagbilen a boore ma.

⁹ Xa mixi nde xuruse taxu a boore ra, alɔ sofale, ninge, xa na mu yexɛɛ, na xuruse fa faha, xa na mu a salonse nde fa gira, xa na mu mixi fa a muja, ¹⁰ a boore xa a kali Ala ra a mu a yi. Se kanyi xa la na ra, a xa diɲe na se lɔxi ma. ¹¹ Kɔnɔ xa na xuruse mupaxi na a xɔnyi nɛ, a ɲɔxɔɛ fima nɛ. ¹² Xa wulai sube nde nan fa a faha, a taxu naxan na, na xa a binbinyi masen xuruse kanyi bɛ seedɛɲɔxɔya ra. Na temui, a mu na ɲɔxɔɛ fima.

¹³ Xa mixi xuruse yofu a boore ma, xuruse fa a yetɛ maxɔnɔ, xa na mu a ra a faha xuruse kanyi xanbi, a yofuma xa a ɲɔxɔɛ fi. ¹⁴ Kɔnɔ xa fe nde na xuruse sɔtɔ a kanyi ya xɔri, a yofuma mu a ɲɔxɔɛ fima. Xa a sa li, a herixi nan a ra, heri masundi nan findima a ɲɔxɔɛ ra.

¹⁵ Naxan na gine dimedi futi kana naxan xa kote mu dɔxɔxi sinden, a lanma a xa a xa kote dɔxɔ alako a xa findi a xa gine ra. ¹⁶ Xa na gine baba mu tin a fide a ma, na futikane kɔbiri nan fima naxan lanma gine dimedi xa kote ma.

¹⁷ Mandurula gine lanma nɛ a xa faha.

¹⁸ Naxan yo yɛnɛ raba xuruse ra, a lanma a xa faha.

¹⁹ Naxan yo na serɛxɛ ba ala gbete bɛ, bafe Alatala ra, na kanyi lan nɛ a xa faha.

²⁰ Wo naxa xɔɲɛ tɔɔrɔ naxan fatan si gbete ra a sabati wo xɔnyi, barima wo fan nu na xɔɲɛya nɛ Misira bɔxi ma. ²¹ Wo naxa fu kaape gine nun kiridi ma. ²² Wo na fu nee ma, n e wa xui mema nɛ. ²³ N ma xɔnɛ tema nɛ wo xili ma, n wo faha santidegema ra. Wo xa gineɛ findima nɛ kaape gineɛ ra, wo xa die fan findima nɛ kiridie ra.

²⁴ Xa wo sa kɔbiri doni tɔɔrɔmixi nde bɛ n ma jama ya ma, wo naxa geenɛ yo fen a xun na alɔ doniti jaaxi ndee.

²⁵ Wo na wo boore xa dugi dɔxɔ sɛɛkɛ ra, wo xa a ragbilen a ma beenun soge xa dula, ²⁶ barima na keren peti nan a yi ra, a na nan felenma a ma. A na n xili, n a xui suxuma nɛ, barima kinikininte nan n na.

²⁷ Wo naxa n tan Ala bɛxu. Wo naxa wo xa jama mange danka.

²⁸ Wo naxa dugundi n kide wo xa xɛ bogie ra. Wo xa wo xa di singe birin fi n ma.

²⁹ Wo xa wo xa xuruseɛ xa di singee fi n ma. Wo xa e lu e nga fɔxɔ ra xi solofere. A xi solomasaxan nde, wo fa e fi n ma.

³⁰ Wo xa findi n ma jama seniyeɲxi ra. Wo naxa wulai sube don, sube gbete naxan faxaxi. Wo xa na mɔɔli fi baree ma.

Tinxinyi seriye

nun Isirayila xa salie

¹ Wo naxa mixi tɔɔɲeɣe, wo naxa wule seede ba mixi ɲaaxi be. ² Wo naxa bira ɲama waxɔnfe ɲaaxi fɔxɔ ra, wo naxa wule seede ba ɲama xa fe ra. Na mooli tinxinyi kanama ne. ³ Wo naxa mixi rafisa a boore be kiiti kui, hali a findi misikiine ra.

⁴ Wo na wo yaxui xa ninge lɔxi to, xa na mu a xa sofale, wo xa a xanin a xɔn ma. ⁵ Wo na wo yaxui xa sofale to, a biraxi kote xungbe bun ma, wo naxa a lu naa. Wo xa a mali.

⁶ Wo naxa seriye matandi tɔɔɔmixi makiitima temui naxe. ⁷ Wo naxa mixi tɔɔɲeɣe. Wo naxa a niya mixi tɔɔɲeɣexi xa faxa, barima n mu diɲema na mixi mooli ma. ⁸ Wo naxa tinxinyi kana kɔbiri ra, barima na a niyama ne seede xa dundu, tinxintɔe xa wɔyenyi xa mafindi.

⁹ Wo naxa xɔɲe tɔɔɔ naxan fatan si gbete ra. Wo tan yati bara na tɔɔɔ mooli kolon wo nu na Misira bɔxi ma temui naxe.

¹⁰ Wo xa sansi si, wo xa a xaba ɲe senni bun ma, ¹¹ kɔɔ a ɲe solofere nde, wo xa bɔxi lu na, a xa a malabu. Na temui sansi naxan fama bulade a yete ma, na noma findide Isirayila tɔɔɔmixie xa baloe ra. Burunyi subee fan xa balo na dɔnxɔe ra. Wo xa na raba wo xa weni nun wo xa oliwi bilie fan na.

¹² Wo xa wali birin naba xi senni bun ma, kɔɔ a xi solofere nde wo naxa wali yo raba alako wo xa ninge, wo xa sofale, wo xa konyi, nun si gbete mixi naxee na wo xɔnyi, e birin xa e malabu.

¹³ Wo xa wo ɲɔxɔ sa n ma yaamari birin xɔn ma. Wo naxa ala gbete batu, e xili ɲan naxa mini wo de i.

¹⁴ Ne yo ɲe wo xa sali saxan naba n ma binye bun ma. ¹⁵ Wo xa Taami Lebinitare Sali raba yi ki ne. Xi solofere naxee sugandixi Abibi kike kui, wo xa taami lebinitare gbansan don, alɔ n wo yamarixi ki naxe. Wo xa a raba na temui ne barima wo mini Misira bɔxi kui na kike nan na. Wo naxa n kuma na salie kui.

¹⁶ Wo xa Xe Xabe Sali naxan man xili Lɔxunyi Sali raba wo xa sansi bogi singee ra. Wo xa Bogi Ba Sali naxan man xili Bage Ti Sali raba ɲe ɲaɲɔnyi, wo na sansi bogi se raso temui naxe. ¹⁷ Xe me birin xa na sali saxan naba e Marigi Alatala xa binye bun ma

je birin kui.

¹⁸ Wo na xuruse ba serexe ra n be temui naxe, wo naxa taami lebini daaxi ba serexe ra a seeti ma de. Wo naxa n ma sali serexe sube ture ragata han geesege. ¹⁹ Wo xa sansi bogi fisamante ba wo xa sansi bogi singee ya ma n tan wo Marigi Alatala be, wo e xanin n ma horomolingira kui. Wo naxa si jin a nga xipe ye ra.

²⁰ N maleke tima ne wo ya ra, naxan wo makantama kira ra sigafe ra boxi ma n dennaxe yailanxi wo be. ²¹ Wo xa wo tuli mati a ra, wo xa a xui suxu. Wo naxa a matandi. A mu dipema wo xa matandi ma, barima n xili na a xun ma. ²² Kono xa wo wo tuli mati a ra, xa wo a xui birin suxu, n findima ne wo yaxuie yaxui ra, wo gerefae gerema ra.

²³ N ma maleke wo matima Amorikae, Xitikae, Perisikae, Kanaankae, Hiwikae, nun Yebusukae xonyi. N fama ne e birin sontode. ²⁴ Wo naxa suyidi e xa alae be, wo naxa e batu, wo naxa bira e foxo ra. Wo xa e xa kuyee kana, wo xa e xa geme masolixie magira. ²⁵ Wo xa wo Marigi Alatala batu. A barake sama ne wo xa taami nun wo xa ye ma. A wo xa fure yalanma. ²⁶ Gine furi mu kanama wo xa boxi ma, gine di baritare fan mu toma wo ya ma. N simaya kamalixi fima ne wo ma.

²⁷ N sie ragaaxuma ne wo ya ra n senbe ra. N e ifuma ne alako e xa e gi wo ya ra. ²⁸ N jurie rasanbama ne wo ya ra naxan Hiwikae, Kanaankae, nun Xitikae kerima. ²⁹ Kono n mu na rabama je keren kui, alako boxi naxa fa kana, wulai subee naxa fa wuya wo xili ma. ³⁰ N nee kerima a xuri xuri nan na wo ya ra, han wo wuya, wo fa noe soto boxi birin ma. ³¹ N wo xa naaninyi igboma ne keli Xulunyumi Baa ma han Baa Xungbe, kelifa Turusinina gbengberenyi ma han a sa doko Efirati xure xungbe ra. N mennikae sama ne wo sago, alako wo xa e keru. ³² Wo naxa saate yo tongo mennikae nun e xa alae be. ³³ Wo naxa lu e xa sabati wo xa boxi ma, xa na mu a ra e a niyama ne wo xa gbilen n foxo ra. E xa alae findima gantanyi nan na wo be.

24

Ala nun Isirayilakae xa saate

¹ Ala naxa a masen Munsa be, «Te n yire be geya fari, i tan, Haruna, Nadabo, Abihu, nun Isirayila forie mixi tongo solofere. Wo xa suyidi yire naxan makuya n na. ² Munsa, i gbansan xa makore n na, booree xa lu yire makuye. Nama fan naxa te i tan Munsa foxo ra.»

³ Munsa naxa Alatala xa masenyi nun a xa yaamari birin nadangi jama ma. Nama birin naxa a yaabi xui keren na, «Muxu Alatala xui birin suxuma ne.»

⁴ Munsa naxa Alatala xa masenyi birin sebe. Na kuye iba, Munsa naxa serexebade ti geya bunyi, a naxa geme tundenyi fu nun firin ti menni, naxee Isirayila bonsœ fu nun firinyi misaalixi. ⁵ A naxa Isirayila fonike ndee xee e xa serexe gan daaxie ba. E man xa tuuræ ba Ala be xanunteya serexe ra. ⁶ Munsa naxa na wuli tagi sa fepe die kui, a naxa na donxœ kasan serexebade ma. ⁷ A naxa saate kitaabui tongo, a a xaran jama birin be. E naxa a yaabi, «Muxu Alatala xui birin suxuma ne. Muxu a ratinmema ne.» ⁸ Munsa naxa na wuli tongo, a a kasan jama ma. A naxa a masen, «Saate wuli nan ya. Alatala yi saate nan tongoxi wo be a xa masenyi fari.»

⁹ Munsa naxa te, a tan nun Haruna, Nadabo, Abihu, nun Isirayila forie, mixi tongo solofere. ¹⁰ E naxa Isirayila Marigi Ala to. A nu tixi geme norœxi fari. ¹¹ Na Isirayila kuntigie naxa Ala to, konœ a mu e jaxankata na ma. E birin naxa e dege, e naxa e min.

¹² Alatala naxa a masen Munsa be, «Te geya fari n yire, i xa fa lu be sinden. N xa geme walaxee so i yi ra, n nan n ma seriye nun n ma yaamarie sebexi naxee ma. I xa Isirayilakæ xaran nee ra.» ¹³ Munsa nun a malima Yosuwe naxa te Ala xa geya ma. ¹⁴ Munsa naxa a fala forie be, «Wo xa muxu meme be. Muxu fafe. Haruna nun Xuru xa lu wo fe ma be. Xa fe nde bira a i wo tagi, wo xa a masen e be.» ¹⁵ Munsa to te geya fari, nuxui naxa dusu a xun na. ¹⁶ Alatala xa nœre naxa lu Turusinina geya xun na. Nuxui naxa geya makoto xi senni. A xi solofere nde, Alatala naxa Munsa xili na nuxui kui. ¹⁷ Alatala xa nœre nu luxi ne Isirayilakæ be, alo te xungbe geya fari. ¹⁸ Munsa to nu tema, a naxa so na nuxui kui, a naxa lu geya fari xi tongo naani kœ nun yanyi.

25

Horomolingira serexebade,

a teebili, nun a lanpui

¹ Alatala naxa a masen Munsa be, ² «A fala Isirayilakæ be, foniserelæ xa yi see mooli ba hadiya ra: ³ xee ma, gbeti, wure gbeeli, ⁴ gese gere daaxi, gese bulu daaxi, gese gbeeli, suwa dugi, dugi naxan soxœxi si xabe ra, ⁵ yexee kontonyi kiri naxee soxi a gbeeli ra, pirimui kirie, kasiya wuri, ⁶ ture naxan sama lanpui kui, labunde naxan sama ture seniye nxi nun surayi xun ma, ⁷ a nun geme tofanyi naxee findi serexedube xa donma kuye nun donma kanke raxunma se ra. ⁸ Isirayilakæ xa horomolingira ti n be, alako n xa

sabati e ya ma. ⁹ Wo xa na lingira nun a xa yirabase birin yailan alo n na masenma i be ki naxe.»

¹⁰ «E xa saate kankira yailan kasiya wuri ra. Na kankira xa kuya nongon firin nun a tagi, a xa igbo nongon keren nun a tagi, a xa ite nongon keren nun a tagi. ¹¹ I xa a kui nun a fari maso xeema ra. A de kiri fan xa yailan xeema ra. ¹² I xa a suxude digilinx naani rafala xeema ra a tunxun naanie ma, firin na seeti, firin na boore seeti ma.»

¹³ «I xa kasiya wuri kuye firin masoli, e maso xeema ra. ¹⁴ I xa e raso kankira suxude digilinxie kui, na kankira xaninma e tan nan ma. ¹⁵ E na raso naa, e naxa ba abadan.»

¹⁶ «N na saate tonxuma so i yi ra, i xa a sa na kankira kui. ¹⁷ I xa a derakote yailan xeema fanyi ra, naxan findima xunsare yire ra. A xa kuya nongon firin nun a tagi, a xa igbo nongon keren nun a tagi. ¹⁸ Maleke sawure firin xa yailan xeema xabuxi ra kankira derakote fari. ¹⁹ Malekee sawure nun kankira derakote xa findi keren na. ²⁰ Na maleke sawure firinyie xa ti e boore ya i, e gabutenyie italaxi, e xun sinxi xunsare yire.»

²¹ «I xa na kankira derakote sa a ma, naxan findixi xunsare yire ra. N na saate tonxuma so i yi ra, i xa a sa na kankira kui. ²² N nan n yete masenma i be menni ne, na saate kankira derakote fari, maleke sawure firinyie tagi. N yaamari birin soma i yi ra menni ne katarabi Isirayilakae ma.»

²³ «I xa teebili nde yailan kasiya wuri ra, naxan kuya nongon firin, a igbo nongon keren, a ite nongon keren nun a tagi. ²⁴ I xa xeema fanyi maso a ma, a nun a de kiri ma. ²⁵ Xebenyi nde xa sa na de kiri bun ma naxan igbo suxui keren a nun a tagi. Xeema xa sa na fan de kiri ma. ²⁶ I xa a suxude digilinx naani rafala xeema ra a tunxun naanie ma, naxee ilanma a sanyie ra ²⁷ na xebenyi bun ma. Wuri kuyee xa so nee kui teebili xaninfe ra. ²⁸ Na wuri kuyee xa masoli kasiya wuri ra, xeema xa maso e ma. Nee nan findima teebili tongose ra. ²⁹ Piletie, tonbilie, pootie, nun paani naxee sama na teebili ma, naxee rawalima serexe yeerama daaxi xa fe ra, nee birin xa yailan xeema fanyi nan na. ³⁰ Taami fan xa sa na teebili ma temui birin, naxan findixi serexe ra n be.»

³¹ «I xa lanpui dɔxɔse nde yailan xeema fanyi xabuxi ra. A sanyi, a bili, a salonyie, nun lanpui dɔxɔde naxee maniya sansi fugee ra, na birin xa findi keren na. ³² Salon senni xa mini lanpui dɔxɔse bili ma, saxan seeti keren, saxan boore seeti. ³³ Tonbili saxan xa lu na salon senni birin xun ma. E xa maniya sansi bogi ra naxan dɔxɔxi a burexee nun a fugee tagi. ³⁴ Tonbili naani gbete xa lu lanpui bili ma. E fan xa maniya sansi bogi ra

naxan dɔxɔxi a burɛxɛe nun a fugee tagi. ³⁵ Na salon firin firin dɔxɔ saxanyie bun ma naxee kelixi a bili ma, a sama ne mɛnnie fan ma. ³⁶ Na tɔnbilie nun lanpui salonyie xa findi keren na, e xa yailan xɛema fanyi xabuxi ra.»

³⁷ «I xa lanpui solofere yailan, i xa e dɔxɔ e dɔxɔdee ma alako e dexe xa yare iyalan. ³⁸ I xa wuki xabase nun xube sase yailan xɛema fanyi ra. ³⁹ Xɛema naxan nawalima lanpui dɔxɔse nun lanpui yirabase yailanfe ra, na xa findi xɛema kilo tongo saxan nun naani nan na. ⁴⁰ I xa na birin naba alo n a masenxi i be ki naxe geya fari.»

26

Hɔrɔmɔlingira tife

¹ «I xa Ala xa hɔrɔmɔlingira yailan suwa dugi fu ra, naxee raxunmaxi gese mɔoli saxan na, gese gere daaxi, gese bulu daaxi, nun gese gbeeli. Na gese xa malekee sawure ramini dugie ma. A xa tofan ki fanyi. ² Dugi birin xa kuya nɔngɔn mɔxɔɔnɛn nun solomasaxan, a xa igbo nɔngɔn naani. E kuye nun e igboya xa lan. ³ Dugi suuli xa dege e boore ra, dugi suuli gbete fan xa dege e boore ra. Na kui na dugi fu bara findi dugi firin na. ⁴ I xa gese gere daaxi dege na dugi singe de kiri ma, a nun na dugi firin nde de kiri ma. ⁵ I xa gese tongo suuli dege na firinyi de kiri ma alako e birin xa lan e boore ma. ⁶ Na dangi xanbi i xa suxuse tongo suuli yailan xɛema ra, i fa na dugi firinyie ralan e boore ra na suxusee ra. Na nan a niyama hɔrɔmɔlingira xa findi dugi keren na.»

⁷ «I xa dugi fu nun keren sɔxɔ si xabe ra, naxee Ala xa hɔrɔmɔlingira makotoma. ⁸ Dugi keren xa kuya nɔngɔn tongo saxan, a xa igbo nɔngɔn naani. Na dugi fu nun kerenyi birin xa lan. ⁹ I xa dugi suuli dege e boore ra, e xa findi dugi keren na. Na dugi senni naxee luxi, i xa e fan dege e boore ra. Na dugi senni nde singanma banxi yatagi nan xun ma. ¹⁰ I xa gese tongo suuli dege na dugi singe ra, a nun na dugi firin nde ra. ¹¹ Na dangi xanbi i xa suxuse tongo suuli yailan wure gbeeli ra, i fa na dugi firinyie ralan e boore ra na suxusee ra. Na nan a niyama na birin xa findi dugi keren na naxan Ala xa hɔrɔmɔlingira makotoma. ¹² Na dugi xa mayigboe kepa ma dɔnxɔe tagi singanma banxi nan xanbi ra. ¹³ Na dugi xa kuye kepa ma ki naxe, nɔngɔn keren nan luma na seeti firinyie ma, alako hɔrɔmɔlingira xa makoto.»

¹⁴ «Na dangi xanbi i xa makotose gbete yailan yɛxɛe kontonyi kiri ra, naxan soxi a gbeeli ra. I man xa makotose gbete yailan pirimui kiri ra.»

¹⁵ «I xa kasiya wuri xaba xe benyie ra hɔrɔmɔlingira tima naxee ma. ¹⁶ Kankan xa

kuya nongon fu, a xa igbo nongon keren nun a tagi. ¹⁷ Suxuse firin xa lu hɔrɔmɔlingira xebenyi birin ma e kafuma e boore ma naxee ra. ¹⁸ Xebenyi mɔxɔɲen nan tima hɔrɔmɔlingira yirefanyi ma. ¹⁹ Sanbunyi gbeti daaxi tongo naani nan sama na xebenyi mɔxɔɲen bun ma, xebenyi keren, sanbunyi firin. E xa lu xebenyi suxusee fɛ ma. ²⁰ Xebenyi mɔxɔɲen nan tima hɔrɔmɔlingira kɔɔla fan ma, ²¹ a nun e sanbunyi gbeti daaxi tongo naani, xebenyi keren, sanbunyi firin. ²² Xebenyi senni nan tima hɔrɔmɔlingira xanbi ra sogegorode mabiri. ²³ I xa xebenyi firin yailan tuxuie be hɔrɔmɔlingira xanbi ra, ²⁴ naxee fuge nun lanbanyi lanma e boore ma, e xiri fuge ra se digilixi ra. Na tuxui firinyi xa yailan na ki nɛ. ²⁵ Na birin lanma xebenyi solomasaxan nan ma, a nun e sanbunyi gbeti daaxi fu nun senni, xebenyi keren, sanbunyi firin.»

²⁶ «I xa wuri suuli yailan kasiya wuri ra, hɔrɔmɔlingira xebenyie tima naxee ma. Suuli rawalima seeti ma, ²⁷ suuli rawalima boore seeti ma, suuli rawalima hɔrɔmɔlingira xanbi ra sogegorode mabiri. ²⁸ Wuri naxan luma a tagi, na dangima xebenyie nan xun ma, a keli seeti singe a sa dɔxɔ boore ra. ²⁹ Na xebenyie, nun na wurie, nun se digilixie wuri soma naxee kui, i xa na birin maso xɛema ma. ³⁰ I xa na hɔrɔmɔlingira ti alo n i yamarixi ki naxɛ geya fari.»

³¹ «I xa suwa dugi yailan gese gbeeli nun gese bulu daaxi ra. Malekɛ sawurɛɛ xa dege na ma, a xa tofan ki fanyi. ³² I xa a gbaku kasiya wuri naani ma naxee masoxi xɛema ra, e tixi gbeti sanbunyie ma. Suxuse naxee dugi xirima wurie ma, nee fan xa maso xɛema ra. ³³ I na ge dugi gbakude na suxusee ra, i xa saate kankira dɔxɔ a xanbi ra. Na ki, na dugi luma na yire firin tagi ra, naxan xili yire seniyeɲxi a nun naxan xili yire seniyeɲxi fisamante. ³⁴ I xa saate kankira rakoto a derakote ra yire seniyeɲxi fisamante kui. Na derakote se findixi xunsare yire nan na. ³⁵ I xa teebili tan dɔxɔ yire gbete kui, naxan xili yire seniyeɲxi, a lu kɔɔla mabiri. Teebili xa dɔxɔ kɔɔla ma, lanpui dɔxɔse xa lu a ya ra yirefanyi ma.»

³⁶ «I xa suwa dugi gbete yailan gese gere daaxi, gese bulu daaxi, nun gese gbeeli ra hɔrɔmɔlingira sode. I xa a masɔxɔ a fanyi ra, a xa tofan. ³⁷ I xa a gbaku wuri suuli ma naxee yailanxi kasiya wuri ra, e masoxi xɛema ra, e tixi gbeti sanbunyie ma. Suxuse naxee dugi xirima wurie ma, nee yailanxi wure gbeeli ra.»

nun hōrōmōlingira lanpui ture

¹ «I xa serexebade yailan kasiya wuri ra, naxan kuya nōngon suuli, a igbo nōngon suuli, a ite nōngon saxan. ² I xa feri naani yailan a tuxui birin ma, naxee findixi se keren na serexebade ra. I xa wure gbeeli maso na birin ma. ³ I xa a yirabase birin yailan wure gbeeli ra, alo xube sasee, pelie, pootie, sube soxosee, nun tundee te sama naxee kui. ⁴ I xa se nde yailan wure gbeeli ra naxan sama te xun ma, sube sama naxan fari. I xa suxuse digilinxie wure gbeeli daaxi sa a tuxui ma, ⁵ alako a xa gbaku serexebade kui a tagi. ⁶ I xa wuri kuyee yailan kasiya wuri ra wure gbeeli masoxi e ma. ⁷ E rasoma suxuse digilinxie naanie nan kui serexebade seeti firinyie ma a xanife ra. ⁸ I xa na serexebade yailan xebenyie nan na. Sese naxa lu a kui. I xa a yailan alo n i yamarixi ki naxe geya fari.»

⁹ «I xa hōrōmōlingira tete yailan yi ki ne: Tete xa kuya nōngon keme yirefanyi mabiri ra. I xa gere suwa dugi gbaku na ¹⁰ wuri mōxōpen ma, naxee tixi sanbunyi wure gbeeli daaxie ma. Na dugi suxusee xa yailan gbeti ra. ¹¹ Tete xa kuya nōngon keme koola fan mabiri ra. I xa gere dugi gbaku na wuri mōxōpen ma, naxee tixi sanbunyi wure gbeeli daaxie ma. Na dugi suxusee xa yailan gbeti ra. ¹² Tete xa igbo nōngon tongo suuli sogegorode mabiri ra. I xa gere dugi gbaku na wuri fu ma, naxee tixi sanbunyi wure gbeeli daaxie ma. ¹³ Tete xa igbo nōngon tongo suuli sogetede fan mabiri ra. ¹⁴ Gere dugi xa gbaku seeti ma wuri saxan ma, naxee tixi sanbunyi ma. Na xa kuya nōngon fu nun suuli. ¹⁵ Gere dugi gbete xa gbaku boore seeti ma wuri saxan ma, naxee tixi sanbunyi ma. Na fan xa kuya nōngon fu nun suuli. ¹⁶ Tete sode de xa yailan suwa dugi ra naxan masoxoxi gese gere daaxi nun gese bulu daaxi nun gese gbeeli ra. Na dugi xa nōngon xa mōxōpen soto. Na xa gbaku wuri naani ma, naxee tixi sanbunyi ma. ¹⁷ Wuri naxee tixi tete ma, e tixi e sanbunyi wure gbeeli daaxie ma. Dugi suxusee fan na e ma naxee yailanxi gbeti ra. ¹⁸ Na hōrōmōlingira tete kuyeya lanma nōngon keme nan ma, a igboya nōngon tongo suuli. Suwa dugi naxee gbakuxi na, e ite nōngon suuli. Tete wuri sanbunyi, ¹⁹ hōrōmōlingira yirabase birin, nun tete luuti xirima se naxee ma, na birin yailanma wure gbeeli nan na.»

²⁰ «I xa Isirayilakae yaamari, e xa fa oliwi ture fanyi ra i xon ma, alako hōrōmōlingira lanpuie xa dexe temui birin. ²¹ Haruna nun a xa die xa na lanpuie radexe, naxee na hōrōmōlingira kui, n i lima dennaxe, yire seniye nxi fisamante ya ra, dugi

gbakuxi dennaxe saate kankira ya ra. Na lanpuie xa yanba Alatala ya xori kelife koe han geesege. Seriyen nan na ki Isirayila bonsoe birin be naxan mu kanama abadan.»

28

Serexedube sosee

¹ «I xa i taara Haruna tongo Isirayilakae ya ma, a nun a xa die Nadabo, Abihu, Eleyasari, nun Itamari, e xa serexedube wali raba n be. ² I xa sose seniyenxie dege i taara Haruna be, naxee a xa kuntigiya nun a binye masenma. ³ I xa na wali so mixie yi ra n naxee kixi xaxili fanyi ra, naxan a niyama e xa fata. E xa Haruna xa serexedube sosee dege, alako a xa ti n ma serexedube wali ra. ⁴ Sosee nan yi ki e naxee degema: donma kanke raxunmase, donma kuye, tunki raxunmase, donma kuye bun magoroe masoxoxi, dugi naxan mafilinma e xunyi ma, nun beleti. E xa na sose seniyenxie yailan i taara Haruna nun a xa die be, alako e xa serexedube wali raba n be.»

⁵ «Donma degemae xa gese gere daaxi, gese bulu daaxi, gese gbeeli, gese xeema daaxi, nun suwa dugi malan. ⁶ E xa donma kuye dege gese gere daaxi, gese bulu daaxi, gese gbeeli, gese xeema daaxi, nun suwa dugi ra. A xa findi wali tofanyi ra. ⁷ E xa tunki raxunmase firin yailan, e xa e dege donma kuye ma. ⁸ Beleti fan xa yailan gese gere daaxi, gese bulu daaxi, gese gbeeli, gese xeema daaxi, nun suwa dugi ra alo donma kuye. ⁹ I xa onixi geme firin tongo, i fa Yaxuba xa die xilie masoli e ma ¹⁰ e bari ki ma. Xili senni masoli geme keren ma, xili senni masoli geme boore fan ma. ¹¹ Na geme masolixi firinyie findima wali tofanyi ra, alo sebeli masolima xurunde ma ki naxe. I xa xeema sa e rabilinyi ma, ¹² i fa nee dege tunki raxunmasee ma, e xa findi joxo rasiga see ra Isirayila die xa fe ma. Na ki Haruna fama e xilie ra n ya i, a xa findi dube ra. ¹³ I na xeema sa e rabilinyi ma, ¹⁴ i xa luuti die yailan xeema ra naxee gbakuma e rabilinyi ma.»

¹⁵ «I xa serexedube donma kanke raxunmase yailan a tofanyi ki ma. A findima kiiti se nan na. I xa a yailan gese gere daaxi, gese bulu daaxi, gese gbeeli, nun suwa dugi ra alo donma kuye yailanxi ki naxe. ¹⁶ A xa kuye nun a xa igboya xa findi suxui keren na. A xa findi dugi firin na, alako a xa findi yuba ra. ¹⁷ A xa raxunma geme tofanyie safe naani ra. Safe singe findima gemee nan na, naxee xili sariduwani, topasi, nun emerode. ¹⁸ Safe firin nde, esikaribukulu, safiri, nun diyaman. ¹⁹ Safe saxan nde, opale, agati, nun ametisite. ²⁰ Safe naani nde, kirosolite, onixi, nun yasipe. I xa xeema sa nee birin rabilinyi ma. ²¹ Isirayila xa die xilie xa masoli na geme fu nun firin ma, alo sebeli

masolima xurunde ma ki naxe. Kankan xili xa masoli geme nde ma. E findima Isirayila bɔnsɔɛ fu nun firinyi matɔnxuma se nan na. ²² I xa luuti die dege na donma kanke raxunmase ma, naxee yailanxi xɛema ra. ²³ I xa xurunde firin yailan xɛema ra, i xa e dege donma kanke raxunmase ma a de kiri firinyie ma a fuge ra. ²⁴ Na luuti xɛema daaxie xa xiri na xurunde firinyie ma, naxee degexi donma kanke raxunmase de kiri ma. ²⁵ I man xa na luuti firinyie xiri donma kuye tunki raxunmasee ma.»

²⁶ «I xa xurunde firin gbete yailan xɛema ra, i naxee degema donma kanke raxunmase de kirie ma a laabe ra. I xa nee dege donma kuye seeti ma. ²⁷ I xa xurunde firin gbete yailan xɛema ra, i naxee degema tunki raxunmasee lanbanyi ma, dennaxe ilanma beleti ra. ²⁸ Donma kanke raxunmase xa xiri donma kuye ma luuti gere daaxi ra naxan nasoma xurundee kui naxee degexi donma kanke raxunmase nun donma kuye ma.»

²⁹ «Haruna na so hɔrɔmɔlingira kui, Isirayila bɔnsɔɛ xili birin sebexi a xa donma kanke raxunmase ma, naxan saxi a kanke fari sondonyi yailanyi, a findima dube ra Alatala be Isirayila xa fe ra temui birin. ³⁰ I xa geme firin sa na donma kanke raxunmasee kui, naxan saxi Haruna kanke fari sondonyi mabiri. Nee findixi Ala waxɔnfe masen se ra. Haruna na so Alatala yire, a noma Alatala waxɔnfe kolonde Isirayilakae xa fe ra nee saabui ra.»

³¹ «I xa serɛɛdube xa donma kuye bun magoroe sɔxɔ gese gere daaxi ra. ³² I xa a xunyi rasode xaba a tagi, i xa na sode de masɔxɔ, alako boode yo naxa lu a ma. ³³ I xa a raxunma pirinti gere daaxi, bulu daaxi, nun gbeeli ra naxee misaalixi wuri bogi ra a rabilinyi birin ma. I xa tɔlɔnyi xɛema daaxie dege na pirintie tagi, ³⁴ alako tɔlɔnyi nde xa lu wuri bogi birin tagi na donma kuye bun magoroe sanbunyi birin ma. ³⁵ Haruna na a ragoro a ma a so temui nun a mini temui Alatala xa hɔrɔmɔlingira kui, na nan a ratangama faxe ma.»

³⁶ «I xa xɛema yailan, a sebe a ma, «Alatala gbe», ³⁷ i fa a xiri xunmase fari luuti gere daaxi ra, ³⁸ alako a xa gbaku a tigi ra. Xa a sa li serexe mu nu baxi seriye ki ma, na kote luma Haruna ma, kɔnɔ na sebeli naxan gbakuxi a tigi ra a niyama ne Alatala xa na serexe suxu.»

³⁹ «I xa donma kuye bun magoroe gbete dege Haruna be suwa dugi ra, a nun xunmase naxan sama a xun ma. I xa a xa beleti masɔxɔ a tofanyi ra. ⁴⁰ I xa donma kuye bun magoroe, beletie, nun xunmasee dege Haruna xa die fan be, naxee e binye nun e xa

kuntigiya masenma. ⁴¹ I xa i taara Haruna nun a xa die maxiri na ki, beenun i xa e ti n ma serexedube wali rabade. I xa ture maso e xunyi ma, i fa e masen jama be serexedubee ra. ⁴² I xa wantanyi dege suwa dugi ra naxan kelima e tagi han e tabe alako e xa sutura. ⁴³ Haruna nun a xa die xa na mooli so e makorema serexebade ra temui naxe, xa na mu a ra e na horomobanxi kui li temui naxe, n i lima dennaxe. Na nan a niyama e mu yunubi sotoma, e tangama ne faxe ma. Seriyen na a ra naxan mu kanama abadan Haruna nun a bomsae birin be.»

29

Mixi tife serexedube ra

nun serexee bafe

¹ «I na wa mixi tife n ma serexedube wali rabafe ra, i xa tuura nun yexee kontonyi firin tongo, lanyuru yo mu na naxee ma, ² a nun taami lebinitare, taami lebinitare ture masunbuxi naxan na, nun taami lebinitare xunxuri ture masoxi naxan ma. I xa na birin naba sansi xori luxutaxi ra. ³ I xa na taami birin sa debe kui, i a xanin horomolingira yire, a nun tuura, nun yexee kontonyi firin. ⁴ I xa Haruna nun a xa die ti serexedube wali ra horomolingira sode, n e lima dennaxe. I na ge e maxade ye ra e raseniyenfe ra, ⁵ i xa Haruna xa serexedube sosee ragoro a ma, a xa donma bun magoroe, a xa donma kuye bun magoroe, a xa donma kuye, a xa donma kanke raxunmase ra, nun a xa beleti donma kanke raxunmase xirima naxan na. ⁶ I xa xunmase doxo a xunyi ma, i fa na tonxuma xeema daaxi xiri na ra. ⁷ I xa ture seniyenxi ifili a xunyi ma a tife serexedube ra. ⁸ I na ge na ra, i xa serexedube donma kuye bun magoroe ragoro Haruna xa die fan ma. ⁹ I xa Haruna nun a xa die tagi ixiri beleti ra, i xa xunmase doxo e xunyi ma. I Haruna nun a xa die tima serexedubee ra na ki ne. Na xa findi seriyen ra naxan mu kanama abadan.»

¹⁰ «I xa tuura nde xanin horomolingira sode de ra, n i lima dennaxe. Haruna nun a xa die na e belexe sa a xunyi, ¹¹ i xa na tuura kon naxaba Alatala ya xori horomolingira sode de ra, n i lima dennaxe. ¹² I xa na tuura wuli tongo, i nde sa serexebade feri naani ma i belexesole ra. Wuli naxan luxi, i xa na ifili serexebade sanbunyi ma. ¹³ I na ge na ra, i xa na tuura ture tongo naxan na a furinge ma, a laare naxan a boje makotoxi, a gunguie nun ture naxan na e ma, i xa na birin gan serexe ra serexebade fari. ¹⁴ Kono a sube, a kiri, nun a xa jape, i xa nee gan taa fari ma, barima yunubi xafari serexe na a ra.»

¹⁵ «I na ge na ra, i xa yexee kontonyi keren tongo. Haruna nun a xa die e xa e

belexe sa a xunyi, ¹⁶ i fa a kɔn naxaba. I xa a wuli tongo, i a ifili serexebade rabilinyi ma. ¹⁷ I xa na yexee kontonyi bolon a xuntunyi ra. I xa a furinge nun a sanyie maxa, i fa e malan a sube nun a xunyi fari, ¹⁸ i na birin gan serexebade fari. Serexe gan daaxi nan na ki Alatala be, naxan nafan Alatala ma.»

¹⁹ «I na ge na singe ra, i xa na yexee kontonyi firin nde tongo. Haruna nun a xa die na e belexe sa a xunyi ma, ²⁰ i xa a kɔn naxaba. I xa na wuli tongo, i nde sa Haruna nun a xa die yirefanyi tuli kirie ma, e yirefanyi belexe, nun sankurae ma. Wuli naxan luxi, i xa na ifili serexebade rabilinyi. ²¹ I xa wuli nde tongo serexebade fari, a nun ture nde naxan nawalixi mixi tife serexedube ra, i xa nee kasan Haruna, a xa die, nun e xa dugie ma. Na kui Haruna nun a xa die bara ti serexedubee ra, e xa dugie fan bara findi serexedube dugie ra.»

²² «I xa yexee kontonyi ture tongo, a nun a xuli, a ture naxan na a furinge ma, a laare naxan a boɲe makotoxi, a gunguie nun ture naxan e makotoxi, a nun a yirefanyi tabe, barima serexe na a ra naxan a niyama mixi xa ti serexedube wali ra. ²³ I xa na debe tongo taami lebinitare na naxan kui naxan fixi Alatala ma. Na kui i xa taami digilixi keren tongo, a nun taami lebinitare ture masunbuxi naxan na, nun taami lebinitare xunxuri nde, ²⁴ i xa nee sa Haruna nun a xa die belexe, i nee dentege Alatala be serexe ra. ²⁵ Na dangi xanbi, i xa e ba e belexe, i e sa serexe gan daaxi fari serexebade. Serexe ganxi na a ra naxan nafan Alatala ma.»

²⁶ «I xa yexee kontonyi kanke tongo, naxan baxi Haruna be, i a dentege Alatala be, a xa findi i gbe ra. ²⁷ Na kanke nun na tabe i naxan dentegexi Alatala be serexedubee tife ra, ²⁸ nee bara findi Haruna nun a xa die gbe ra. Seriyɛ nan na ki Isirayilakae be naxan mu kanama abadan. E lan ne e xa na mooli ba e xa janige serexe birin ma, e a fi Alatala ma.»

²⁹ «Haruna na faxa, a xa serexedube sose radangima a xa die nan ma. E ti temui na wali ra, e xa e ragoro e ma. ³⁰ Haruna xa di naxan findima a joxɔe ra na nan fama na dugie ragorode a ma xi solofere bun ma, beenun a xa so yire seniyenxi hɔrɔmɔlingira kui, n i lima dennaxe, serexedube wali rabafe ra.»

³¹ «Yexee kontonyi naxan baxi serexe ra, Haruna findixi serexedube ra temui naxe, i xa na sube jin yire nde naxan seniyenxi. ³² Na sube nun na taami naxan na debe kui, Haruna nun a xa die xa na don hɔrɔmɔlingira sode de ra, n i lima dennaxe. ³³ E keren xa na yunubi xafari serexe don, serexe naxan ba e be e ti loxɔe serexedubee ra. A mu lanma

mixi gbete xa na don, barima se seniyeñxi nan a ra. ³⁴ Xa na serexe sube nun taami nde sa lu han geesege, i xa a gan te xɔra. A mu donma, barima se seniyeñxi nan a ra.»

³⁵ «I xa n ma yaamarie rabatu Haruna nun a xa die xa fe ra na xi solofere bun ma e tima serexedubee ra temui naxe. ³⁶ I xa tuura keren ba loxo yo loxo yunubi xafari serexe ra. Na nan a toma serexebade fan seniyeñma. Na xanbi i xa ture ifili serexebade fari, alako a xa findi yire sugandixi ra. ³⁷ I xa na wali raba xi solofere bun ma, alako serexebade xa seniyeñ, a man xa mixi raseniyeñ naxan dinma a ra.»

³⁸ «Lxo yo loxo a lanma i xa yexee firin ba serexe ra serexebade fari, naxee bara je keren soto. Na xa raba kude i. ³⁹ A singe xa ba geesege, boore xa ba ke so temui. ⁴⁰ I na na yexee singe ba, i xa farin konkoronyi suuli, oliwi ture litiri keren, nun weni litiri keren sa na fari. ⁴¹ I na na yexee firin nde ba ke so temui, i xa sansi bogi nde nun weni sa a fari alo geesege daaxi. I xa nee ba serexe gan daaxi ra, naxan nafañ Alatala ma. ⁴² Serexe gan daaxi moali nan a ra, i bonsoe lanma a xa naxan ba n tan Alatala be abadan. A bama hɔrɔmɔlingira sode de nan na n tan Alatala ya xori, n wo lima dennaxe, n woyenma wo be dennaxe.»

⁴³ «N nan n yete masenma Isirayilakae be menni n ma noɔe kui, naxan menni raseniyeñma. ⁴⁴ N nan n ma hɔrɔmɔlingira nun n ma serexebade raseniyeñma ne, n i lima dennaxe. N Haruna nun a xa die raseniyeñma ne, alako e xa n ma serexedube wali raba. ⁴⁵ N sabatima ne Isirayilakae tagi, n man findima ne e Marigi Ala ra. ⁴⁶ Na kui e a kolonma ne n tan nan Alatala ra, e Marigi Ala, naxan e ramini Misira boxi ra, alako n xa sabati e tagi. Alatala nan n tan na, e Marigi Ala.»

30

Surayi serexebade, Isirayilakae xunsare,

Hɔrɔmɔlingira ye, ture, nun labunde

¹ «I xa surayi serexebade yailan kasiya wuri ra. ² A xa kuya nongon keren, a igbo nongon keren, a ite nongon firin. Feri naani xa lu a tuxuie ra, e nun serexebade findixi se keren na. ³ I xa na serexebade birin maso xeema xinde ra, a fari, a seetie, a ferie, nun a de kiri. ⁴ I xa suxuse digilixi firin yailan xeema ra serexebade seeti firinyie ma a de kiri laabe ra, wuri kuyee soma naxee kui a xanife ra. ⁵ I xa na wurie yailan kasiya wuri ra, i fa xeema maso e ma. ⁶ Na surayi serexebade xa doxo dugi ya ra naxan na saate kankira ya ra, yunubi xunsare yire doxoxi naxan fari, n mixi lima dennaxe. ⁷ Haruna xa surayi

xiri joxunme gan menni geesege birin, a fentenma lanpuie ma temui naxe. ⁸ A man xa na mooli raba koe so temui. Surayi nan a ra, naxan lanma a xa gan waxati birin Alatala ya xori. Seriyen na a ra wo bomsae be naxan mu kanama abadan. ⁹ Wo naxa sese ba na serexebade fari bafe surayi seniye nxi ra. Wo naxa surayi seniye nxi ba, wo naxa serexe gan daaxi ba, wo naxa sansi serexe ba, wo naxa weni xa na mu a ra ture ba menni. ¹⁰ Ne yo je Haruna xa yunubi xafari serexe wuli nde tongo, a a maso surayi serexebade ferie ma, alako e fan xa seniye nxi. Seriyen nan a ra i bomsae lanma a xa naxan naba abadan. Na serexebade findixi se seniye nxi ra Alatala be.»

¹¹ Alatala naxa yi masenyi ti Munsan be: ¹² «I na tenge Isirayilakae konti loxo naxe, birin xa a xunsare fi Alatala ma. Na nan a ra, mankanen yo mu e lima na konti tife xa fe ra. ¹³ Mixi naxan birin kontima, e xa gbeti giramu senni fi Alatala ma. Na xa maniya horomolingira seriyen ki ma. ¹⁴ Mixi naxan birin simaya bara je moxonen li, a xa a xunsare fi Alatala ma. ¹⁵ Banna mu se sama na giramu senni xun ma, misikiine fan mu nde bama na giramu senni ra. Birin xa na fi Alatala ma e xunsare ra. ¹⁶ Isirayilakae na na gbeti so i yi ra, i xa a rawali horomolingira yailanfe ra, n i lima dennaxe, alako n xa ratu a ma Isirayilakae naxan fixi e xunsare ra.»

¹⁷ Na dangi xanbi Alatala naxa yi masenyi ti Munsan be. ¹⁸ «I xa horomolingira ye sase xungbe yailan wure gbeeli ra, a nun a doxo. I xa na doxo horomolingira nun serexebade tagi, i fa maraseniye nxi ye sa a kui, ¹⁹ Haruna nun a xa die naxan nawalima e belexee nun e sanyie maxafe ra. ²⁰ Beenun e xa so horomolingira kui, n wo lima dennaxe, a lanma e xa e belexee nun e sanyie maxa na ye ra, alako e naxa faxe. Beenun e xa e makore serexebade ra serexe gan daaxi bafe Alatala be, ²¹ a lanma e xa e belexee nun e sanyie maxa na ye ra, alako e naxa faxe. Seriyen nan na ra e bomsae birin be naxan mu kanama abadan.»

²² Alatala naxa a masen Munsan be, ²³ «I xa se xiri joxunme fanyie tongo, alo wuri wa ye naxan xili miri kilo suuli, wuri fuji naxan xili sinamon kilo firin nun a tagi, kale nde kilo firin nun a tagi naxan xiri joxun, ²⁴ kasiya wuri fuji kilo suuli, nun oliwi ture litiri senni. ²⁵ I xa na birin yailan ture seniye nxi ra naxan nawalima serexedube tife ra. Na wali xa raba a fanyi ra a raba ki ma.»

²⁶ «I man xa na ture rawali horomolingira nun saate kankira raseniye nxi ra, n wo lima dennaxe, ²⁷ a nun horomolingira teebili, a yirabasee, lanpui doxo, a yirabasee, surayi serexebade, ²⁸ serexebade xungbe, a yirabasee, horomolingira ye sase xungbe, nun

a dɔxɔse. ²⁹ I xa na ture seniyeŋxi rawali na birin naseniyeŋfe ra. Mixi naxee dinma nee ra, e seniyeŋma ne. ³⁰ I xa na ture seniyeŋxi rawali Haruna nun a xa die tife n ma serɛɛdubɛe ra.»

³¹ «I xa a fala Isirayilakae be a na ture findixi ture seniyeŋxi nan na wo bɔnsɔe be abadan. ³² Wo naxa a sa mixi fate ma, wo naxa na ture mɔoli yailan wali gbete xa fe ra. Ture seniyeŋxi nan a ra wo be. ³³ Mixi yo naxan na na ture mɔoli rafala, a a sa mixi seniyeŋtare ma, na kanyi bama ne pama ya ma.»

³⁴ Alatala naxa a masen Munsa be, «I xa se xiri jɔxunmɛe tongo, alɔ sitakite, onixi, nun galibanon. I xa e masunbu surayi fanyi ra, e xasabi birin xa lan. ³⁵ Na findima surayi ra naxan xiri jɔxun ki fanyi ra. Fɔxe di xa sa a ma. Surayi seniyeŋxi nan a ra. ³⁶ I xa na surayi findi fuɲi ra i naxan sama saate kankira ya ra hɔrɔmɔlingira kui n i lima dennaxe. Se seniyeŋxi na a ra wo be. ³⁷ Wo naxa yi surayi mɔoli rafala wo yete be. Se seniyeŋxi na a ra, wo naxan nawalima Alatala gbansan be. ³⁸ Mixi yo naxan na na mɔoli rafalama a yete be a xa na xiri rame, na kanyi kerima ne a xa pama ya ma.»

31

Hɔrɔmɔlingira walikee

nun malabui lɔxɔe binyafe

¹ Alatala naxa a masen Munsa be, ² «I xa a kolon n bara Uri xa di Besaleli sugandi, Xuru xa mamadi, naxan fatanxi Yuda bɔnsɔe ra. ³ N bara xaxili fanyi fi a ma naxan fatanxi n tan na, alako a xa wali birin naba ki kolon lɔnni fanyi ra, ⁴ a xa nɔ wali tode a xaxili kui beenun a xa raba, a xa nɔ xeema, gbete, nun wure gbeeli rawalide, ⁵ a xa nɔ geme fanyi masolide a fa a rabilinyi yailan, a xa nɔ kamuderija nun wali gbete rabade.»

⁶ «N bara Oholiyabu Axisamaki xa di so a yi ra, naxan fatanxi Dana bɔnsɔe ra, a xa a mali. N bara xaxili fanyi fi mixie ma, naxee fata walide, alako e xa nɔ n ma yaamari birin nabade, ⁷ alɔ hɔrɔmɔlingira n adamadi lima dennaxe, saate kankira, a derakote naxan findixi xunsare yire ra, nun hɔrɔmɔlingira yirabase birin, ⁸ teebili, teebili yirabasee, lanpui dɔxɔse xeema daaxi, lanpui yirabasee, surayi serɛɛebade, ⁹ serɛɛebade xungbe nun a xa yirabasee, ye sase xungbe nun a dɔxɔse, ¹⁰ serɛɛedube sose seniyeŋxie Haruna nun a xa die be, ¹¹ ture seniyeŋxi, nun surayi naxan ganma hɔrɔmɔlingira kui. E xa a birin yailan n ma yaamari ki ma.»

¹² Alatala naxa a masen Munsa be, ¹³ «A fala Isirayilakae be a e xa e jengi sa n ma malabui loxoe xon ma, barima nee findima tonxuma ra won tagi abadan, alako wo xa a kolon a n tan nan na Alatala ra naxan wo raseniyeenma. ¹⁴ Wo xa wo jengi sa malabui loxoe xon ma, barima a seniyeen wo tan be. Xa naxan mu a binya, a lan ne na kanyi xa faxa. Mixi naxan walima malabui loxoe, na kanyi xa keri n ma jama ya ma. ¹⁵ Xi senni na wo yi ra walife ra, konon a xi solofere nde findima malabui loxoe nan na, naxan fima Alatala ma. Mixi naxan walima na loxoe, na kanyi xa faxa. ¹⁶ Isirayilakae xa e jengi sa malabui loxoe xon ma, e a rabatu waxati birin. Saate na a ra naxan mu kanama abadan. ¹⁷ A findima tonxuma nan na, n tan nun Isirayilakae tagi temui birin, barima n tan Alatala, n koore nun boxi daaxi xi senni nan bun ma, konon a xi solofere nde, n naxa wali dan, n nan n malabu.»

¹⁸ Alatala to ge masenyi tide Munsa be Turusinina geya fari, a naxa geme walaxe firin so a yi ra seede ra, a xa yaamarie nu sebexi naxee ma a belexe sole ra.

32

Ninge kuye xeema daaxi

¹ Isirayilakae to a to, Munsa bara bu geya fari, jama naxa e malan Haruna yire, e fa a fala a be, «I xa kuye yailan naxan tima muxu ya ra. Munsa naxan muxu raminixi Misira boxi ra, muxu mu a kolon fe naxan a sotxi geya fari.» ² Haruna naxa e yaabi, «Langa xeema daaxi naxan birin na wo xa ginnee nun wo xa die tulie ra, wo fa e birin na n xon ma.» ³ Isirayila jama birin naxa e xa langa xeema daaxie ba e tulie ra, e fa e so Haruna yi ra. ⁴ Haruna naxa na xeema raxunu, a ninge kuye yailan a ra. A to ge na ra, e naxa a fala e xui itexi ra, «Isirayilakae, won ma ala nan ya naxan won naminixi Misira boxi kui.» ⁵ Haruna to na to, a naxa serexebade yailan na ninge kuye ya ra, a fa a fala a xui itexi ra, «Tina, xulunyi tima ne Alatala be.» ⁶ Na kuye iba, e naxa keli subaxe ma, e serexe gan daaxi nun xanunteya serexe ba. Mixie naxa e dege, e minsee min, e fa e waxonfe raba.

⁷ Na temui Alatala naxa a masen Munsa be, «I xa goro jama yire, barima i naxee namini Misira boxi kui, e bara fe kana a jaaxi ra. ⁸ E bara n ma kira bejin yi ikorexi ra, e bara ninge kuye yailan wure raxunuxi ra, e na batu, e serexee ba a be, e a fala, «Isirayilakae, won ma ala nan ya naxan won naminixi Misira boxi kui.» ⁹ N tan Alatala n xa a masen i be, yi jama, jama xurutare na a ra. ¹⁰ Won naxan nabama, a lu n xa e sonto

n ma xɔnɛ kui, kɔnɔ i tan, i xa makuya e ra, n xa i findi si xungbe ra.»

¹¹ Na kui Munsa naxa Alatala maxandi, «Alatala, munfe ra i wama xɔnɔfe i xa pama ma, i senbe naxan naminixi Misira bɔxi ra? ¹² Xa i na raba, Misirakae fama a falade a i yi pama raminixi Misira bɔxi kui ne alako i xa e faxa geyae fari, e xa fe xa jɔn dunipa. N bara i maxandi, i bɔɲe magoro, n Marigi. I naxa yi pama sɔntɔ. ¹³ I ratu i xa konyie Iburahima, Isiyaga, nun Isirayila ma, i kalixi naxee ra, a falafe ra, «N wo bɔnsɔe rawuyama ne alɔ tunbui naxee na koore ma. N bɔxi fima wo bɔnsɔe ma ke ra naxan mu bama wo yi ra abadan.» ¹⁴ Na temui Alatala bɔɲe naxa goro, a mu a xa pama sɔntɔ sɔnɔn.

¹⁵ Munsa naxa goro geya fari na seede walaxe firinyie suxuxi a yi ra, sebeli tixi nee seeti firinyi ma. ¹⁶ Ala nan na walaxee yailan, a sebeli masoli e ma.

¹⁷ Yosuwe to pama xui itexi me, a naxa a fala Munsa be, «N xui nde mema pama yire naxan luxi alɔ gere so xui.» ¹⁸ Munsa naxa a yaabi, «Gere geenife xui mu ya, gere lɔɔsife xui fan mu a ra. N xulunyi xui nan mema.»

¹⁹ E to makɔre pama ra, Munsa naxa mixie to fare boron na kuye yire. A bɔɲe naxa te han a fa walaxee woli bɔxi ma geya san bunyi, e naxa kana. ²⁰ A naxa e xa ninge kuye woli te xɔɔra, a gan han a findi xube ra. A naxa na te xube sa ye xɔɔra, a na fi Isirayilakae ma, e xa a min. ²¹ A naxa fa Haruna maxɔrin, «Yi pama munse rabaxi i ra, naxan a niyaxi i xa e ti yi yunubi xungbe ra?» ²² Haruna naxa a yaabi, «N marigi, i naxa xɔnɔ n ma! I a kolon yi pama birama fe kobi fɔxɔ ra ki naxe. ²³ E tan nan a falaxi n be, «I xa kuye yailan naxan tima muxu ya ra. Munsa naxan muxu raminixi Misira bɔxi ra, muxu mu a kolon fe naxan a sɔtɔxi geya fari.» ²⁴ N naxa a fala e be, «Wo xa fa wo xa xeema ra.» E to fa na xeema ra, n naxa a woli te xɔɔra, yi ninge kuye fa mini.»

²⁵ Munsa naxa a kolon Haruna pama luxi ne e xa e waxɔnfe raba. Na nu wama findife yaagi ra Isirayilakae be e yaxuie mabiri. ²⁶ Munsa naxa sa ti e xa yonkinde sode de ra, a fa a fala a xui itexi ra, «Naxee na Alatala be, wo xa fa n yire.» Lewi bɔnsɔe birin naxa e malan Munsa xanbi ra. ²⁷ A naxa a fala e be, «Isirayila Marigi Alatala bara wo yamari wo birin xa wo xa santidegema tongo, wo fa wo ngaxakerenyi birin faxa, a nun wo booree nun wo dɔxɔbooree naxee bara lu yi fe kui.» ²⁸ Na lɔxɔe Lewi bɔnsɔe naxa Munsa xa yaamari suxu, e fa Isirayilaka mixi wulu saxan faxa. ²⁹ Munsa naxa a fala e be, «To wo bara Alatala waxɔnfe raba wo ngaxakerenyie faxafe. Ala xa baraka sa wo xa fe ma.»

³⁰ Na kuye iba, Munsa naxa a fala pama be, «Wo bara yunubi xungbe raba. N xa gbilen Alatala yire geya fari, alako n xa a mayandi wo xa yunubi xafarife ra.» ³¹ Munsa naxa siga Alatala yire, a a fala a be, «Alatala, n bara i maxandi yi pama be. E bara yunubi xungbe raba kuye yailanfe xeema ra. ³² N bara i maxandi, i xa dije e ma. Yandi, xa na mu a ra, i xa n xili ba e ɔɔɔɔ ra kisi kitaabui kui, i naxan seɔɔɔɔ.» ³³ Alatala naxa a yaabi, «Ade, n mixie nan xili bama n ma kisi kitaabui kui naxee yunubi rabaxi n na. ³⁴ Yakɔsi, siga, i xa pama xanin n dennaxe masenxi i be. N ma maleke tima i ya ra sinden, kɔɔɔ kiiti ɔɔɔɔ na fa, e e xa yunubie sare fima ne.» ³⁵ Alatala Isirayilakae ratɔn ne, barima e a fala ne Haruna be, a xa ninge kuye yailan e be xeema ra.

33

Ala lufe Isirayilakae tagi

¹ Alatala naxa a masen Munsa be, «Wo nun pama i naxan naminixi Misira ɔɔɔi kui, wo xa siga n dennaxe laayidixi Iburahima, Isiyaga, nun Yaxuba be kali ra, a falafe ra n na fima e ɔɔɔɔɔɔ ma. ² N maleke tima ne wo ya ra. N Kanaankae, Amorikae, Xitikae, Perisikae, Hiwikae, nun Yebusukae kerima ne ³ na ɔɔɔi ma, xije nun kumi xeɔɔɔa dennaxe. Kɔɔɔ n tan mu sigama naa wo ɔɔɔɔ ra, xa na mu a ra n wo sɔɔɔɔma ne kira xɔn ma, barima pama xurutare nan wo ra.»

⁴ Nama to na masenyi xɔɔɔɔɔɔ me, e naxa sunnun. Mixi yo mu a xa raxunmasee so a ma. ⁵ Alatala naxa a masen Munsa be, «I xa a fala Isirayilakae be, «Xurutaree nan wo ra. Xa n bira wo ɔɔɔɔ ra, n wo sɔɔɔɔma ne. Wo xa raxunmasee birin ba wo ma, n xa a mato n wo xa fe suxuma ki naxe.» ⁶ Na kui e to keli Xorebe geya yire, e naxa e xa raxunmasee ba e ma.

⁷ Munsa nu kiri banxi tongoma, a nu a ti Isirayilakae xa yonkinde fari ma. A naxa na xili sa Ala Maxandi yire. Menni mixi nu nɔma maxɔrinyi tide Alatala ma. ⁸ Munsa to nu minima sigafe ra na banxi kui, pama birin nu kelima ne, e ti e xa naade ra, e ya ti Munsa ra han a so na kui. ⁹ Munsa na ge sode na banxi kui, nuxui nu goroma na naade ra, Alatala fa sumun a be. ¹⁰ Isirayilakae to nu na nuxui toma na banxi sode de ma, e nu luma e mafelen na ɔɔɔi ma e xɔnyɔ naadee ra. ¹¹ Alatala nu wɔyenma Munsa be e boore ya i, alɔ mixi wɔyenma a boore be ki naxe. Sumunyi dangi xanbi, Munsa nu gbilenma pama yire, kɔɔɔ a malima Yosuwe, Nun xa di, na tan mu nu kelima na banxi kui.

¹² Munsa naxa a masen Alatala be, «N Marigi i bara n yamari n xa ti yi pama ya

ra, kono i mu a masenxi n be i naxan xeema muxu matife ra. I bara a fala n be, «N tan nan i sugandixi, i bara n keneni.»¹³ N bara i maxandi, xa n i kenexi, i xa i waxonfe masen n be, alako n xa i kolon yati, n man xa i xa hinne soto. I xa a kolon, yi si findixi i xa jama nan na.»

¹⁴ Alatala naxa a yaabi, «N tan yati wo matima ne, n xa bojesa fi wo ma.»¹⁵ Munsa naxa a masen a be, «Xa i tan yati mu muxu matima naa, i naxa a lu muxu xa keli be.¹⁶ Munse noma a masende dunja be a muxu bara i keneni, xa i mu na muxu foxo ra? Na kui xa i na muxu foxo ra, e noma a kolonde i bara n tan nun i xa jama sugandi dunja si birin ya ma.»¹⁷ Alatala naxa Munsa yaabi, «I naxan falaxi, n a rabama ne, barima i bara n keneni. N tan nan i sugandixi yati.»

¹⁸ Na dangi xanbi Munsa naxa Ala maxandi, «I xa i xa nore masen n be.»¹⁹ Alatala naxa a yaabi, «N fama n ma fanyi birin masende i be. N tan Alatala, n man fama n xili yati falade i be. N hinnema mixi ra, n wama hinnefe naxan na. N kinikinima mixi ma, n wama kinikinife naxan ma.²⁰ Kono i mu noma n yatagi tan tode, barima adamadi yo mu noma n yatagi tode, a mu faxa.»

²¹ Alatala naxa a masen a be, «Fanye nde nan be n fe ma. I xa ti naa.²² N ne dangima n ma nore kui, n i noxunma fonme kui, n fa i ya makoto n belexe ra han n gema dangide temui naxe.²³ Na temui n fama n belexe bade i ya ma, alako i xa no n kobe tode fa, kono i mu noma n yatagi tan tode.»

34

Seriye walaxe neene

¹ Alatala naxa a masen Munsa be, «Walaxe firin masoli geme ra, naxee maniya na singee ra i naxee kana. N xa sebeli ti e ma, alo sebeli naxan nu tixi na booree ma.² I xa kurun tina geesege tefe ra Turusinina geya fari i n lima dennaxe.³ I naxa fa mixi yo ra, mixi yo naxa te geya ma. Hali xurusee naxa e de madon menni.»

⁴ Munsa naxa geme walaxe firin masoli alo singe daaxi. Subaxe a naxa te Turusinina geya ma na walaxe ra, alo Alatala a yamari ki naxe.⁵ Alatala to goro nuxui kui Munsa yire a xili masende a be,⁶ a naxa dangi Munsa ya ra, a fa a yita a be,

«N tan nan na Alatala ra.

Alatala naxan kinikinima,

naxan xa hinne gbo,

naxan dijema ibunadama ma.

Dugutegeja kanyi nan n na,
n mu yanfanteya kolon.

⁷ N ma dugutegeja buma abadan.

N dijema mixi xa tantanyi ma,
n mu ratuma e xa matandi ma,
n e xa yunubi xafarima.

Kono n mu neemuma tinxintareya ma.

N tinxintaree sare ragbilenma ne e bonsœ ma
han e tolontolonyie xa waxati.»

⁸ Munsa naxa a felen boxi ma, ⁹ a fa a fala, «N Marigi, n bara i maxandi, xa n i kenen, i xa jere muxu ya ma, barima xurutare nan muxu ra. I xa dije muxu xa matandi ma, i xa muxu xa yunubie xafari, alako muxu xa findi i xa jama yati nan na.»

¹⁰ Alatala naxa a yaabi, «N xa saate tongo wo be. N fama ne kaabanakoe rabade wo ya ma, naxee singe mu nu raba dunja kui. Si birin kaabama ne Alatala xa wali magaaxuxie ma, n naxee rabama i tan saabui ra. ¹¹ Wo jengi sa n ma yaamari xon ma n naxan falama wo be to. N fama ne Amorikae, Kanaankae, Xitikae, Perisikae, Hiwikae, nun Yebusukae keride wo ya ra. ¹² Wo na so na, wo nun e tan naxa saate yo xiri, xa na mu a ra e findima gantanyi nan na wo be. ¹³ A lanma wo xa e xa serexebadee rabira, wo xa e xa geme tonxumae kana, wo xa e xa kuyee masolixie masege. ¹⁴ Wo naxa wo magoro ala gbete bun ma, barima n tan naxan xili Alatala, n mu wama n firin nde xon. ¹⁵ Wo naxa saate xiri wo nun na boxikae ra, alako wo naxa n yanfa, wo fa e xa alae xa serexee don e wo xilima lande naxee ma. ¹⁶ Wo naxa meeni ginnee fen wo xa die be, alako e naxa a niya wo xa die xa e xa alae batu. ¹⁷ Wo naxa ala gbete yailan wure raxunuxi ra.»

¹⁸ «Wo xa Taami Lebinitare Sali raba. Xi solofere bun ma Abiba kike ra, wo xa taami lebinitare gbansan don, alo n wo yamarixi ki naxe. Wo xa ratu a ma a n wo raminixi Misira boxi kui na kike nan na.»

¹⁹ «N gbe nan di xeme singe birin na, a findi mixi ra, a findi xuruse ra wo xa goore kui alo ninge, yexee, xa na mu a ra si. ²⁰ Wo xa sofale xa di singe xun sara yexee xa na mu a ra si ra. Xa wo mu tin na ra, wo xa na sofale konyi gira. Wo xa di xeme singe birin xun sara. Wo naxa wo makore n na wo belexe igeli ra.»

²¹ «Wo xa wali xi senni loxunyi kui, kono a xi solofere nde, wo xa wo malabu. Hali a findi xe buxa nun xe xaba temui nan na, wo xa na seriye suxu.»

²² «Wo xa Loxunyi Sali raba Ala tantufe ra wo mengi singe xabama temui naxe, a nun wo xe xabama temui naxe je jonyi. ²³ Ne keren kui, xeme birin xa fa sali raba ra Isirayila Marigi Alatala ya xori sanya saxan. ²⁴ Na waxati saxanyi kui, n mu tinma si yo xa fa wo xa boxi ba wo yi ra. N a niyama ne wo xa no e ra, wo fa nde sa wo xa boxi xa gboe xun ma.»

²⁵ «Wo naxa fa xuruse serexe ra n xon ma, taami lebini daaxi biraxi a foxo ra. Wo na ge Saya Maleke Dangi Sali serexe donde, wo naxa na sube donxoe raxi ye i. ²⁶ Wo xa wo xa sansi bogi fisamante singee ba serexe ra wo Marigi Alatala xa horomolingira kui. Wo naxa si yore jin a nga xipe ye ra.»

²⁷ Alatala naxa a masen Munsa be, «I xa yi yaamarie sebe, barima nee findixi saate nan na n nun Isirayila pama tagi.» ²⁸ Munsa naxa lu Alatala yire xi tongo naani. Koe nun yanyi a mu sese don, a mu sese min. Na waxati Alatala naxa na seriye fu sebe geme walaxee ma, naxee findixi saate masenyi ra.

²⁹ Munsa naxa goro Turusinina geya fari, walaxe firin suxuxi a yi ra, naxee findixi saate masenyi ra. Munsa mu nu a kolon a ya tagi nu bara noro a tan nun Ala xa sumunyi saabui ra. ³⁰ Haruna nun Isirayilakae to nore to Munsa yatagi ma, e mu suusa e makorede a ra. ³¹ Munsa naxa Haruna nun pama kuntigie xili, e fa lu yire keren. ³² E to ge woyende, Isirayila pama birin naxa fa e tuli matide Alatala xa yaamari ra, a naxan masenxi Munsa be Turusinina geya fari. ³³ Munsa to ge na falade, a naxa mafelenyi dusu a ya tagi xun na. ³⁴ A nu so kiri banxi kui maxorinyi tide Alatala ma, a nu mafelenyi bama a yatagi ma. A na mini temui naxe, a Ala xa yaamari radangi Isirayila pama ma. ³⁵ Isirayilakae nu a toma Munsa yatagi nu noroxi ki naxe. A na ge na masenyi ra, a man a xa mafelenyi dusu a xun na, han a gbilen temui Alatala yire.

35

Ala xa yaamarie horomolingira tife xa fe ra

¹ Munsa naxa Isirayila pama birin malan, a a fala e be, «Alatala xa yaamarie nan ya: ² Wo xa wali xi senni loxunyi kui, kono a xi solofere nde wo xa wo malabu. Loxoe sugandixi na a ra Alatala be. Mixi yo naxan wali suxuma na loxoe, a lanma na kanyi xa faxa. ³ Wo naxa te yo radexe wo xa banxi kui na loxoe.»

⁴ Munsa man naxa a masen Isirayila jama birin be, «Alatala xa yaamarie nan ya: ⁵ Wo xa hadiya ba Alatala be. Mixi naxan na a janigexi a xa hadiya ba, alo xema, gbeti, nun wure gbeeli, ⁶ gese gere daaxi, bulu daaxi, nun a gbeeli, suwa dugi, nun gese naxan yailanxi si xabe ra, ⁷ yexee kontonyi kiri naxee soxi a gbeeli ra, pirimui kirie, nun kasiya wuri, ⁸ lanpui ture, labunde naxan masunbuma ture ra, surayi xiri joxunme naxan ganma, ⁹ onixi geme, nun geme tofanyi naxee sama serexedube xa donma kuye nun a xa donma kanke raxunmase ma.»

¹⁰ «Wali kolonyie naxee na wo ya ma, e xa fa yi see yailande alo Alatala a yamarixi ki naxe:

¹¹ Horomolingira dugie,

a xun makoto see,

a suxusee,

a xebenyie,

a wurie nun e sanbunye,

¹² a nun saate kankira,

a wuri kuyee,

a derakote,

a nun dugi naxan gbakuma a ya ra,

¹³ horomolingira teebili,

a wuri kuyee,

a yirabase,

nun taami naxee bama Alatala be serexe ra,

¹⁴ horomolingira lanpui dexe,

a yirabasee,

a lanpuie,

nun ture naxan sama a kui,

¹⁵ surayi serexebade,

a wuri kuyee,

nun ture seniyenxi,

labunde gan daaxi,

a nun dugi naxan gbakuma horomolingira sode de ra,

¹⁶ serexebade xungbe,

a sube ganse wure gbeeli daaxi,
a wuri kuyee,
a yirabase,
nun hōrōmōlingira ye sase xungbe
nun a dōxōse,
¹⁷ hōrōmōlingira tete xa dugie,
a wurie,
nun e sanbunye,
a nun dugi naxan gbakuma tete sode de ra,
¹⁸ hōrōmōlingira maxirisee,
tete maxirisee,
nun e xa luutie,
¹⁹ a nun serexedube sosee Haruna nun a xa die be.»

²⁰ Isirayila pama naxa keli Munsa xun ma. ²¹ Mixi naxee janige, nee naxa fa e xa hadiya ra Alatala be a xa hōrōmōlingira tife ra, Ala e lima dennaxe, a nun serexedube sosee seniyenxie yailanfe ra. ²² Xeme nee nun gine naxee a janigexi, e naxa fa raxunmase xema daaxie ra, alɔ tulirasoe, xurundee, konyi magorosee, belexerasoe, a nun raxunmase gbete naxee yailanxi xema ra. E naxa na birin fi Alatala ma. ²³ Gese gere daaxi, bulu daaxi, nun a gbeeli, suwa dugie, gese naxan yailanxi si xabe ra, yexee kontonyi kiri naxee soxi a gbeeli ra, nun pirimui kirie nu na naxee yi ra, nee naxa fa e ra. ²⁴ Mixi naxee nu a janigexi, nee naxa fa gbete nun wure gbeeli hadiya ra Alatala be. Kasiya wuri kanyie naxa fa na wuri ra hōrōmōlingira wali xa fe ra. ²⁵ Gine naxan birin fata dugi soxode, e naxa dugie soxo e belexe ra, e fa nee ra: dugi gere daaxi, bulu daaxi, nun a gbeeli. E naxa fa suwa dugi ra. ²⁶ Gine naxan birin fata, e a janige, e naxa gese yailan si xabe ra. ²⁷ Nama kuntigie naxa fa onixi gеме nee nun geme tofanyi gbete ra, naxee sama serexedube xa donma kuye nun a xa donma kanke raxunmase ra. ²⁸ E naxa fa labunde nun ture ra hōrōmōlingira lanpui be, a nun ture seniyenxi nun labunde gan daaxi gbete. ²⁹ Isirayilaka birin naxee a janigexi e boje kui, xeme nee nun ginee, nee naxa fa hadiya ra Alatala xon ma, alako Munsa xa wali raba Alatala a yamarixi naxan na.

³⁰ Munsa naxa a masen Isirayilakae be, «Wo a kolon, Alatala bara Besaleli Uri xa di sugandi, Xuru xa mamadi naxan fatanxi Yuda bonsoe ra. ³¹ Alatala bara xaxili fanyi fi a ma, alako a xa wali birin naba ki kolon lonni fanyi ra, ³² a xa no wali tode a xaxili kui

beenun a xa raba, a xa nɔ xɛɛma, gbeti, nun wure gbeeli rawalide, ³³ a xa nɔ gɛmɛ fanyi masolide a fa a rabilinyi yailan, a xa nɔ kamuderija nun wali gbete rabade. ³⁴ Ala bara a niya Besaleli xa nɔ mixi gbete matinkande a xa wali ra. Ala bara na niya Oholiyabu Axisamaki xa di fan be, naxan fatanxi Dana bɔnsɔɛ ra. ³⁵ Ala bara e mali alako e xa fata wali birin na, alɔ gɛmɛ nun wuri masolife, pirinti rabafe, suwa dugi sɔxɔfe gese gere daaxi, bulu daaxi, nun a gbeeli ra, a nun wali birin e naxan toma e xaxili kui.»

36

Besaleli nun Oholiyabu xa wali

¹ Besaleli, Oholiyabu, nun wali fanyi rabae, Alatala bara xaxili fanyi fi naxee ma, alako e xa hɔrɔmɔlingira wali birin naba ki kolon lɔnni fanyi ra, nee wali suxu nɛ alɔ Alatala a yamari ki naxe. ² Munsa naxa Besaleli, Oholiyabu, nun wali fanyi rabae xili, Alatala bara xaxili fanyi fi naxee ma, naxee nu bara a janige e xa na wali raba. ³ Munsa naxa hadiya birin so e yi ra, Isirayilakae naxee baxi e xa hɔrɔmɔlingira tife ra. Gɛɛsɛge yo gɛɛsɛge, e nu hadiya gbete sɔtɔma. ⁴ Na wali fanyi rabae naxa keli e xa walie de i, alako e xa hɔrɔmɔlingira wali gbansan naba. ⁵ E naxa a fala Munsa be, «Nama fama hadiya naxee ra, a gbo wali be, Alatala naxan yamarixi.» ⁶ Na kui Munsa naxa yaamari fi, yi xibaaru xa rayensen yonkinde kui, «Mixi naxa wali sɔnɔn hadiya xa fe ra, naxan bama hɔrɔmɔlingira tife ra.» Nama naxa na xui rabatu, e mu fa na hadiya mɔoli ra sɔnɔn. ⁷ Se naxee nu bara ba, nee nu nɔma wali rapɔnde a fanyi ra.

⁸ Wali fanyi rabae naxa hɔrɔmɔlingira ti suwa dugi fu ra, a gere daaxi, a bulu daaxi, nun a gbeeli. E malekee sawure masɔxɔ a ma a tofan ki ma. ⁹ Dugi birin kuya nɔngɔn mɔxɔnɛn nun solomasaxan, e igbo nɔngɔn naani. E kuye nun e igboya lan. ¹⁰ E dugi suuli dege e boore ra, e dugi suuli gbete fan dege e boore ra. Na kui na dugi fu bara findi dugi firin na. ¹¹ E gese gere daaxi dege na dugi singe de kiri ma, a nun na dugi firin de de kiri ma. ¹² E gese tongo suuli dege na firinyi de kiri ma alako e birin xa lan e boore ma. ¹³ E suxuse tongo suuli yailan xɛɛma ra, na dugi firinyie ralan e boore ra na suxusee ra. Na nan a niya hɔrɔmɔlingira findi dugi keren na.

¹⁴ E dugi fu nun keren sɔxɔ si xabe ra, naxee Ala xa hɔrɔmɔlingira makotoma. ¹⁵ Dugi keren kuya nɔngɔn tongo saxan, a igbo nɔngɔn naani. Na dugi fu nun kerenyi birin lan nɛ. ¹⁶ E dugi suuli dege e boore ra, e findi dugi keren na. Na dugi senni naxee luxi, e

fan dɛgɛ e boore ra. ¹⁷ E gɛsɛ tongo suuli dɛgɛ na dugi singe ra, a nun na dugi firin nde ra. ¹⁸ E suxuse tongo suuli yailan wure gbeeli ra, na dugi firinyie ralan e boore ra na suxusee ra. Na nan a niya na birin findi dugi keren na naxan Ala xa hɔrɔmɔlingira makotoma. ¹⁹ E makotose gbete yailan yɛxɛ kontonyi kiri ra, naxan soxi a gbeeli ra. E makotose gbete yailan pirimui kiri ra.

²⁰ E kasiya wuri xaba xebenyie ra hɔrɔmɔlingira tima naxee ma. ²¹ Kankan kuya nɔngɔn fu, a igbo nɔngɔn keren nun a tagi. ²² Suxuse firin lu hɔrɔmɔlingira xebenyi birin ma e kafuma e boore ma naxee ra. ²³ Xebenyi mɔxɔɔn nan ti hɔrɔmɔlingira yirefanyi ma. ²⁴ Sanbunyi gbete daaxi tongo naani nan sa na xebenyi mɔxɔɔn bun ma, xebenyi keren, sanbunyi firin. E lu xebenyi suxusee fɛ ma. ²⁵ Xebenyi mɔxɔɔn nan ti hɔrɔmɔlingira kɔɔla fan ma, ²⁶ a nun e sanbunyi gbete daaxi tongo naani, xebenyi keren, sanbunyi firin. ²⁷ Xebenyi senni nan ti hɔrɔmɔlingira xanbi ra sogegorode mabiri. ²⁸ E xebenyi firin yailan tuxuie bɛ hɔrɔmɔlingira xanbi ra, ²⁹ naxee fuge nun laabe lanma e boore ma, e xiri fuge ra se digilixi ra. Na tuxui firinyi yailan na ki nɛ. ³⁰ Na birin lanxi xebenyi solomasaxan nan ma, a nun e sanbunyi gbete daaxi fu nun senni, xebenyi keren, sanbunyi firin.

³¹ E wuri suuli yailan kasiya wuri ra, hɔrɔmɔlingira xebenyie tima naxee ma. Suuli rawali sɛeti ma, ³² suuli rawali boore sɛeti ma, suuli rawali hɔrɔmɔlingira xanbi ra sogegorode mabiri. ³³ Wuri naxan lu a tagi, na dangi xebenyie nan xun ma, a keli sɛeti singe a sa dɔxɔ boore ra. ³⁴ Na xebenyie, nun na wurie, nun se digilixie wuri so naxee kui, na birin maso xɛɛma nan na.

³⁵ E suwa dugi yailan gɛsɛ gɛrɛ daaxi, bulu daaxi, nun a gbeeli ra. Malekɛ sawurɛɛ dɛgɛ na ma, a tofan ki ma. ³⁶ A gbaku kasiya wuri naani ma naxee masoxi xɛɛma ra, e tixi gbete sanbunyie ma. Suxuse naxee dugi xirima wurie ma, nee fan maso xɛɛma ra.

³⁷ E suwa dugi gbete yailan gɛsɛ gɛrɛ daaxi, bulu daaxi, nun a gbeeli ra hɔrɔmɔlingira sode dɛ ra. E a masɔxɔ a fanyi ra, a xa tofan. ³⁸ E a gbaku wuri suuli ma naxee yailanxi kasiya wuri ra, e masoxi xɛɛma ra, e tixi gbete sanbunyie ma. Suxuse naxee dugi xirima wurie ma, nee yailanxi wure gbeeli ra.

¹ Besaleli naxa kankira yailan kasiya wuri ra. A kuya nongon firin nun a tagi, a igbo nongon keren nun a tagi, a ite nongon keren nun a tagi. ² A naxa a kui nun a fari maso xema ra, a naxa a de kiri fan yailan xema ra. ³ A naxa a suxude digilixi naani rafala xema ra a tunxun naanie ma, firin na seeti, firin na boore seeti ma. ⁴ A naxa kasiya wuri firin masoli a be, a fa e maso xema ra. ⁵ A naxa e raso na kankira suxude digilixie kui, nee findi kankira tongose ra.

⁶ A naxa na kankira derakote yailan xema fanyi ra, a findi xunsare yire ra. A kuya nongon firin nun a tagi, a igbo nongon keren nun a tagi. ⁷ A naxa maleke sawure firin yailan xema xabuxi ra kankira derakote fari na seeti firinyie ma. ⁸ Na maleke sawuree nun na kankira derakote findi keren na. ⁹ Na maleke sawure firinyie naxa ti e boore ya i, e gabutenyie italaxi, e xun sinxi xunsare yire.

¹⁰ A naxa teebili yailan kasiya wuri ra, naxan kuya nongon firin, a igbo nongon keren, a ite nongon keren nun a tagi. ¹¹ A naxa xema fanyi maso a ma, a nun a de kirie ma. ¹² A naxa xebenyi nde sa na de kirie bun ma, naxan igbo suxui keren a nun a tagi. A naxa xema sa na fan de kirie ma. ¹³ A naxa a suxude digilixi naani rafala xema ra a tunxun naanie ma, naxee ilanma a sanyie ra. ¹⁴ E nu na na xebenyi bun ma. Wuri kuyee nu soma nee kui teebili xaninfe ra. ¹⁵ A naxa wuri kuyee masoli kasiya wuri ra, a e maso xema ra. Nee findi teebili tongose ra. ¹⁶ Piletie, tonbilie, potie, nun paani naxee sama na teebili ma, naxee rawalima serexe yeerama daaxi xa fe ra, a naxa e birin yailan xema fanyi ra.

¹⁷ A naxa lanpui dexe nde yailan xema fanyi xabuxi ra. A sanyi, a bili, a salonyie, nun lanpui dexe naxee maniya sansi fugee ra, na birin findi keren na. ¹⁸ Salon senni nan mini lanpui dexe bili ma, saxan seeti keren, saxan boore seeti. ¹⁹ Tonbili saxan nan lu na salon senni birin xun ma. E maniya sansi bogi ra naxan dexe a burexee nun a fugee tagi. ²⁰ Tonbili naani gbete nan lu lanpui dexe bili ma. E fan maniya sansi bogi ra naxan dexe a burexee nun a fugee tagi. ²¹ Na salon firin firin dexe saxanyie bun ma naxee kelixi a bili ma, a sa ne mennie fan ma. ²² Na tonbilie nun lanpui salonyie findi keren na, e yailan xema fanyi xabuxi ra.

²³ A naxa lanpui solofere yailan, a e dexe e dexode ma alako e dexe xa yare iyalan. ²⁴ Xema naxan nawalixi lanpui dexe nun lanpui yirabase yailanfe ra, na findi xema kilo tongo saxan nun naani nan na.

²⁵ A naxa surayi serexebade yailan kasiya wuri ra. A kuya nongon keren, a igbo

nongon keren, a seeti naani birin lan, a ite nongon firin. Ferie naxa lu a tuxuie ra, e nun serexebade findi se keren na. ²⁶ A naxa na serexebade birin maso xeema xinde ra, a fari, a seetie, a ferie, nun a de kiri. ²⁷ A naxa suxuse digilixi firin yailan xeema ra serexebade seeti firinyie ma, a de kiri laabe ra, wuri kuyee soma naxee kui a xaninfе ra. ²⁸ A naxa na wurie yailan kasiya wuri ra, a naxa xeema maso e ma.

²⁹ A naxa ture seniyenxi nun surayi xiri fanyi yailan naxan nawalima serexedube tife ra. Na wali xa raba a fanyi ra alo labunde rafale a rafalama ki naxe.

38

Serexebade, ye sase xungbe, nun tete

¹ A naxa serexe gan daaxi serexebade yailan kasiya wuri ra, naxan kuya nongon suuli, a igbo nongon suuli, a seeti birin lan, a ite nongon saxan. ² A naxa feri naani yailan a tuxui birin ma, naxee findixi se keren na serexebade ra. A naxa wure gbeeli maso na birin ma. ³ A naxa serexebade yirabase birin yailan wure gbeeli ra, alo xube sasee, pelie, pootie, sube soxosee, nun tundee te sama naxee kui. ⁴ A naxa se nde yailan wure gbeeli ra naxan sama te xun ma, sube sama naxan fari. A naxa suxuse digilixie wure gbeeli daaxi sa a tuxui ma, ⁵ alako a xa gbaku serexebade kui a tagi. ⁶ A naxa wuri kuyee yailan kasiya wuri ra wure gbeeli masoxi e ma. ⁷ A naxa e raso suxuse digilixi naanie kui serexebade seeti firinyie ma a xaninfе ra.

⁸ A naxa horomolingira ye sase xungbe nun a doxoise yailan wure gbeeli ra, a naxan soto ginnee ra naxee nu malanma horomolingira sode de ra.

⁹ A naxa tete yailan suwa dugi ra. Tete kuya nongon keme yirefanyi mabiri ra. ¹⁰ A naxa gere dugi gbaku na wuri moxonen ma, naxee tixi sanbunyi wure gbeeli daaxie ma. Na dugi suxusee naxa yailan gbeti ra. ¹¹ Tete kuya nongon keme koola fan mabiri ra. A naxa gere dugi gbaku na wuri moxonen ma, naxee tixi sanbunyi wure gbeeli daaxie ma. Na dugi suxusee xa yailan gbeti ra. ¹² Tete igbo nongon tongo suuli sogegorode mabiri ra. A naxa gere dugi gbaku na wuri fu ma, naxee tixi sanbunyi wure gbeeli daaxie ma. ¹³ Tete igbo nongon tongo suuli sogetede fan mabiri ra. ¹⁴ A naxa gere dugi gbaku seeti ma wuri saxan ma, naxee tixi sanbunyi ma. Na kuya nongon fu nun suuli. ¹⁵ A naxa gere dugi gbete gbaku boore seeti ma wuri saxan ma, naxee tixi sanbunyi ma. Na fan kuya nongon fu nun suuli.

¹⁶ Tete naxa yailan suwa dugi ra. ¹⁷ Wuri naxee tixi tete ma, e tixi e sanbunyi wure

gbeeli daaxie ma. Dugi suxusee fan na e ma naxee yailanxi gbeti ra. ¹⁸ Tete sode de naxa yailan suwa dugi ra naxan masoxoxi gese gere daaxi, bulu daaxi, nun a gbeeli ra. Na dugi kuya nongon moxonen, a ite nongon suuli, alo tete dugi birin xa maigboe. ¹⁹ A naxa na gbaku wuri naani ma, naxee tixi e sanbunyi wure gbeeli daaxie ma. Na dugi suxusee nun na wuri xunyie yailanxi gbeti ra. ²⁰ Horomolingira nun tete luuti xirima se naxee ma, nee birin yailan wure gbeeli nan na.

²¹ Horomolingira, seede walaxe na naxan kui, a wali dentege nan yi ki. Lewi bonsoe na wali raba Munsa xa yaamari nan bun ma. Haruna xa di, Itamari nan findi na wali yarerati ra. ²² Besaleli, Uri xa di, Xuru xa mamadi, Yuda bonsoe, naxa Alatala xa yaamari birin naba, a naxan masen Munsa be. ²³ Oholiyabu, Axisamaki xa di, Dana bonsoe, findi Besaleli malima nan na. A nu fata se masolide nun suwa dugi masoxode gese gere daaxi, bulu daaxi, nun a gbeeli daaxi ra.

²⁴ Xeema xasabi naxan nawalixi horomolingira tife ra, naxan soto hadiya ra, a lan kilo keme solomanaani kilo tongo solomanaani nan ma horomolingira maniyase seriye ki ma. ²⁵ Gbeti xasabi naxan soto mixi kontixie ra, na lan ne kilo wulu saxan kilo keme solomasaxan nun tongo solofere nun suuli nan ma horomolingira maniyase seriye ki ma. ²⁶ Mixi wulu keme senni mixi wulu saxan keme suuli tongo suuli, naxee nu bara je moxonen soto nun na xanbi, naxee kontixi Isirayilakae tagi, kankan naxa gbeti giramu senni fi horomolingira maniyase seriye ki ma.

²⁷ E naxa gbeti kilo wulu saxan kilo keme naani raxunu wuri sanbunyi keme yailanfe ra horomolingira nun tete be. Wuri sanbun keren findi gbeti kilo tongo saxan nun naani nan na. ²⁸ Na kilo moxonen naxan lu, na naxa yailan dugi nun wuri suxusee nun wuri xunyie ra.

²⁹ Wure gbeeli xasabi naxan soto Isirayila xa hadiya ra, a lan kilo wulu firin kilo keme naani nun solofere. ³⁰ E naxa a findi horomolingira sode de wuri sanbunyiye ra, nun serexebade wure gbeeli daaxi, nun na xa yirabase birin, ³¹ nun tete wuri sanbunyiye, nun a sode de xa wuri sanbunyiye, nun tete maxirisee ra.

39

Serexedube sosee

¹ E naxa sose seniyenxie dege Haruna nun serexedubee be naxee walima horomolingira kui. Na sose yailanxi gese gere daaxi, bulu daaxi, a gbeeli, nun suwa dugi

ra, alɔ Alatala a yamari Munsa bɛ ki naxɛ.

² E donma kuyɛ yailan nɛ xɛɛma gɛsɛ ra, gɛsɛ gɛrɛ daaxi, bulu daaxi, a gbɛeli, nun suwa dugi ra. ³ E naxa xɛɛma kɛbɛla itala, e a ixaba waya ki. E naxa gɛsɛ gɛrɛ daaxi, bulu daaxi, a gbɛeli, nun suwa dugi masɔxɔ na waya ra. A findi wali tofanyi nan na. ⁴ E naxa tunki raxunmase firin yailan naxɛe xirima donma kuyɛ ra. ⁵ Beleti fan yailan na ki nɛ gɛsɛ gɛrɛ daaxi, bulu daaxi, a gbɛeli, nun suwa dugi ra. Na beleti nun donma findi kɛrɛn na. Na birin yailanxi alɔ Alatala Munsa yamari ki naxɛ. ⁶ E naxa onixi gɛmɛɛ rawali, e naxa e rabilinyi findi xɛɛma ra. E naxa Isirayila xa die xili masoli e ma, alɔ e sɛbɛli masolima xurundɛ ma ki naxɛ. ⁷ E naxa e sa tunki raxunmasee ma, e xa findi tɔnxuma sɛɛ ra Isirayila xa die xa fɛ ma, alɔ Alatala Munsa yamari ki naxɛ.

⁸ E donma kanke raxunmase yailan nɛ a fanyi ra alɔ donma kuyɛ. E na suwa dugi sɔxɔ xɛɛma gɛsɛ, gɛsɛ gɛrɛ daaxi, bulu daaxi, nun a gbɛeli ra. ⁹ A xa kuyɛ nun a xa igboya lan nɛ suxui kɛrɛn ma, a findi dugi firin na. ¹⁰ Gɛmɛ tofanyie safɛ naani nu na a ma. Safɛ singɛ findi gɛmɛɛ nan na, naxɛe xili sariduwani, topasi, nun emɛrode. ¹¹ Safɛ firin ndɛ, esikaribukulu, safiri, nun diyaman. ¹² Safɛ saxan ndɛ, opalɛ, agati, nun amɛtisite. ¹³ Safɛ naani ndɛ, kirosolite, onixi, nun yasipɛ. Xɛɛma nu na na gɛmɛ birin rabilinyi ma. ¹⁴ Isirayila xa die xilie masoli na gɛmɛ fu nun firin ma, alɔ sɛbɛli masolima xurundɛ ma ki naxɛ. Kankan xili masoli gɛmɛ ndɛ ma. E findi Isirayila bɔnsɔɛ fu nun firinyi matɔnxuma sɛ nan na.

¹⁵ E luuti die dɛgɛ nɛ na donma kanke raxunmase ma, naxɛe yailanxi xɛɛma ra. ¹⁶ E xurundɛ firin yailan xɛɛma ra, e e dɛgɛ donma kanke raxunmase ma a dɛ kiri firinyie ma a fuge ra. ¹⁷ E na luuti xɛɛma daaxie xiri na xurundɛ firinyie ma, naxɛe dɛgɛxi donma kanke raxunmase dɛ kiri ma. ¹⁸ E man na luuti firinyie xiri donma kuyɛ tunki raxunmasee ma. ¹⁹ E xurundɛ firin gbɛtɛ yailan xɛɛma ra, naxɛe dɛgɛma donma kanke raxunmase dɛ kirie ma a laabɛ ra. E nɛɛ dɛgɛ donma kuyɛ sɛɛti ma. ²⁰ E man naxa xurundɛ firin gbɛtɛ yailan xɛɛma ra, naxɛe dɛgɛma tunki raxunmasee laabɛ ra, dennaxɛ ilanma beleti ra. ²¹ Donma kanke raxunmase naxa xiri donma kuyɛ ma luuti gɛrɛ daaxi ra naxan nasoma xurundɛɛ kui naxɛe dɛgɛxi donma kanke raxunmase nun donma kuyɛ ma, alɔ Alatala a yamari Munsa bɛ ki naxɛ.

²² E naxa sɛrɛxɛdubɛ xa donma kuyɛ bun magorɛ sɔxɔ gɛsɛ gɛrɛ daaxi ra. ²³ E naxa a xunyi rasodɛ xaba a tagi, e na sode dɛ masɔxɔ, alako bɔɔdɛ yo naxa lu a ma. ²⁴ E naxa a raxunma pirinti gɛrɛ daaxi, bulu daaxi, nun a gbɛeli ra naxɛe misaalixi wuri bogi

ra a rabilinyi birin ma. ²⁵ E naxa tɔlɔnyi xɛema daaxie dɛgɛ na pirintie tagi, alako tɔlɔnyi nde xa lu wuri bogi birin tagi na donma kuyɛ bun magoroe sanbunyi birin ma. ²⁶ Tɔlɔnyi nde lu wuri bogi birin tagi na donma kuyɛ bun magoroe sanbunyi birin ma, alako serexedubɛ xa wali raba alɔ Alatala a yamari Munsa bɛ ki naxɛ.

²⁷ E naxa donma kuyɛ bun magoroe gbete dɛgɛ suwa dugi ra, naxan sɔxɔxi a fanyi ra, Haruna nun a xa di xɛmɛɛ bɛ. ²⁸ Xunmasee naxa yailan suwa dugi ra. E naxa wantan bun soe fan dɛgɛ suwa dugi ra. ²⁹ E naxa beleti yailan suwa dugi ra, naxan masɔxɔxi a gɛrɛ daaxi, a bulu daaxi, nun a gbeeli ra, alɔ Alatala a yamari Munsa bɛ ki naxɛ.

³⁰ E naxa walaxɛ lanmadi yailan xɛema ra, a findi tɔnxuma seniyenxi ra. E naxa sebeli masoli a ma, alɔ e sebeli masolima xurundɛ ma ki naxɛ, a masenfe ra, «Mixi seniyenxi Alatala bɛ». ³¹ E naxa a xiri gɛsɛ gɛrɛ daaxi nun gɛsɛ bulu daaxi ra xunmase ma a tigi ra, alɔ Alatala Munsa yamari ki naxɛ.

Hɔrɔmɔlingira xa see

³² Hɔrɔmɔlingira xa wali rapɔn na ki nɛ, Ala mixi lima dennaxɛ. Isirayilakae a birin naba nɛ alɔ Alatala Munsa yamari ki naxɛ. ³³ E naxa hɔrɔmɔlingira xanin Munsa xɔn ma nun a se birin:

tɛtɛ nun a see,

suxusee,

xebenyie,

wuri kuyɛɛ mɔoli firin,

wuri sanbunyie,

³⁴ hɔrɔmɔlingira makotosee,

naxan yailanxi yɛxɛɛ kontonyi kiri gbeeli ra,

a nun naxan yailanxi pirimui kiri ra,

dugi naxan gbakuxi yire seniyenxi fisamante sode dɛ ra,

³⁵ saate kankira nun a xa wuri kuyɛɛ,

seede kankira derakote,

³⁶ teebili,

teebili xa yirabase birin,

taami naxan sama teebili fari serexɛ ra,

³⁷ lanpui dɔxɔsɛ xɛema daaxi,

lanpuie nun e yirabase birin,
 lanpui ture,
³⁸ Surayi serɛɛɛbade xɛɛma daaxi,
 ture seniyɛnxi,
 surayi,
 dugi naxan gbakuxi tɛtɛ sode dɛ ra,
³⁹ serɛɛɛbade wure gbeeli daaxi,
 a xa wuri kuyɛɛ,
 wuree sube sama naxee fari,
 a xa yirabase birin,
 ye sase xungbe nun a dɔxɔse,
⁴⁰ tɛtɛ dugie,
 wurie dugie gbakuma naxee ma
 nee sanbunye,
 dugi naxan gbakuxi hɔrɔmɔlingira sode dɛ ra,
 luutie,
 wurie luutie xirima naxee ra,
 a nun hɔrɔmɔlingira xa yirabase birin, Ala maxandi yire,
⁴¹ serɛɛɛdubɛɛ xa sose naxee rawalima yire seniyɛnxi kui,
 Haruna nun a xa die xa sose seniyɛnxie naxee rawalima e xa serɛɛɛdubɛɛ wali kui.
⁴² Isirayilakae naxa na wali birin naba, alɔ Alatala a yamari Munsa bɛ ki naxɛ. ⁴³ Munsa
 to na wali birin to a rabaxi alɔ Alatala a yamari ki naxɛ, a naxa duba Isirayilakae bɛ.

40

Ala xa yaamarie rakamalife

hɔrɔmɔlingira xa fɛ ra

¹ Alatala naxa a masen Munsa bɛ, ² «Kike singe xi singe, i xa hɔrɔmɔlingira ti, Ala
 wo lima dennaxɛ. ³ I xa saate kankira dɔxɔ na kui dugi xanbi ra. ⁴ I xa teebili yailan
 menni, i fa see dɔxɔ a ma a raba ki ma. I xa lanpui dɔxɔse ti naa, i fa lanpuie dɔxɔ a fari.
⁵ I xa surayi serɛɛɛbade xɛɛma daaxi dɔxɔ saate kankira ya ra, i fa dugi gbaku
 hɔrɔmɔlingira sode dɛ ra Ala maxandi yire. ⁶ I xa serɛɛɛbade dɔxɔ hɔrɔmɔlingira sode ya
 ra, Ala wo lima dennaxɛ. ⁷ I xa ye sase xungbe dɔxɔ hɔrɔmɔlingira nun serɛɛɛbade tagi, i

fa ye sa a kui. ⁸ I xa hōrōmōlingira tete ti, i fa dugi gbaku tete sode de ra.»

⁹ «I na ge na ra, i xa ture seniyenxi tongo, i fa a sa hōrōmōlingira nun a kui se birin ma, e xa seniyen Alatala be. ¹⁰ I man xa na raba serexebade nun a yirabase birin ma. E xa seniyen Alatala be. ¹¹ I man xa na raba ye sase xungbe nun a dōxose ma, e xa seniyen Alatala be.»

¹² «I xa Haruna nun a xa die malan hōrōmōlingira sode de ra, i fa e maxa ye ra. ¹³ I xa serexedube sose seniyenxie ragoro Haruna ma, i fa ture seniyenxi sa a ma alako a xa findi n ma serexedube ra. ¹⁴ I xa serexedube sose seniyenxie ragoro a xa die fan ma, ¹⁵ i fa ture seniyenxi sa e ma alo i naxan nabaxi e baba ra, alako e fan xa findi n ma serexedubee ra. Na wali luma e yi ra, a nun naxee fama e xanbi ra abadan.»

¹⁶ Na temui Munsa naxa Alatala xa yaamari birin naba alo a fala a be ki naxe. ¹⁷ Kelife e mini Misira boxi kui temui naxe, je firin nde, kike singe, tengē singe lōxōe, a naxa hōrōmōlingira ti. ¹⁸ Munsa naxa hōrōmōlingira sanbunye sa, a a wuri birin ti, ¹⁹ a fa dugie itala hōrōmōlingira xun ma, a nun a makotosee alo Alatala a yamarixi ki naxe.

²⁰ Munsa naxa saate walaxe firinyie sa saate kankira kui, a fa kankira wurie raso kankira suxuse digilinxie kui, a kankira derakote sa a de ra naxan findixi xunsare yire ra. ²¹ A to ge na rabade, a naxa saate kankira xanin hōrōmōlingira kui, a a dōxō yire seniyenxi fisamante kui. A naxa dugi gbaku na ya ra, alako mixi yo naxa a to alo Alatala a yamarixi ki naxe.

²² A naxa hōrōmōlingira teebili dōxō dugi ya ra a kōola mabiri, ²³ a fa taamie sa a fari a safe ki ma Alatala ya xori alo Alatala a yamarixi ki naxe. ²⁴ A naxa lanpui dōxōse ti hōrōmōlingira kui teebili ya ra a yirefanyi mabiri, ²⁵ a fa lanpuie ti na fari Alatala ya xori alo Alatala a yamarixi ki naxe. ²⁶ A naxa surayi serexebade dōxō hōrōmōlingira kui dugi gbakuxi a ya ra, ²⁷ a fa surayi gan menni alo Alatala a yamarixi ki naxe.

²⁸ A naxa dugi gbaku hōrōmōlingira sode de ra. ²⁹ A naxa serexebade dōxō hōrōmōlingira sode de ra. A naxa serexe gan daaxi ba menni nun hadiya alo Alatala a yamarixi ki naxe. ³⁰ A naxa ye sase xungbe dōxō hōrōmōlingira nun serexebade tagi, a ye sa a kui maraseniyyeni xa fe ra. ³¹ Munsa, Haruna, nun Haruna xa die nu luma e belexee nun e sanyie maxa ra naa, ³² e soma hōrōmōlingira kui temui naxe, a nun e serexe bama temui naxe alo Alatala Munsa yamarixi ki naxe. ³³ Munsa naxa tete rabilin hōrōmōlingira nun serexebade ra, a fa dugi gbaku tete sode de ra.

³⁴ Munsa to ge na birin na, nuxui naxa din hōrōmōlingira xun ma, Ala e lima

dennaxe. Alatala xa nɔɛ naxa hɔɔmɔlingira rafe, ³⁵ han na naxa a niya Munsa mu nu nɔma sode na kui. Alatala xa nɔɛ nu bara na rafe, nuxui fan nu radinxi na birin xun ma. ³⁶ Kelife na tɛmɔi e xa biyaasie kui, Isirayilakae mu jɛɛ fɔlɔma fo nuxui na keli hɔɔmɔlingira xun ma. ³⁷ Xa nuxui mu te hɔɔmɔlingira xun ma, Isirayilakae mu jɛɛ raminima sigafe yire gbete. ³⁸ Alatala xa nuxui nu luma hɔɔmɔlingira xun ma yanyi nun kɔɛ ra. Isirayilakae nu te dɛxɛxi toma nuxui kui kɔɛ ra. A lu na ki nɛ e xa biyaasi birin kui.
